

淵峯奕函

第四函  
七冊

淵鑑類函卷三百八

人部六十七

遊覽  
恤孤

懷舊

遊覽五下

**原賦**後漢班彪遊居賦夫何事於冀州聊託公以遊居  
歷九土而觀風亦哲人之所虞遂發軔於京洛臨孟津  
而北厲想尚父之威虞號蒼兕而明誓既中流而歎息  
美周武之知性謀人神以動作享烏魚之瑞命瞻淇澳  
之園林善綠竹之猗猗望常山之峩峩登北岳而高遊  
嘉孝武之乾乾親飾躬於伯姬建封禪於岱宗瘞元玉  
於此丘徧五岳與四瀆觀滄海以周流鄙臣恨不及事

陪後乘之下僚今匹馬之獨征豈斯樂之足娛且休精  
於敝邑聊卒歲以須臾 魏曹植節遊賦覽宮宇之顯

麗實大人之攸居建三臺於前處飄飛陛以凌虛連雲  
閣以遠徑管觀榭於城隅亢高軒以迴眺緣雲霓而結  
疏仰西岳之崧岑臨漳滏之清渠觀靡靡而無終何眇  
眇而難殊亮靈后之所處非吾人之所廬於是仲春之  
月百卉叢生萋萋藹藹翠葉朱莖竹林青蔥珍果含榮  
凱風發而時鳥謹微波動而水蟲鳴感氣運之和順樂  
時澤之有成遂乃浮素蓋御驂騶命友生攜同儔誦風  
人之所歎遂駕言而出遊步北園而馳騫庶翱翔以解

憂望洪池之滉漾遂降集乎輕舟沈浮蟻於金罍行觴  
爵於好仇絲竹發而響厲悲風激於中流且容與以盡  
觀聊永日而忘愁嗟羲和之奮策怨曜靈之無光念人  
生之不永若春日之微霜諒遺名之可紀信天命之無  
常愈志蕩以淫遊非經國之大綱罷曲宴而旋服遂言  
歸於舊房 又感節賦攜友生而遊觀盡賓主之所求  
登高壙以永望冀消日以忘憂欣陽春之潛潤樂時澤  
之惠休望候雁之翔集想元鳥之來遊嗟征夫之長勤  
雖處逸而懷愁懼天河之一迴沒我身乎長流豈吾鄉  
之足顧戀祖宗之靈丘惟人生之忽過若鑿石之未燿

慕牛山之哀泣懼平仲之我笑折若華之翳日庶朱光  
之長焰願寄軀於飛蓬乘陽風而遠飄亮吾志之不從  
乃拊心以歎息青雲鬱以西翔飛鳥翻而上匿欲縱體  
而從之哀予身之無翼大風隱其四起揚黃塵之冥冥  
野獸驚以求羣草木紛其揚英見遊魚之泔灑感流波  
之悲聲內紆曲而潛結心怛惕以中驚匪榮德之累身  
恐年命之早零慕歸全之明義庶不忝乎所生 楊修  
節遊賦曰爾乃息偃暇豫攜手同征遊乎北園以娛以  
逞欽太皞之統氣樂乾坤之布靈誕煙煜之純和百卉  
挺而滋生谷風習以順時撓百物而有成行中林以仿

惶玩奇樹之抽英或素華而雪朗或紅彩而發頰綠葉  
白蒂紫柯朱莖楊柳依依鍾龍蔚青紛紛灼灼以舒葩芳  
馥馥以播馨嗟珍果之叢生每異類而絕形稟沖和以  
固植信能實而先榮於是迴旋詳觀目周意倦御於方  
舟載笑載言仰泝涼風俯濯纖腕極歡欣以從容乃升  
車而來反

**增**梁沈約郊居賦爾乃傍窮野抵荒郊編  
霜莢葺寒茅構棲噪之所集築町疇之所交因犯檐而  
刊樹由妨基而剪巢決渟洿之汀澹塞井甃之淪均藝  
芳枳於北渠樹修楊於南浦遷甕牖於蘭室同肩牆於  
華堵織宿楚以成門籍外扉而爲戶旣取陰於庭樾又

因籬於芳杜開閣室以遠臨闢高軒而旁觀漸沼沚於  
霄垂周塍陌於堂下若乃園宅殊制田圃異區李衡則  
橘樹千林石崇則雜果萬株並豪情之所侈非儉志之  
所娛欲令紛披蓊鬱吐綠攢朱羅窗映戶接雷承隅開  
丹房以四照舒翠葉而九衢抽紅英於紫蒂銜素蕊於  
青跗訪往途之軫跡觀先識之情僞每誅空而索有皆  
指難以爲易不自己而求足並尤物以興累亦昔士之  
所迷而今予之所避也臨巽維而騁目即堆塚而流眄  
雖茲山之培塿乃文靖之所宴驅四牡之低昂響繁笳  
之清轉羅方貞而綺錯窮海陸而兼薦奚一權之足偉

委千金其如線試撫臆而爲言豈斯風之可扇將通人之遠旨非庸情之所見聊遷情而徙睇識方阜之歸津帶修汀於桂渚肇舉插於強秦路縈吳而歛越塗被海而通閩懷三島以長念伊故鄉之可珍寶愆期於晚歲非失步於方春何東川之瀰瀰獨流睇於吾人謬參賢於昔代亟從遊於茲所侍綵旄而齊轡陪龍舟而遵渚或列席而賦詩或班觴而宴語總惟一朝冥漠西陵忽其蔥楚望商飈而永歎每樂愷於斯觀始則鐘石鏘鉉終以魚龍瀾漫或升降有序或浮白無算貴則丙魏蕭曹親則梁武周旦莫不共霜霧而歇滅與風雲而消散



睇東嶽以流目心悽惆而不怡蓋昔儲之舊苑實博望  
之餘基修林則表以桂樹列草則冠以芳芝風臺累翼  
月榭重栴千櫨捷業百拱相持阜轅林駕蘭榭水嬉踰  
三齡而事往忽二紀以歷茲咸遺漫以蕩滌非古今之  
異時回余眸於良域覲高館於茲嶺雖混成以無跡實  
遺訓之可秉始餐霞而吐霧終凌虛而倒景駕雌蜺之  
連蜷泛天光之悠永指咸池而一息望瑤臺而高騁匪  
爽言以自媵冀神方之可請惟鍾巖之隱鬱表皇都而  
作峻蓋望秩之所宗含風雲而吐潤其爲狀也則巍峩  
崇峯喬枝拂日蕤疑岩崿墜石堆星岑崟嶂岫或坳或

平盤堅枕卧詭狀殊形孤磴橫插洞穴斜經千丈萬仞  
三襲九成亘繞州邑款跨郊坳素煙晚帶白霧晨縈近  
循則一巖異色遠望則百嶺俱青晚樹開花初英落蕊  
或異林而分丹青乍因風而雜紅紫紫蓮夜發紅荷曉  
舒輕風微動其芳襲余風騷屑於園樹月籠連於池竹  
蔓長柯於簷桂發黃花於庭菊水懸埴而帶坻雪縈松  
而被野鴨屯飛而不散雁高翔而欲下並時物之可懷  
雖外來而非假寔情性之所留滯亦志之而不能捨也  
傷余情之頽暮罹憂患其相溢悲異軫而同歸歡殊方  
而並失時復託情魚鳥歸閑蓬華旁闕吳娃前無趙瑟

以斯終老於焉消日惟以天地之恩不報書事之官靡  
述徒重於高門之地不載於良史之筆長太息其何言  
羌愧心之非一

唐王勃遊廟山賦陟彼山阿積石峩  
峩亭臯千里傷如之何啟松崖之密蔭攀桂岳之崇柯  
隔浮埃於地絡披顛氣於天羅爾其綠巖分徑蒼岑對  
室茵軒丹紉芝場翠密俯泉石之清泠臨風颺之瑟颺  
仰紺臺而攜手望元都而容膝躡霞岡於玉砌步雲岳  
於金壇懷妙童於真女想青螭及碧鸞情恍恍而將逸  
心迴迴而未安見丹房之晚晦知紫洞之宵寒旣而霧  
昏千墮煙浮四野恨流俗之情多痛飛仙之術寡驅逸

思於方外踞高情於天下使蓬瀛可得而宅焉何必懷  
於此都也亂曰已矣哉吾誰欺林壑逢地煙霞失時託  
宇宙兮無日俟鸞虬兮未期他鄉山水祇令人悲李  
嶠楚望賦曰眇乎忽然高山之顛露團團而濕草風烈  
烈而鳴泉對蒼茫之寒日聽蕭索之悲蟬廓獨處而無  
晤吾凝睇乎八埏於是繁懷載紆積慮未豁生遠情於  
地表起遙恨於天末霜盡川長雲平野闊恨遊襟之浩  
蕩憤羈怨之切怛若乃平原杳兮千里春山花香兮萬  
里新迷故鄉之處所滅愛舊之聲塵願寄言而靡託思  
假翼而無因徒極睇而盡思終天性而傷神或復天高

朔漠氣冷河關漢塞鴻度吳宮燕還對落葉之驅影怨  
浮雲之慘顏爾乃永眺無見端居不聊愴歸軒之寂寂  
傷遠客之悠悠月臨城曉風送邊秋唳鶴聞兮烟不寐  
凝笳動兮此夜愁及夫寒野蕭條空山寂寥目鄢郢而  
途渺指邯鄲而路遙傷永離兮浦曲訣遠送兮河橋眺  
平蕪之漫漫瞻遠樹之迢迢伫然直視嗑矣魂銷形將  
槁木同植心與飛蓬共飄至如隴上從軍漢陽謫戍插  
羽朝急要鞭夜赴黯黯寒雲蒼蒼關樹甘壘影於異域  
蹙回首於歸路魂逝兮邑里目斷兮煙霧步將前而復  
留望欲罷而還顧覩驚塵之歛起見征羽之將度泉石

愴而增咽行旅悲而失措亦有擣衣思婦織錦佳人看  
粉黛兮無色視桃李兮非春君去兮還無期妾心兮私  
自悲高臺四望眇無極天涯一去何盡時天涯兮綿綿  
問道路兮將幾千朝朝暮暮綺窗前長懷此恨終永年  
若夫羈旅失職之人放逐流離之客羌抱恨而誰訴塊  
緘愁而不釋於是窮澤際天滄流拂漢屬榮悴兮時改  
遇炎涼兮節換莫不瞻草木而孤絕向風烟而永歎故  
夫望之爲體也使人慘悽伊鬱惆悵不平興廢思慮震  
蕩心靈罔兮若有求而不致也悵乎若有待而不至也  
悠悠揚揚似出天壤而涉雲莊逡逡巡巡若失其守而

忘其真羣感方興衆念始并旣情招而思引亦目受而

心傾

劉禹錫楚望賦曰櫺軒之外羣山巖從岡陵靡

阨勢若相拱出雲見怪窈蔚森聳夕露朝霞望如飛動  
簷廡之下大江瀕洞支流合輸泄入雲夢羲和望舒出  
沒兩涯涵泳之族聳取歔呀秋水灌盈漩石飄沙流枿  
軒昂舞於盤渦逮及收潦澹如醪醞白石磷磷倒影羅  
生蘋末風起有文無聲悠遠煙綿與空蒼然湘沅之春  
先令而行臆月寒盡温風發榮土膏如濡言鳥嚶嚶三  
星曙其曉中植物颺以飄英雲歸高唐草蔽洞庭目與  
天盡神將化并圓方相函遊氣杳冥熙熙藹藹蕩飾羣

形枿樹同丘積空凝青環洲曲塘含景曜明恢台之氣  
發於春季涉夏如鑠逮秋愈熾土山焦熬止水漫沸翔  
禽趾隨呀喙垂翅曦赫歎蒸陽極召陰二儀交精下上  
相歆雲興天際歟若車蓋凝矚未瞬彌漫霏霽驚雷若  
火喬木糜碎殷地熱空萬夫皆廢懸雷縷日中見沫  
移晷而收野無完塊少陰之中景物澄鮮丹葉星房燭  
耀川原夕月旣望曜於丹泉上鏡下水湔塵濯煙宿麗  
潛芒獨行高躔明星方揚斜漢西懸璿柄如隋半沈層  
瀾雞啁晰而晨鳴今日荏苒以騰晶動植瞭今已分山  
川鬱乎不平復人寰之誼卑洵浩浩以營營追向時之



景光不可驟得以再更意華胥之夢還猶彷彿而馳精  
日次於房天未降霜百卉猶澤水泉收脉故道脰削衍  
爲廣斥水禽嬉戲引吭伸翮紛驚鳴而決起拾綵翠於  
砂礫維時北風振槁揚埃蕭條邊聲與雁俱來寒氛委  
積萬竅交激楚雲改容飛雨凝滴灑林遽響淅瀝梢槭  
我處層軒日星迴還閱天數而視民風百態變見乎其  
間非耳剽以臆說兮固幽求而縱觀觀物之餘遂觀我  
生何廣覆與厚載豈有形而無情高莫高兮九闔遠莫  
遠兮故園舟有楫兮車有轄江山坐兮不可越又安知  
其所如况臨高以觀物 又望賦邈不語兮臨風境自

外兮感從中明晦轉續兮八極鴻濛上下交氣兮羣生  
異容發孤照於寸眸驚遐情乎太空物乘化兮多象人  
遇時兮不同嗟乎有目者必騁望以盡意當望者必緣  
情以感時有待者瞿瞿忘懷者熙熙慮深者矐然若喪  
樂極者沖然無違外徙倚其如一中糾紛兮若斯望如  
何其望最樂晞慶霄兮遡阿閣如雲兮天顏咫尺如草  
兮臣心踴躍扇交翟兮葳蕤旗升龍兮曠略日轉黃道  
天開碧落凝瑞景於庭樹掬飛煙於殿幕望如何其望  
且歡登灞岸兮見長安紛擾擾兮紅塵合鬱蔥蔥兮佳  
氣盤池象漢兮昭回城依斗兮闌干避御史之驄馬逐

倖臣之金丸望如何其望攸好宗萬靈兮越四隩漢帝  
仙臺兮秦皇海嶠霓裳踊於河上馬跡窮乎越徼紫氣  
度關而斐亶神光屬天而照耀睨眷眷以馳精聳專專  
而觀妙望如何其望有形視蠢蠢兮窮冥冥楚塞氛惡  
兮蕭關燧明暈籠孤月兮角奮長庚沙長似雪磧有疑  
城煙雲非女子之氣草木盡王者之兵審曳柴之虛警  
破來騎之先聲信有得於風鳥示無言於旆旌望如何  
其望且慕恩意隔今年光度雕輦已辭兮金屋何處長  
信草生兮長門日暮候翠華之儻來仰元天以自訴况  
復湘水無還漳河空注淚染枝葉香餘紉素風蕭蕭兮

北渚波煙漠漠兮西陵樹夫不歸兮江上石子可見兮  
秦原墓拊琴翻朔塞之思挾瑟指邯鄲之路望如何其  
望最傷侯環玦兮思帝鄉龍門不見兮雲霧蒼蒼喬木  
何許兮山高水長春之氣兮悅萬族獨含嘔兮千里目  
秋之景兮懸清光偏結憤兮九迴腸羨環拱於白榆惜  
馳暉於落棠諒衝斗兮誰見伊戴盆兮何望豈止蘇武  
在胡管寧浮海送飛鴻之滅沒附陰火之光彩鶴頸長  
引烏頭未改恨已極兮平原空起何時兮東山在永望  
如何傷懷孔多降將有依風之感宮人成憶月之歌歌  
曰張衡側身愁思久王粲登樓日迴首不作渭濱垂釣

臣羞隨洛陽拜塵友 蕭穎士登故宜城賦曰升彼墟

兮遐眺荆江邇矚樊沔頽施以隱嶙歆缺而峻嶮野茫  
茫其塵極何人戶之單渺悵青春兮始交又白日兮將  
晚悲世事之艱阻慨征途之未返憑寒臯以盡目究林  
莽之深淺煙迴起於殘燎鳥羣飛於絕巘曾是感時而  
戀舊孰不酸辛而僂俛偉夫峴首之爲鎮也峻隅百雉  
危甍萬井森松篁之蒼蔚劃鄜街以周整前山縈依而  
秀拔斜漢杳映以清迴秔稌蔗橘雜荆衡之蓄桑麻黍  
粟侔冀魏之境漢之盛也稱南國之冠蓋晉之衰也爲  
北門之捍屏今方嶽之仁明惠久要於平生幸羈旅而

獲宥旋載筆於戎旌陪後車於南紀儼四牡以專征歷  
隕墉而訊諸乃楚鄢之遺城荆雲兮蔽虧朔雁兮差池  
雲有迴兮雁有歸嗟余行兮愴遲遲諒窮愁兮莫諉雖  
九醞兮奚施 白居易泛渭賦曰亭亭華山下有人跂  
兮望兮愛彼三峰之白雲泛泛渭水上有舟沿兮沂兮  
愛此百里之清流以我為太平之人兮得於斯而優游  
又感傷春之氣熙熙兮樂天和而不憂曰予生之幸兮  
時哉時哉當皇唐受命之九葉兮夷與華而無氛埃及  
皇帝繼位之二紀兮命高與鄭為鹽梅二賢兮爰立四  
門兮大開凡讀儒書與履儒行者率充賦而四來雖片

藝而必收兮故不棄余之小才感再遇於知己心慚忤  
以徘徊登余名於太常兮署余職於蘭臺臺有蘭兮閣  
有芸芳菲菲兮其可襲備一官而無事又不維而不繫  
冢去省兮百里每三旬而一入川有渭兮山有華澹悠  
悠兮其可賞目白雲兮激清流且或偃而或仰門去渭  
兮百步長一日而三往夜分兮扣舷天無雲兮水無煙  
遲遲兮明月波澹灩兮棹寅緣日暮兮舟泊草萋萋兮  
沙漠漠習習兮春風岍柳動兮渚花落發浩歎以長引  
舉濁醪而緩酌春冉冉其將盡予何爲乎不樂鳥樂兮  
雲際鳴嚶嚶兮飛裔裔魚樂兮泉底鬢撥撥兮尾激激

我樂兮聖代心融融兮神泄泄伊萬物各得其樂者由  
賢聖之相契賢致聖於無為聖致時於既濟凝為和兮  
聚五福發為春兮銷六沴不我後兮不我先適當我兮  
生之世彼鱗蟲兮與羽族咸和樂而不知惠我為人兮  
最靈所以愧賢相而荷聖帝樂乎樂乎浴於渭兮詠而  
歸聊逍遙以卒歲 又洛川晴望賦金商應律玉斗西  
建加旬雨之時晴叶秋成而適願是用步閭里詢黎獻  
皇風演溢歌且聽於昇平聖澤汪洋誦不聞於胥怨爾  
乃命親懿會朋執賦邛山眺洛邑天沈寥而雲靜氣肅  
殺而風急三川浩浩以奔流雙闕峩峩而屹立飛梁徑



度訝殘虹之未銷翠瓦光凝驚宿雨之猶濕嘉三時之  
是務觀五穀之斯入覽滌場之在勤知滯穗之見拾及  
夫日色黯黯寒光熒熒遠水澄碧羣山結青山水隱映  
花氣氤冥瞻上陽之宮闕兮勝仙家之福庭望中嶽之  
林嶺兮似天台之翠屏宜其廻鑿與兮檢玉牒朝千官  
兮御百靈使西賓之誇少弭東人之思攸寧不亦盛哉  
客有感陽舒詠樂只揮毫翰獨徙倚願得採於芻蕘終  
期拾乎青紫 周鉞登吳嶽賦曰吾嘗文戰將北羈遊  
極西覩吳嶽之孤峭計羣山之莫齊由是邈崖谷遂攀  
躋入雲靄出塵泥既臻頂上用視天倪雁塞殊小哉嶺

甚低蓋以氣壯神扶雄標國祚揖白帝兮不見抱皇城  
而自固嵐光擁翠拓開霄漢之心岫色橫空鎖斷戎夷  
之路嵒嶸旁竦峇堯上千碧草春含清風夏寒遙瞻魏  
闕迴立煙巒疑超洞府謂在天壇中隱深溪日月之光  
不到外連層阜龍蛇之勢斯蟠當其區宇正寧氛埃初  
見覽造化之宏制識乾坤之設險沂水縈盈而線走隴  
山崿崿而螺掩西窺劔閣霜地表之千鐔東瞰蓬萊黛  
波間之數點遐徵衆嶽式並隆崇彼皆受封於百代此  
獨不視於三公森筍立以削成寧慚太華黯雲凝而化  
出豈讓維嵩况乎萬仞凌虛千里倒影虎踞華裔鯨吞

虜境疊巘攢壁迴巖列屏捍絕域以增隘固中原之甚  
永直使以禮賓九有仁服八荒賢以爲輔弼宅道以  
作封疆亦須假我嚴衛憑我巨防邇藩垣於都邑遠隔  
闕於氏羌吾唐重其功崇其鎮爰升成德之號用補極  
天之峻小臣是以竟日興感抽毫賦韻登詠畢兮嶽岑  
指長安而後進 宋蘇軾前赤壁賦壬戌之秋七月既  
望蘇子與客泛舟遊於赤壁之下清風徐來水波不興  
舉酒屬客誦明月之詩歌窈窕之章少焉月出於東山  
之上徘徊於斗牛之間白露橫江水光接天縱一葦之  
所如凌萬頃之茫然浩浩乎如馮虛御風而不知其所

止飄飄乎如遺世獨立羽化而登仙於是飲酒樂甚扣  
舷而歌曰桂棹兮蘭槳擊空明兮泝流光渺渺兮予懷  
望美人兮今天一方客有吹洞簫者倚歌而和之其聲嗚  
嗚然如怨如慕如泣如訴餘音嫋嫋不絕如縷舞幽壑  
之潛蛟泣孤舟之嫠婦蘇子愀然正襟危坐而問客曰  
何爲其然也客曰月明星稀烏鵲南飛此非曹孟德之  
詩乎西望夏口東望武昌山川相繆鬱乎蒼蒼此非孟  
德之困於周郎者乎方其破荊州下江陵順流而東也  
舳艫千里旌旗蔽空醜酒臨江橫槊賦詩固一世之雄  
也而今安在哉況吾與子漁樵於江渚之上侶魚鰕而

友麋鹿駕一葉之扁舟舉匏尊以相屬寄蜉蝣於天地  
渺滄海之一粟哀吾生之須臾羨長江之無窮挾飛仙  
以遨遊抱明月而長終知不可乎驟得託遺響於悲風  
蘇子曰客亦知夫水與月乎逝者如斯而未嘗往也盈  
虛者如彼而卒莫消長也蓋將自其變者而觀之則天  
地曾不能以一瞬自其不變者而觀之則物與我皆無  
盡也而又何羨乎且夫天地之間物各有主苟非吾之  
所有雖一毫而莫取惟江上之清風與山間之明月耳  
得之而爲聲目遇之而成色取之無窮用之不竭是造  
物者之無盡藏也而吾與子之所共適客喜而笑洗盞

更酌肴核既盡杯盤狼籍相與枕籍乎舟中不知東方  
之既白 又後赤壁賦是歲十月之望步自雪堂將歸  
於臨臯二客從余過黃泥之坂霜露既降木葉盡脫人  
影在地仰見明月顧而樂之行歌相答已而歎曰有客  
無酒有酒無肴月白風清如此良夜何客曰今者薄暮  
舉網得魚巨口細鱗狀如松江之鱸顧安所得酒乎歸  
而謀諸婦婦曰我有斗酒藏之久矣以待子不時之須  
於是攜酒與魚復遊赤壁之下江流有聲斷岸千尺山  
高月小水落石出曾日月之幾何而江山不可復識矣  
予乃攝衣而上履巉巖披蒙茸踞虎豹登虬龍攀棲鶻

之危巢俯馮夷之幽宮蓋二客不能從焉劃然長嘯草木震動山鳴谷應風起水涌子亦悄然而悲肅然而恐凜乎其不可留也反而登舟放乎中流聽其所止而休焉時夜將半四顧寂寥適有孤鶴橫江東來翅如車輪元裳縞衣戛然長鳴掠予舟而西也須臾客去予亦就睡夢一道士羽衣翩躚過臨臯之下揖予而言曰赤壁之遊樂乎問其姓名俛而不荅嗚呼噫嘻我知之矣疇昔之夜飛鳴而過我者非子也耶道士顧笑予亦驚寤開戶視之不見其處元許有壬三臺賦歲癸未秋九月霜清寒薄天宇澄澈塗無長泥庭有積葉高陽子逸

興作呻畢輟趣膏秣事登涉壺清露之芳醞從白耆之  
佳客乃渡清洹稅駕乎鄴覽山川之形勝弔陳迹之未  
滅客乃指顧而告曰子見夫三臺之截薛者乎水井峙  
北金虎距南銅爵巖巖中立而三若稽作者振古所慙  
幾筭幾杵成茲崔嵬子午梁貫愈出愈奇三山鼇戴雙  
闕鳳飛連甍複道相爲蔽虧累棟山積周軒雲齊陽宮  
冬熙凌室夏淒審曲面勢有巧無遺衡漳浩浩乎其北  
隆慮靡靡乎其西收千里於寸眸萃萬景於一時卷山  
河而匪席指風霆其在頤應劉王徐倡酬諏咨登高作  
賦家有陳思父子放志欲長若斯天道惡盈樂極則悲



鎖諸嬪於幽閨望西陵之莽蒼念舊寵而與悲抑茹怨  
而自愴霜雁訴秋露花泣春宰木行拱几筵有塵哀絃  
急管其聞不聞 明陳獻章湖山雅趣賦丙戌之秋余  
策杖自南海循庾關而北涉彭蠡過匡廬之下復取道  
蕭山泝桐江艤舟望天台峰入杭觀於西湖所過之地  
盼高山之漠漠涉驚波之漫漫放浪形骸之外俯仰宇  
宙之間當其境與心融時與意會悠然而適泰然而安  
物我於是乎兩忘生死烏得而相干亦一時之壯遊也  
迨夫足涉橋門臂交羣彥撤百氏之籥籬啟六經之關  
鍵於焉優游於焉收斂靈臺洞虛一塵不染浮華盡剝

真寔乃見鼓瑟鳴琴一回一點氣蘊春風之和心游太古之面其自得之樂亦無涯也出而觀夫通衢浮埃之濛濛游氣之冥冥俗物之茫茫人心之膠膠曾不足以獻其一哂而況於權爐大熾勢波滔天賓客慶集車馬駢填得志者揚揚驕人於白日失志者戚戚伺夜而乞憐若此者吾哀其爲人也嗟夫富貴非樂湖山爲樂湖山雖樂孰若自得者之無愧怍哉客有張璪者聞余言拂衣而起擊節而歌曰屈伸榮辱自去來外物於我何有哉爭如一笑解其縛脫屣人間有真樂余欲止而告之竟去不復還噫斯人天隨子之徒與振衣千仞岡濯

足萬里流微斯人誰將與儔 費宏賜同遊西苑賦曰

由禁門而西出兮望岌業之新宮煥金榜之門懸兮上  
輝映於層空殿錄書之無逸兮亭寫詩之豳風本姬籙  
之攸昌兮發至理於周公惟王業之草昧兮率肇迹於  
農功知民依在稼穡兮必軫念夫鰥窮仰吾皇之明哲  
兮躡堯舜之希蹤豈成王之可望兮乃自抑而謙沖取  
周公之訓戒兮獨閔閔於村農當八珍之前列兮念民  
腹之未充躬三推於帝籍兮畝星布而橫縱斂嘉穀於  
秋穫兮需御廩之常供勗后妃以親蠶兮欲稍習於女  
紅繰柔絲以成帛兮備祭服之紉縫以乃勤而處逸兮

惟慎始而圖終屬秋氣之平分兮日未晁而方中忽變  
輿之時邁兮乘御天之飛龍環太液而周游度柳陰之  
垂虹召微臣而同樂兮曳委佩而景從前黼座而造膝  
兮聽玉音之雍雍諭締造之初意兮令寓目於西東荷  
慰諭之拳拳兮勉匡輔而輸忠又觀於別殿兮步徙倚  
而從容挹翠欄之芬郁兮賞錦檻之芳叢念微臣之與  
此兮實千載之奇逢愧天恩之難報兮其何以仰副乎  
宸衷祈雨暘之時若兮慶歲事之屢豐庶皇心寧而聖  
體健兮荷百福之攸同瞻前星之輝輝兮協吉夢之噩  
熊歷年邁夏而逾周兮豈但媿盛於三宗

原歎晉石崇思歸歎登城隅兮臨長江極望無涯兮思  
填曾魚澆滸兮鳥續翻澤雉遊裊兮戲中園秋風厲兮  
鴻雁征蟋蟀嘈嘈兮晨夜鳴落葉飄兮枯枝竦百草零  
兮覆畦壟時光逝兮今年易盡感彼歲暮兮悵自愍廓羈  
旅兮滯野都願御光風兮忽歸徂惟金石兮幽且清林  
鬱茂兮芳草盈元泉流兮縈丘阜閣館蕭寥兮蔭叢柳  
吹長笛兮彈五弦高歌凌雲兮樂餘年舒篇卷兮與聖  
談釋冤投紱兮希彭聃超逍遙兮絕塵埃福亦不至兮  
禍不來

序唐王勃梓潼南江泛舟序咸亨二年六月癸巳梓

潼縣令韋君以清湛幽凝鎮流靖俗境內無事艤舟於  
江潭縱觀於丘壑渺然有山林陂澤之思遂長懷悠想  
周覽極睇思其人則呂望藉茅於磻溪之陰屈平製芰  
於涪陽之浦覺瀛州方丈森然在目於是間以投壺讐  
以妙論亦有嘉穀旨酒鳴絃朗笛以補尋幽之致焉

又遊冀州韓家園序銅溝水北石鼓山東星辰當畢昴  
之墟風俗是唐虞之國雖接燕分晉稱天子之舊都而  
向街當衢有高人之甲第祥風塞戶瑞氣沖庭芳酒滿  
而綠水春朗月閒而素琴薦家童埽地蕭條仲舉之園  
長者盈門廓落東平之室梧桐生霧楊柳搖風眺望而

林泉有餘奔走而煙霞足用神龍起伏俱調鼎鑊之鳴  
滋鳳雌雄並入笙竽之奏高情壯思有抑揚天地之心  
雄筆奇才有鼓怒風雲之氣南庭興晚東徑陰生石髓  
拆而隱士歸玉山崩而野人醉王羲之之蘭亭五百餘  
年直至今人之賞石季倫之梓澤二十四友始得吾徒  
之遊陶陶然落落然則大唐調露之元年獻歲正月也  
**曾**畫漢李固與弟書固今年五十有七鬚髮已白所謂  
容身而遊滿腹而去周觀天下獨未見益州爾昔嚴夫  
子嘗言經有五涉其四川有九游其八欲類此矣  
**原**魏應璩與滿公琰書徒恨宴樂始酣白日傾夕驪駒就

駕意不宣展追惟耿介迄於明發適欲遣書會承來命  
知諸君子復有漳渠之會西有伯陽之館北有曠野之  
望高榭翳朝雲文禽蔽綠水沙場夷敞清風肅穆是京  
臺之樂也得無流而不反乎適有事務須自經營不獲  
侍坐良增悒悒 又與從弟君胄書間者北遊喜歡無

量登芒濟河曠若發蒙風伯埽涂雨師灑道按轡清路  
周望山野亦既至止酌彼春酒接武茅茨涼過大厦膚  
寸肴修味踰方丈逍遙陂塘之上吟詠苑柳之下結春  
芳以崇珮折若華以翳日弋下高雲之鳥餌出深淵之  
魚蒲且讚善便嬛稱妙何其樂哉雖仲尼忘味於虞韶



楚人流遜於京臺無以過也班嗣之書信不虛矣來還  
京都塊然獨處營宅濱洛困於囂塵思樂汶上發於寤  
寐昔伊尹輟耕郢惲投竿思致君於有虞濟蒸民於塗  
炭而吾方欲執耒於山陽沈縉於丹水知其不如古人  
遠矣然山甫不貪天地之樂曾參不慕晉楚之富亦其  
志也

**增**唐王績答馮子華書煙霞山水性之所適琴

歌酒賦不絕於時時遊人間出入郊郭暮春三月登於  
北山松柏羣吟藤蘿翳景意甚樂之箕踞散髮與鳥獸  
同羣醒不亂行醉不干物

**增**傳唐陸龜蒙甫里先生傳先生者不知何許人也人

見其耕於甫里故云性不喜與俗人交時乘一舟設蓬  
席齋一束書茶竈筆牀釣具權船郎而已人謂之江湖  
散人先生乃作江湖散人傳而歌之傳曰散人者散誕  
之人也心散意散形散神散既無羈恨為時怪民束於  
禮樂者外之曰此散人也人或笑之先生曰退若不散  
守名之筌進若不散執時之權筌可守耶權可執耶遂  
為散歌散詠以志其散 明鐵笛道人楊維禎自傳鐵  
笛道人者會稽人初號梅花道人會稽有鐵崖山其高  
百丈上有綠萼梅花數百植層樓出梅花積書數萬卷  
是道人所居也泰定間以春秋經學擢進士第仕赤城

令轉錢塘海鹽皆不信其素志輒棄官將妻子遊天目  
山放於宛陵毘陵聞雪中雲間山水最清遠又自九龍  
山涉太湖西泝大小雷之澤訪縹渺七十二峯東抵海  
登小金山脫烏巾冠鐵葉冠服褐毛寬博手持笛一枝  
自稱鐵笛道人 殷雲霄孫一元傳孫一元字太初關  
中人常入終南山繼入太白山嚼草木居息大石崖下  
時有所得赤脚散髮走山最高峰持古松根扣巨奇石  
而為歌歌曰餐蘭桂兮薜荔衣卧虎豹兮從蜺螭笑蒼  
雲兮胡不歸又歌曰悲萬役兮焉終乘元氣兮游無窮  
聊歸來兮山中自號太白山人云又嘗東入華南浮湘

漢登衡嶽祝融峰返嵩山渡汴謁闕里思孔子遺文依  
依不忍去遂上岱宗日觀峰觀夜半日出滄海中發狂  
大叫自以為奇偉復南徑吳入越探會稽禹穴訪天台  
石橋返遇石川殷雲霄於太湖語合意則渡楊子江來  
訪雲霄東海上與登孤山欄海門月餘別去 王貫洞

庭漁人傳洞庭漁人者華容孫宜仲可也踰冠舉於鄉  
凡五上而五困公車因罷不復應制而自以家洞庭更  
號洞庭漁人既有家世祿羨盡斥為園圃臺館亭榭之  
屬購異書名畫古器寔其中而奇卉怪木環之素嗜酒  
乃益釀酒客來過從者毋問貴賤輒留飲飲輒醉醉亦

不問客所嚮而其遇佳晨夕奉母兄從女弟燕游花竹  
間怡怡如也漁人間攜其子斯億及諸生黎學元劉世  
章輩游石門元頂諸湖山勝地遇羽人緇流能飲者即  
傾攜釀共之漁人既自命漁又不爲衣冠時時與樵青  
釣童狎亡異也 鵞池生傳鵞池生者姓宋氏名登春  
字應元趙郡新河人生壯歲顛髮即衰白因自號海翁  
人業以海翁稱之晚居江陵之天鵞池更號鵞池生宋  
氏故新河農家其先嘗累高貲生少失父母以亡嘗省  
家益貧然性嗜酒家貧不能長得酒則時時發憤讀古  
人書見前世結纓射書擊筑棄印諸賢豪急難奇節未

嘗不慷慨悲歌泣數行下也生始慕俠能挽強馳騎間  
出其餘智爲小詩輒自喜不欲以示人又稍稍通繪事  
師江夏吳偉鄰之父有頎而髯者生戲爲之貌絕肖父  
因勸生益習此可作生業何乃日沈酣落魄里中也生  
不應以是里中盡目爲狂生亡所知名年三十會一歲  
間妻子女五人俱相繼死生仰天歎曰咄嗟天乎將驅  
我於埃壘之外乎遂屏家於其兄而自囊書遠遊至博  
陵博陵有故所善客憐之餼之塾舍二年生默默不自  
得竟謝去去之京師日跨一蹇驢行長安道中往來覓  
詩方是時臨淄布衣謝添以詩遊公卿間聲籍甚生間

得其詩唾之曰作詩何為者而令七尺軀津津謏貴人  
丐活耶居京師月餘亡所遇又去之渤海入兗州登嶧  
山觀秦皇帝遺碑還居長白山一蕭寺出囊中故所貯  
漢魏盛唐名家詩閉關揣摩如是者三年頗窺作者之  
戶遂大放厥詞而於五言尤工眼駸駸白亡今人矣又  
去而浮淮海渡楊子江登北固山以望金陵鍾山紫氣  
過雲陽匍伏延陵季子祠下涉吳會訪錢塘天竺靈隱  
諸峰已復走徐青歸新河數日又去出居庸循太行山  
而西窮關陝澤潞諸邊塞其在井陘嘗居龍窩寺餅粟  
罄矣寺僧厭苦之生曰僧無窘我我試繪一小圖持至

市中當得粟已而果鬻粟五升伺粟不盡不更繪而市  
人爭欲得生繪則日擔粟詣寺門相聒生不能堪乃避  
至城外一山樓已由棧道入西川遊峩峩看山遡巫巴下  
荆鄂將達於潯陽返於黃迂雲夢而北走大梁偶憩釣  
州酒肆而釣州有党中丞者得其所題酒肆中絕句詩  
強致之家留數月復自宛涉襄過京山生所跨驢蹶於  
唐氏之淖傾其囊中書曝之衢唐氏異生所為要與之  
飲食歡相得也遂主唐氏一歲而行唐氏為刻其詩傳  
荆郢間更贈生二童子即生所呼為丹砂白石者生挾  
二童子轉江陵登王粲樓讀其賦感昔賢流寓地有終



焉之志始生數年前嘗至江陵居城西開元觀故遼王  
奇其詩名謁便殿生久在遼王所絕不與用事者比遼  
王常召生遊別宮聲妓滿前他客或故為調笑以悅遼  
王生第端坐竟日夜即飲至大醉目不流睨遼王益敬  
憚生每見生輒為斂容生之不及於難以此自遼王廢  
生不樂居江陵乃自攜少貲逍遙七澤間最後又還江  
陵遍謝其故所往來人而斥二童子姑去乃自童髮為  
頭陀不知其所之

**遺記**明表宏道西湖記虎林之西湖最盛為春為月一  
日之盛為朝煙為夕嵐每歲春雪甚盛梅花為寒所勒

杏桃相次開發尤為奇觀湖上由斷橋至蘇堤一帶綠  
煙紅霧彌漫二十餘里歌吹為風粉汗為雨羅紈之盛  
多於堤畔之草艷冶極矣然杭人遊湖止午未申三時  
其實湖光染翠之工山嵐設色之妙皆在朝日始出夕  
昏未下始極其濃媚月景尤不可言花態柳情山空水  
意別是一種趣味此樂留與山僧遊客受用安可為俗  
士道哉 又虎丘記虎丘去姑蘇城可七八里其山無  
高巖邃壑獨以近城故簫鼓樓船無日無之凡月之夜  
化之晨雪之夕遊人往來紛錯如織而中秋為尤勝每  
至是日傾城闔戶連臂而至衣冠士女下迨葭屋莫不

靚妝麗服重茵累席置酒交衢間從千人石上至山中  
櫛比如鱗檀板丘積樽壘雪瀉遠而望之如雁落平沙  
霞鋪江上雷輓電霍無得而狀布席之初唱者千百聲  
若聚蚊不可辨識分曹部署競以歌喉相鬪雅俗旣陳  
妍媸自別未幾而搖首頓足者得數十人而已已而明  
月浮空石光如練一切瓦釜寂然停聲屬而和者纔三  
四輩一簫一寸管一人緩板而歌竹肉相發清聲亮徹  
聽者魂銷比至夜深月影橫斜荇藻凌亂則簫板亦不  
復用一夫登場四座屏息音若細髮響徹雲際每度一  
字幾盡一刻飛鳥為之徘徊壯士聽而下淚矣劒泉深

不可測飛巖如削千頃雲得天池諸山作案巒巖競秀  
最可觴客但過午則日光射人不堪久坐爾文昌閣亦  
佳晚樹尤可觀面北平遠堂舊址空曠無際僅虞山一  
點在望堂廢已久

懷舊一

**原**尚書人惟求舊器非求舊惟新 **增**又古我先王亦

惟圖任舊人共政 **又**弗其耆長舊有位人 **又**今沖

子嗣則無遺壽考 **原**毛詩序友賢不棄不遺故舊則

民德歸厚 **論語**故舊不遺則民不偷 **又**與子太殊

懷舊二

原 嵇康高士傳商容有疾老子問之容曰子過故鄉而

下車知之乎老子曰非謂不忘故耶 左傳鄭子太叔

卒趙簡子為之臨甚哀曰黃父之會夫子語我九言

新序吳延陵季子使過徐徐君心欲得其寶劍弗忍言

季子心許之而未及與及還徐君已薨乃脫寶劍懸於

墓樹徐人奇之曰延陵季子不忘舊故脫千金之劍註

丘樹 禮記孔子之衛遇舊館人之喪入而哭之哀出

使子貢說驂而賻之子貢曰於門人之喪木有所說驂

說驂於舊館無乃已重乎夫子曰子鄉者入而哭之遇

於一哀而出涕子惡夫涕之無從也小子行之 漢書

高祖過沛置酒沛宮悉召故人父老曰遊子悲故鄉吾  
雖都關中萬歲之後我魂魄猶思家沛

**增**又樂布為

人畧賣於燕漢擊燕虜布彭越贖為梁大夫使於齊未  
反漢誅越梟首雒陽下詔有收視者輒捕之布還奏事  
彭越頭下祠而哭之吏捕以聞上趣烹之布曰項王所  
以不能遂西徒以彭王居梁地與漢合從苦楚也且垓  
下之會徵彭王項氏不亡天下已定漢一徵兵於梁彭  
王病不行而疑以為反臣恐功臣人人自危也請就烹  
上乃釋布

**原**又張蒼秦時為御史有罪亡歸及沛公

略地過陽武蒼以客從攻南陽蒼坐法當斬解衣伏贖

身長大肥白如瓠王陵乃言沛公赦勿斬蒼德王陵及  
貴父事陵陵死蒼為丞相洗沐常先朝陵夫人上食然  
後敢歸家 又朱邑惇篤於故舊性公平不可交以私

**增**

又云敞師事吳章平帝時王莽坐章要斬磔尸東

市門章為名儒弟子千餘人皆更姓名從他師敞時為  
司徒掾自劾吳章弟子收抱章屍斂葬之 後漢書鄭

弘字巨君師同郡焦贛楚王英謀反發覺引贛贛被收  
捕亡沒弘獨詣闕為贛訟罪顯宗覺悟赦其家屬 又

廉范受業博士薛漢會漢坐楚王事誅故人門生莫敢  
視范獨往收斂之吏以聞顯宗大怒召范入詰責問范

曰卿廉頗後耶與右將軍褒大司馬丹有屬乎范對曰  
褒臣之曾祖丹臣之祖也帝曰怪卿志膽敢爾因貫之  
由是顯名

**原**東觀漢記章帝幸東平祭東平王墓云

思其人到其鄉其處在其人亡皇甫謐高士傳徐穉

仁讓聞於天下黃瓊辟公府不詣及瓊薨負笈徒步三

千餘里到瓊墓致酌

**增**季漢書脂習字元升京兆人

中平中仕郡公府辟舉高第與少府孔融親善曹操為

司空威德日盛而融書疏倨傲習常責融欲令改節融

不從會融被誅當時許中百官先與融親善者莫敢收

恤而習獨往撫而哭之文舉卿捨我死我當復與誰語



者哀歎無已太祖聞之收習欲理之尋以其事直見原  
黃初詔欲用之以其年老然嘉其敦舊有樂布之節拜  
中散大夫 又曹操引軍攻袁譚於南皮王修時運糧  
在樂安聞譚急將所領兵及諸從事數十人往赴譚至  
高密聞譚死下馬號哭曰無君焉歸遂詣操乞收葬譚  
屍操欲觀修急默然不應修復曰受袁氏厚恩若得收  
斂譚屍然後就戮無所恨操嘉其義聽之曹公既誅袁  
譚梟其首令曰敢哭之者戮及妻子於是王叔治田子  
泰相謂曰生受辟命亡而不哭非義也畏死忘義何以  
立世遂造其首而哭之哀動三軍軍正白行其戮操曰

義士也赦之 晉書司馬昭收尚書王經誅之故吏向  
雄哭之哀鍾會誅雄復收葬之昭聞召而責之曰往者  
王經之死卿哭於東市而我不問今鍾會躬為叛逆而  
又輒收葬若復相容其如王法何雄曰王誅既加於法  
已備雄感義收葬教亦無闕何必使雄背死違生以立  
於時殿下讎枯骨而捐之中野為將來仁賢之資不亦  
惜乎昭悅與宴談而遣之 吳均齊春秋明帝不豫南  
康王琳於第賜死獨江秘守尸晝夜號泣悲動路人於  
時諸王並見誅剪故舊無敢瞻看惟秘及衡陽王子浚  
侍讀嚴植各為營理喪事時人高其節秘字子清濟陽

人也

陳書司馬暠字文昇承聖中除太子庶子江陵

陷隨例入關而梁室屠戮太子瘞殯失所暠以宗室乃

抗表周朝求還江陵改葬辭甚酸切周朝優詔答曰昔

王父從戮孔車有長者之風彭越就誅樂布得陪臣之

禮庶子鄉國已改猶懷送往之情始念忠貞方知臣道

即敕荊州以禮安厝北史魏神龜末清河王元懌領

太尉辟陽固從事中郎屬懌被害元又秉政朝野震竦

懌諸子及門生吏寮莫不慮禍隱避不出素為懌者彌

不自安固以常被辟命遂獨詣喪所盡哀痛哭良久乃

還僕射游肇聞而歎曰雖樂布王脩無以尚也君子哉

若人 唐書李綱字文紀周齊王憲引為參軍宣帝將  
害憲召僚屬證其罪綱誓之以死終無撓詞及憲遇害  
露車載屍而出故吏皆散惟綱撫棺痛哭躬自埋瘞哭  
拜而去憲女孀居子立綱自以齊王故吏贍恤厚甚及  
綱卒其女被髮號哭如喪所生焉 又王方翼有友趙

持滿誅死屍諸道親戚莫敢視方翼往哭具禮收葬金  
吾劾繫帝嘉之不罪 又徐晦進士擢第登直言極諫

授櫟陽尉皆自楊憑所薦及憑得罪貶臨賀尉交親無  
敢視送者獨晦送至藍田與憑言別故相權德輿與憑  
交分深知晦之行因謂曰今日送臨賀誠為厚矣無

乃為累乎晦曰晦自布衣受楊公之眷方茲流播爭忍  
無言而別如他日相公為奸邪所譖失意於外安得與  
相公輕別德輿嘉其真懇大稱之於朝不數日御史李  
夷簡請為監察晦白夷簡曰生平不識公門公何取信  
而見獎拔夷簡曰聞君送楊臨賀不顧犯難肯負國乎  
由是知名 又韓愈少為蕭穎士子存所知自袁州還  
過存廬山故居而諸子前死惟一女在為經贖其家  
孔帖唐李守德為武衛將軍常遇故主於道主走避之  
守德命左右迎之至第親上食奉酒主流汗不敢當數  
日入奏曰臣蒙國恩過分而故主無寸祿請解已官授

之帝嘉其志擢其主爲郎將 范陽家誌宋盧多遜門  
下上有種英蘇冠者平生最器重之被罪之後賓客雲  
散二人徒步送抵天津而還英後易名放即明逸冠易  
名易簡魁天下爲參知政事 宋史鄭伸客李崇矩門  
下險詖無行因上書誣告陰事太祖釋不問崇矩子繼  
昌性謹厚鄭伸蚤死其母嘗詣乞丐家人競前詐逐繼  
昌召見與白金百兩時人稱之 又李廌謁蘇軾於黃  
州贄文求知軾謂其筆墨瀾翻有飛沙走石之勢鄉舉  
試禮部軾典貢舉遺之賦詩以自責軾與范祖禹謀將  
同薦諸朝去國不果軾亡廌哭之慟中年絕進取意

又鮮于侁元豐二年召對命知揚州蘇軾自湖州赴獄  
親朋皆絕道揚侁往見臺使不許通或謂宜亟焚軾所  
往來書文以避侁曰欺君負友吾不忍惟以忠義分譴  
則所願也 又曾回與鄒浩友善皇后劉氏立浩將論  
之密告回回力贊且曰移孝爲忠亦太夫人素志也浩  
南遷人莫敢顧回斂交游錢與治裝且慰其母 又朱  
熹歿僞學禁方嚴門生故舊至無送葬者辛棄疾爲文  
往哭之 鴻書王鶚金正大元年進士第一人歷官尚  
書左右司郎中金亡將被殺張柔聞其名救之館於保  
州蒙古主在藩邸召對甚禮重之嘗因見請曰天兵克

蔡金主自縊其奉御絳山焚葬汝水之傍禮為舊君有  
服願往葬祭蒙古主義而許之至則為河水所沒具牲  
醴為位而哭元史金履祥事同郡王柏從登何基之  
門何基王柏之喪履祥率其同門士以義制服觀者始  
知師弟之繫於常倫也又元蔡子英館於儀曹忽一  
夜大哭不止人問之曰思舊主爾明祖知志不可奪送  
之出塞明獻徵錄王稔字叔豐受業方孝孺孝孺之  
及於難也稔周旋其間又至聚寶門外求孝孺遺骸不  
得坐逮繫文皇念其祖禱死國特宥免復購孝孺遺文  
為侯城集以傳人咸義之又劉淞與荆王太傅李九



標相善有一女杯酒修好未聘亡何李死女之母亦死  
淞告親友曰李君未許吾子吾猶當撫其孤女也矧言  
猶在耳乎遂迎女婚其子及李氏爭產太守汪以半予  
女餘分族人淞辭曰吾成盟為義也若分其產豈不反  
吾初心乎太守義之不強也 又杜環好周人急父友  
常允恭死其母張無所歸就環環贍養十三年將死舉  
手向環曰吾累杜君環具殯殮買地葬之歲時常祭其  
墓 明詞林人物考余應舉字德甫與徐中行宗臣友  
善應舉擢福建按察副使至閩值臣理學政而中行守  
汀甚喜詩筒還往不絕俄而臣病且死矣無子應舉傷

之躬為視含斂使其子斐經而受弔以其喪歸 又屠  
應峻字文升與袁袞聯名舉於鄉又同舉進士同讀書  
中秘特相親暱武庫灾袞下詔獄罪且不測應峻旦夕  
具壺餐潛餉遺獄中戍之日諸薦紳謂官校方偵邏莫  
敢送應峻獨匹馬出郊外握手別 又王世貞為刑部  
主事楊繼盛抗章劾嚴嵩專權誤國下獄世貞訪之獄  
中相共飲泣繼盛以其孤托之繼盛妻張氏上疏願以  
身代疏草出世貞竄削及繼盛死東市世貞親為含斂  
哭葬而遣一使護其喪歸世貞父司馬公忬在鎮聞之  
亦搥擊詈嵩嵩聞而切齒日夜謀所以阱公父子逮忬

下詔獄世貞急解官奔赴闕下將求代死忤急止之是  
速吾死也忤竟伏法

### 懷舊三

**原** 蔡原仲

奉呂公

傳季友如陳蔡原仲仲季友之舊也漢婁護字君卿有故人呂公

無子歸護護身與呂公妻呂嫗同食及寢居妻子頗厭護流涕責曰呂公以故舊老窮寄身於我義所當奉遂

養呂公終身

**增** 求故劍

哭亡簪

漢宣帝既立霍光欲以女為后帝詔求微時故

劍遂以許氏為皇后於澤中問之曰刈著薪亡吾舊簪吾所以悲不忘故也

名伯甘棠

魏徵故笏

名伯徵後人思其德故愛其樹聽政後人思其德故愛其樹

而不忍傷也

唐史詔問魏徵五代孫暮書詔頗有存

否暮對惟故笏在詔令上送郵覃曰在人不在笏帝曰此笏乃今

之甘棠

麥秀之歌

黍離之詠

箕子朝周過殷墟作麥秀之歌同人

聞之皆為流涕 周既東遷大夫行役宗周見故宗廟宮室盡為禾黍遂作黍離之詩 閱周室之顛覆也

### 懷舊四

**原久要**

論語久要不忘平生之言

**半面**

半面之故

**不棄**

周公謂魯公曰故舊無大

故則不棄也

**不慢**

周禮太宰以八統馭萬民二曰敬故謂不慢舊

**無消息**

又故人漸遠無消息古寺空來有姓名

**增記**

疇昔蘇軾

詩寒燈相對記疇昔夜雨何時聽蕭瑟

**錢塘如此**

又憶在錢塘正如此回頭四十二年非

**蠶市非故**

又蠶市光陰非故國

馬行燈火記當年

### 懷舊五

**蜀詩** 晉曹摅感舊詩 富貴他人合 貧賤親戚離 廉蔣門

易軌 田實相奪 移晨風 集茂林 栖鳥去 枯枝今 我惟困

人部

蒙羣士背背馳鄉人敦懿義濟濟蔭光儀對賓頌有客  
舉觴詠露斯臨樂何所歎素絲與路岐

**原**齊謝朓懷

故人詩芳洲有杜若可以贈佳期望望忘超遠何由見  
所思我行未千里山川已間之離居方歲月故人不在  
茲清風動簾夜孤月照窗時安得同攜手酌酒賦新詩

**增**

梁昭明太子宴闌思舊詩孝若

明山

信儒雅稽古

文敦淳茂公

治到

實俊朗文義縱橫陳佐公

陸

持方介才

學罕為鄰灌蔬

殷

實溫雅摘藻每清新余非狎異者惟

舊且懷仁綢繆似河曲契闊等漳濱如何離災盡眇漠  
同埃塵一起應劉念泣泣欲沾巾

**原**

梁沈約懷舊詩

元長秉奇調弱冠慕前蹤眷言懷祖武一篲望成峰途

艱行易跌命舛志難逢折風落迅羽流恨滿青松

傷王融

又詩曰吏部信才傑文鋒振音響調與金石諧思逐

風雲上豈言陵霜質忽隨人事往尺璧爾何寃一旦同

丘壤

傷謝朓

又詩曰左率馥時譽秀出冠朋僚聳茲干

仞氣振此百尋條蘊藉含文雅散朗溢風飈楸櫝今已

合容範尚昭昭

傷庾杲之

又詩曰長史體間任坦蕩無外

求持身非詭遇應物有虛舟心從朋好盡形為歡宴留

歡宴未終畢零落委山丘

傷王湛

又詩曰東南旣擅美

洛陽復稱才攜手同歡宴比迹共追陪事隨短秀落言

人部

懷舊

歸長夜臺

傷虞炎

又詩曰少府懷貞節忘軀濟所奉吏

道勤不息繁文長自擁旣闕優孟歌

傷李珪之

又詩曰韋叟識前載博物備戎華秘驂止營校淪跡

委泥沙始知庸聽局方悟大音

傷韋景猷

又詩曰處和

無近累天然有勝質蕭瑟負高情耿介懷秋實義貴良

為重蘭摧非所恤一罷平生言寧知攜手日

傷劉

又

詩曰豫州懷風範綽然標雅度處約志不渝接廣情無

忤頡頏事刀筆紛綸遞朱素美志同山河浮年逼朝露

傷胡

**增**唐蘇頲奉和姚令公溫湯舊館永懷古人盧

公之作樹德豈孤邁降神良並出偉茲廊廟楨調彼鹽

梅寔正悅虞垂舉翻悲鄭僑卒同心不可忘交臂何爲  
失清路荷前幸明時稱右弼曾聯野外遊尚記帷中密  
新慟情莫遣舊游詞更述空令還和辱長感知音日

李白對酒憶賀監詩四明有狂客風流賀季真長安一

相見呼我謫仙人昔好杯中物今爲松下塵金龜換酒  
處却憶淚沾巾 又詩曰狂客歸四明山陰道士迎敕

賜鏡湖水爲君臺沼榮人亡餘故宅空有荷花生念此

杳如夢淒然傷我情 又詩曰託陰當樹李忘憂當樹

萱他日見張祿緜袍懷舊恩 杜甫懷舊詩地下蘇司

業親情獨有君那因喪亂後便有死生分老罷知明鏡



悲來望白雲自從失詞伯不復更論文 韋應物張彭

州前與緱氏馮少府各惠寄一篇多故未荅張已云沒

因追哀敘事兼遠簡馮生詩君昔掌文翰西域復石渠

朱衣乘白馬輝光照里閭余時忝南省接讌媿空虛一

別守茲郡蹉跎歲再除長懷關河表永日簡牘餘郡中

有方塘涼閣對紅蕖金玉蒙遠貺篇詠見吹噓未荅平

生意已沒九原居秋風吹寢門長慟涕漣如覆視絨中

字奄為昔人書髮鬢已云白交友日彫疎馮生遠同恨

憔悴在田廬 柳宗元段九秀才處見亡友呂衡州書

迹詩交似平生意最親衡陽往事似分身袖中忽見三

行字拭淚相看是故人  
劉禹錫徵還京師見舊番官  
馮叔達詩前者匆匆僕馬行  
十年顛顛到京城南宮舊  
史來相問何處淹留白髮生  
李德裕漢州日夕遊房  
公西湖詩丞相鳴琴地何年  
黠玉徽偶因徵月夕重敞  
故樓扉桃李蹊空在芙蓉客  
暫依惟憐濟川楫長與夜  
舟歸宋又詩曰晚日臨安渚  
微風發櫂謳鳳城波自闊  
魚水運難留亭古思宏棟  
川長憶濟舟想公高世志  
祇似化城遊  
孟郊李少府廳弔李元賓遺字詩  
零落三四字忽成千萬年  
那知冥冥客不有補亡篇  
斜月弔空壁旅人難獨眠  
一生能幾時百慮來相煎  
戚戚故交淚

幽幽長夜泉已矣難重言一言一潸然 韋莊饒州餘

于縣琵琶洲感舊詩琵琶洲水斗牛星鸞鳳曾於此放  
情已覺地靈因昴降更聞川媚有珠生一灘紅樹留佳  
氣萬古清絃續政聲戟戶盡移天上去里人空說舊簪  
纓 宋孔武仲與陳董二君相會於真州經月甚樂詩

寄董陳君兼感存没平生交友半成塵想見當年樂會  
文別淚茫茫添海水愁懷黯黯塞江雲青衫脫去誰同  
老白首追隨尚有君官暇更將棋子學他時籌局當功  
勲 王安石悼四明杜醇詩杜生四五十年孝友稱鄉里  
隱約不外求耕桑有妻子藜杖牧雞豚筠筒釣魴鯉歲

時沽酒歸亦不乏甘旨天涯一杯飯夙昔相逢喜談辭  
足詩書篇詠又清泚都城問越客安否常在耳日月未  
渠央如何棄予死古風久凋零好學少爲已悲哉四明  
山此士今已矣李觀客有話故丁秘監京師舊宅因  
而傷之詩曰等閒榮謝已愁聞況話三公極寵身青史  
尚爲今世事朱門不是舊時人文章散入諸蕃口花藥  
留添上國春生死交情渾易見有誰過此爲露巾程  
俱九月七日夜夢王元規詰旦其弟元矩適相訪感而  
作詩故人入幽夢彷彿平生懷心知九泉隔意象慘不  
開哦詩不成章慙愧誰能裁曰此蕭爽士寧當沒黃埃

清晨客在門乃自烏衣來典刑見難弟共歎一息乖幽  
明不可詰此夢何爲哉回觀南園道微徑已蒿萊 朱  
熹拜張魏公墓下詩衡山何巍巍湘流亦湯湯我公獨  
何往劔履在此堂念昔中興初孽豎倒冠裳公時首建  
義自此扶三綱精忠貫宸極孤憤摩穹蒼元戎二十萬  
一旦先啓行西征奠梁益南轅撫江湘士心旣豫附國  
威亦張皇縞素哭新宮哀聲連萬方黠虜聞號魄經營  
久徬徨玉帛驟往來士馬且伏藏公謀適不用拱手遷  
南荒白首復來歸髮短丹心長拳拳冀感格汲汲勤修  
攘天命竟難諶人事亦靡常悠然謝台鼎騎龍白雲鄉

坐令此空山名與日月彰千秋定軍壘岌業遙相望賤  
子來歲陰列風振高岡下馬九頓首撫膺淚淋浪山顏  
今幾年志士日慘傷陸游紹興辛未至丙子六年間  
予年方壯每遇重九多與一時名士登高於戴山宇泰  
閣距開禧丁卯六十年憂患契闊何所不有追數同遊  
諸公乃無一人在者而予猶強健慘愴不能已賦詩識  
之故里登高接雋遊即今不計幾番秋一樽尚與菊花  
醉萬事不禁江水流薄命雖多死間巷逢時亦有至公  
侯若論耄歲朱顏在窮達皆當輸一籌劉克莊哭楊  
吏部通老詩白首除郎已晚哉民間桑柘手親栽蓋棺

只著深衣去行李空擔語錄廻主祭遺孤猶未冠著書  
殘橐漫成灰可憐薄命飄飄客虛事江西幕府來 元  
成廷珪吳中五日追念故友李時中李欽嗣有感而作  
曰夢繞南岡北嶺雲一杯無計灑松筠世間我豈長貧  
者地下君爲不死人夜雨自荒張祐宅秋風誰障庾公  
塵於今友道俱凋喪落日江湖淚滿巾 叟端維故人  
別墅詩曰門徑無塵有綠苔東風落日舊曾來白頭道  
者今何在一樹櫻桃花自開 趙半閒憶友人李雲南  
詩送客出荆扉忽見青青草故人別經時恍隔千里道  
千里固不遙咫尺夢難到孤鳥安朽株行雲在晴昊敢

歎會無期坐念春風老 明李夢陽追舊寄徐子詩憶

昔相逢雪滿途遥憐爲客向江湖看碑定憶羊開府作  
賦先投楚大夫日黑魚龍壓夢澤草青麋鹿上姑蘇空  
回玉軫思流水不得驂騑見故都 高攀龍七哀詩肅

肅秋風深漫漫秋夜長中夜百感集攝衣步空堂俯聽  
蟲聲悲仰視明月光物色一如昨舊人何茫茫歲月日  
以踈髣髴日以亡一朝成永訣千載空相望靜心易生  
哀遺情難爲方願從夢中路抽身至其旁

**增**賦魏王粲思友賦登城隅之高觀忽臨下以翱翔行  
遊目於林中觀舊人之故場身旣沒而不見餘迹存而



未喪滄浪浩兮迴流波水石激兮揚素精夏木兮結莖  
春鳥兮愁鳴平原兮泱泱綠草兮蘿生超長路兮逶迤  
實舊人兮所經身既逝兮幽翳魂眇眇兮藏形

**原**晉

向秀思舊賦予與嵇康呂安居止接近其人並有不羈  
之才嵇康志遠而疎呂安心曠而放其後各以事見法  
嵇博綜技藝於絲竹特妙臨當就命顧視日影索琴而  
彈之逝將西邁經其舊廬鄰人有吹笛者發聲寥亮追  
想曩昔遊宴之好感音而歎故作賦云將命適於遠京  
遂旋返而北徂濟黃河以汎舟經山陽之舊居踐二子  
之遺迹歷窮巷之空廬惟古昔以懷人心徘徊以躊躇

棟宇存而弗毀形神逝其焉如昔李斯之受罪歎黃犬  
而長吟悼嵇生之永辭顧日影而彈琴託運遇於際會  
寄餘命於寸陰聽鳴笛之慷慨妙聲絕而復尋停駕言  
而將邁遂援翰而寫心 潘岳懷舊賦予十二而獲見  
於父友東武戴侯楊君遂申之以婚姻而道元公嗣亦  
隆世親之愛不幸短命父子凋殞予尋役於外不歷嵩  
丘之山者九年於茲矣今而經焉慨然懷舊乃作賦曰  
仰睇歸雲俯鏡泉流前瞻太室旁眺嵩丘東武託焉建  
瑩啟疇巖巖雙表列列有秋予總角而獲見承戴侯之  
清塵名予以國士眷予以嘉姻自祖考而隆好逮二子

而世親歡攜手以偕老庶報德之有鄰今九載而來歸  
空館聞其無人陳芟被於堂除舊圃化而為薪步庭廡  
以徘徊涕泣流而沾巾

**增**梁江淹傷友人賦僕之神

交者有陳郡袁炳焉有逸才有妙賞博學多聞明敏而  
識奇異僕以為天下絕倫黯與秋草同折今不復見矣  
乃為辭曰泣然沾衣兮悲袁友之英秀輟四代而式昌  
洎十葉而克茂友人之生川岫降明峻調迴韻惠志聰  
情侷儻遠度寂寥靈素文攀淵卿史類遷固譬如冬雪  
既潔將似秋月至徹乃上代而少雙故叔世而曠絕弔  
意若之暫芳慟琬琰之永闕披圖兮照籍抽經兮閱史

共檢今洛書同析今河紀既思遊今百說亦窮精今萬  
里愛詩文之綺發賞賦艷之錦起爾湘水兮深沈我前  
山兮眇默惟音華與書酒伊楚越兮南北余結誼兮梁  
門復從官兮朱藩何人遙而困阻而天道之匪存凋碧  
玉之神樹銷紫石之靈根永遠書於江濫結深痛於爾  
魂唐岑參感舊賦參相門子五歲讀書九歲屬文十  
五隱於嵩陽二十獻書闕下嘗自謂雲霄坐致青紫俯  
拾金盡裘敝蹇而無成豈命之過與國家六葉吾門三  
相矣江陵公爲中書令輔太宗鄧國公爲文昌右相輔  
高宗汝南公爲侍中輔睿宗相承寵光繼出輔弼易曰

物不可以終泰故受之以否逮武后臨朝鄧國公由是  
得罪先天中汝南公又得罪朱輪翠轂如夢中矣今王  
道休明世業淪替猶欽若前德將施於後人參年三十  
未及一命昔一何榮矣今一何悴矣直念昔者爲賦云  
天命我唐始滅暴隋挺生江陵傑出輔時爲國之翰斯  
文在茲一入麟閣三遷鳳池調元氣以無忒理蒼生而  
不虧典絲言而作則闡綿蕝以成規捧堯日以雲從肩  
舜風而草靡洋洋乎今問不已繼生鄧公世實須才盡  
忠致君極武登台朱門復啟相府重開川換新檝羹傳  
舊梅何糾纏以相軋惡高門之禍來當其武后臨朝奸

臣竊命百川沸騰四國無政既破我室又壞我門上帝  
懵懵莫知我冤泣賈誼於長沙痛屈平於湘沅夫物極  
則變感而遂通於是日光迴照於覆盆之下陽氣復煖  
於寒谷之中上天悔禍贖我伯父爲邦之傑爲國之輔  
又治陰陽更作霖雨伊廊廟之故事皆祖父之舊矩朱  
門不改畫戟重新暮出黃閣朝趨紫宸繡轂照路玉珂  
驚塵列親戚以高會沸歌鐘於上春無小無大皆爲縉  
紳嗟乎一心弼諧多樹綱紀羣小見醜獨醒積毀鑠於  
衆口病於十指由是我汝南公復得罪於天子當是時  
也偏側崩波蒼黃反覆去鄉離土隳宗破族雲雨流離

江山放逐愁見蒼梧之雲泣盡湘潭之竹或投於黑齒  
之野或竄於文身之俗嗚呼天不可問莫知其由何先  
榮而後悴曷曩樂而今憂嗟予生之不造常恐墮其家  
猷無負郭之數畝有嵩陽之一丘幸逢時主之好文不  
學滄浪之垂釣我從東山獻書西周出入二郡蹉跎十  
秋多遭脫輻累遇焚舟雪凍穿履塵緇弊裘嗟世俗之  
其阻恐歲月之不留睠城闕以懷歸將欲返雲林之舊  
遊 明王寵感舊賦正德辛未余師事林屋先生於包  
山精舍凡再閱暑寒而退迄今庚辰八年於茲矣乃復  
來山中作感舊賦紛余慕夫好修兮潛大道以遊神游

江河之浩漾兮悵欲渡而無津彼哲匠之巍巍兮揭日月於八垠折蔬麻之瑤華兮將以贈夫斯人亟愴怛而仰鑽兮又靡知其所止紛蚪龍之下上兮尺蠖蜷旋於泥滓車旣殆而馬煩兮阻山川而徙倚忽日月之我適兮去冉冉而不已經疇昔之故居兮志欲憾而顛泚澣淹留以無成兮將復修吾初服佩長劔之陸離兮冠切雲而轟轟民生各有所樂兮放吾道於空谷吸朝霞以爲漿兮夕復飡於秋菊苟矩矱之猶存兮冀來者之可追吾令羲和弭節兮將以窮乎我師路漫漫其阻修兮殫吾生以求之亂曰驂騑斯皇莫予好也洵彼前修爲



我導也海嶽嶄巖何當造也長夜漫漫志懣躁也矢心  
白日遵長道也

**原銘**周庾信思舊銘歲次攝提星居鶉首梁故觀寧侯  
蕭永卒嗚呼哀哉人之戚也既非金石所移士之悲也  
寧有春秋之異高臺已傾稷下有聞琴之泣壯士一去  
燕南有擊筑之悲項羽之晨起帳中李陵之徘徊岐路  
無假窮秋於時悲矣况復魚飛武庫豫有棄甲之徵鳥  
伏狄泉先見橫流之兆星紀吳亡庚辰楚滅原隰載馳  
輟轅長往甲裳失矣舳艫棄焉河流酸棗杞梓與樗櫟  
俱陳海淺蓬萊魚鼈共蛟龍並盡燃香複道詎斂冤魂

載酒屬車寧消愁氣芝蘭蕭艾之愁形殊而並悴羽毛  
鱗介之怨聲異而俱哀幕府昔開俊賢翹首爲羈終歲  
門人謝焉及乎東首告辭西陵長往山陽車馬永別郊  
門潁川賓客遙悲松路嵇叔夜之山廬尚多楊柳王子  
猷之舊徑惟餘竹林王孫葬地方爲長樂之宮烈士埋  
魂即是將軍之墓昔嘗歡宴風月留連追憶平生宛然  
心目美酒酌焉猶思建業之水鳴琴在操終念華亭之  
鶴重爲此別嗚呼甚哉麟亡星落月死珠傷餅磬壘恥  
芝焚蕙歎所冀鐘沈德水聲出風雲劍沒豐城氣連牛  
斗潸然思舊乃作銘曰風雲上慘舟壑潛移駸駸霜路

君子先危紀侯大去懷王不反玉樹長埋風流遂遠荀  
卿故縣慶封餘邑萬里傷魂修門詎入城連武庫山枕  
盧龍思歸道遠反葬無從徒留送雁空靡長松疇昔寵  
貴慘舒語默託情嵇琴風雲相得有酒如澗終溫且克  
朝陽落鳳大野傷麟佳城鬱鬱流寓於秦山陽相送惟  
餘故人孀機婺緯獨鶴孤鸞閨深夜靜風月俱寒生平  
已矣懷故何期匣中絃斷鄰人笛悲昔爲幕府今成總

帷

**原序**梁元帝懷舊志序吾自北狩琅臺東採禹穴觀濤  
廣陵面金湯之設險方舟宛委眺玉笥之干霄臨水登

山命儔嘯侶中年承乏攝牧神州戚里英賢尚冠髦俊  
陰真長之弱柳觀茂弘之舞鶴清酒繼進甘果徐行長  
安郡公爲其延譽扶風長者制其羽毛於是駐伏熊廻  
駟馬命鄒湛名王祥余顧而言曰斯樂難常誠有之矣  
日月不居零露相半素車白馬往矣不追春華秋實懷  
哉何已獨軫魂交情深宿草故備書爵里陳懷舊焉

**書**梁朱瑒致陳僕射徐陵求王琳首書

南史梁王琳舉義爲陳將

吳明徹所殺傳首建康縣之於市琳故吏朱瑒致書徐陵求琳首陵嘉其志節又明徹亦數夢琳求首並爲故陳主而許之曰竊以典午將滅徐廣爲晉家遺老當塗已謝

馬孚稱魏室忠臣梁故建寧公琳輕身殉主以身許國

徒蘊包胥之念終溝萇弘之青致使身沒九泉頭行千里身首異處封樹靡卜瑒早造末僚豫參下席降薛君之吐握荷魏公之知遇是用沾巾兩袂痛可識之顏回腸疾首切猶生之面伏惟聖恩博厚明詔爰發赦王經之哭許田橫之葬瑒雖芻蕘竊亦有心琳經蒞壽陽曾游江右願歸彼境還修窀穸孤墳旣築或飛銜土之鶯豐碑式樹時留隋淚之人近故舊王綰等已有論牒仰蒙制議不遂所陳昔廉公告逝即淝川而建塋域叔孫云亡仍芍陂而植楸櫨由比言之抑有其例不使壽春城下惟傳報葛之人滄洲島上獨有悲田之客昧死

陳析伏待刑憲

恤孤一

**禮**書無弱孤有幼禮記七年曰悼悼與耄雖有罪不加刑焉又春饗孤子又月令曰養幼少存諸孤周禮司刺掌三赦一赦曰幼弱大學上恤孤而民不倍家語孔子曰恤孤則惠

恤孤二

**增**史記晉趙朔為屠岸賈攻滅有遺腹子朔夫人置兒袴中得脫朔客公孫杵臼程嬰取他人兒衣以文祿匿山中嬰謬曰吾知嬰兒所在諸將隨之杵臼繆曰趙氏

孤兒何罪請活之諸將殺杵臼與孤兒然真兒乃反在  
嬰匿十五年因韓厥立之是爲趙武程嬰自殺 越語  
勾踐命將免者以告生丈夫二壺酒一犬生女子二壺  
酒一豚生三人公與之母生二人公與之餼當室者死  
三年釋其政支子死三月釋其政必哭泣葬埋之如其  
子令孤子寡婦疾疢貧病者納宦其子勾踐載稻與脂  
於舟以行國之孺子之遊者無不餽也無不歡也必問  
其名 前漢何武傳李善字次孫南陽人本李元蒼頭  
元盡室疫死惟孤兒續始生數旬而貲財巨萬諸奴欲  
謀續分其財善潛負續出亡隱瑕丘界中親自乳哺及

長訴叛奴於官悉殺之瑕丘令鍾離意上書以聞光武  
拜善及續並太子舍人 後漢書任棠字季卿秦州人

隱居授學有奇節太守龐參下車首謁之棠不與語但  
以薤一大本水一盂置戶屏間自抱兒孫伏戶下參沈  
思良久曰水者欲吾清也拔大本薤者欲吾擊強宗也  
抱兒當戶欲吾開門恤孤也歎息而還 列女傳李文

姬趙伯英妻李固女賢而有智聞父危泣曰李氏滅矣  
密與二兄謀豫藏弟燮頃之郡收固三子二兄受害文  
姬乃告父門生王成曰君執義先公有古人之節今以  
六尺委君李氏存滅在此矣遂變服入徐而成賣卜於



市陰相往來比變赦還文姬相對而慟因戒之曰先公  
正直為漢忠臣雖死之日猶生之年慎勿以一言加梁  
氏聞者悲感 三國志諸葛亮伐魏馬謖違亮節制敗  
於街亭亮揮淚而斬之遂收恤其子 晉書紀瞻少與  
陸機兄弟親善及紀被誅瞻恤其家周至及嫁女資送  
同於所生 又鄧攸遇賊步走擔其兒及弟之子度不  
兩全謂妻曰吾弟惟一子理不可絕當棄我兒後當有  
子妻泣從之其子朝棄暮及攸繫於樹而去後妻不復  
孕語曰天道無知使鄧伯道無兒 魏書張普惠不營  
財業好有進舉敦於故舊冀州人侯堅固少時與共遊

學早終其子長瑜普惠每於四時請祿無不減贍給其  
衣食 唐書桂州都督李洪節以清慎顯既沒其家實  
珠太宗疑洪節實貪欲追坐舉者魏徵曰陛下過矣且  
今號清白不變者屈突通張道源通二子來調共一馬  
道源子不能自存審其清者不加恤疑其濁者罪所舉  
亦好善不篤矣 又孟簡性俊拔尚義早歲交友先沒  
者視其孤每厚於周卹議者以爲有前輩風 新唐書  
錢徽與薛正倫魏弘簡善二人前死徽恤其孤至媵嫁  
成立 又韓愈凡內外親若交友無後者爲嫁孤女而  
卹其家嫂鄭喪爲服期以報 唐書盧鈞爲嶺南節度

使自貞元已來衣冠得罪流放嶺南者因物故子孫貧  
悴雖遇赦不能自還凡在封境鈞減俸錢爲營槨槨其  
家疾病死喪則爲之醫藥殯殮孤兒稚女爲之婚嫁凡  
數百家 宋史党進少給事魏帥杜重威子孫有貧困  
者進分俸給之士大夫或有愧焉 又陳希亮少與鄉  
人宋輔遊輔卒養其母以女妻其孤端平使同諸子學  
卒第進士 又王濟字巨川少時深州刺史念金鎖一  
見器之且託後於濟金鎖沒撫其子援寘祿仕 又魏  
揆之嘗客衢守章傑所趙鼎謫死其子汾將喪過衢傑  
恨鼎又希秦檜意遣尉翁蒙之掩取鼎故舊簡牘蒙之

先告汾焚之一無所得傑怒治蒙之拘汾揆之以書責  
傑長揖徑歸 又嚴世期山陰人同里張邁三人妻子  
各產子時歲饑儉慮不相存欲棄不舉世期間之馳往  
拯救分食解衣以贍其乏三子並得成長 又陳規嘗  
為女求從婢得一婦甚閒雅怪而詢之乃雲夢張貢士  
女也即輟女奩嫁之 又元兵次近郊宋丞相吳堅賈  
餘慶檄天下以城降家鉉翁獨不署文天祥女弟坐兄  
故繫奚官鉉翁傾橐贖出之以歸其兄璧 明獻徵錄  
林興祖有雅度終日端坐人未嘗見其疾言遽色事孤  
姊如母訓育孤甥如子卒致有立其友張禮聞為學政

死濱州子政孤弱不能歸興祖至廣西召與其子同學  
業成厚贖遣歸後政亦致通顯

### 恤孤三

**原置產業**

**封分邑**

張裔字君嗣與楊恭善及恭早死遺孤未成人裔迎與分屋居事恭

母恭子長為娶置產業使立門戶矜恤故舊賑贍衰宗

行義至甚也魏曹真字子丹少與宗人曹遵鄉人朱

讚並事太祖二人早亡真乞分所食邑封遵六子託

詔褒美各分邑封二人子為關內侯食邑百戶

**妻子** 撫遺孤 後漢朱暉同郡張堪素有名稱嘗於太

妻子相託堪卒妻子貧暉候視賑贍之魏崔琰篤

友人公孫方宋階早死琰撫其遺孤恩若己子篤

**厚兄孤** 教養虎子 毛玠居位布衣蔬食撫兄孤子甚

子幼孫權收養官中教讀書十日一乘鞍山公撫嵇

馬會羣臣嘗召統子出示之曰吾家虎子

紹 王成 匿 李燮 嵇康臨刑謂子紹曰山公在汝不孤矣後簡薦為秘書丞李燮字德公固初下獄知禍不免乃命徐州傭酒家酒家知非常人也 隨父門生王成乃亡命徐州傭酒家酒家知非常人也 妻以女梁冀誅遇赦還里王成卒 變四時設位而哭之官河南尹

恤孤四

**原**字孤 字人 養之羽林 羽林孤兒

託孤 尺可以託六 給孤園 須達多長者常施孤獨於此園為佛說法處

**增**羽林兒 從軍死事者之子孫

淵鑑類函卷三百八

漢書卷之六

漢書卷之六

漢書卷之六

漢書卷之六

漢書卷之六

漢書卷之六

漢書卷之六

漢書卷之六

淵鑑類函卷三百九

一人部六十八

施惠  
慶遺

施饋  
慶賀

施惠一

**增**周易見龍在田德施普也雲行雨施天下平也

**原**

又君子以施祿及下 又君子以裒多益寡稱物平施

又君子以振民育德

**增**尚書大傳老而無妻謂之

鰥老而無夫謂之寡幼而無父謂之孤老而無子謂之  
獨行而無資謂之乏居而無食謂之困此皆天下之至  
悲哀而無告者故聖人在上君子在位能者任職必先  
施此無使失職 **原**書用敷錫厥庶民 又先王子惠

人部

淵鑑類函卷三百九

施惠



困窮

**增**又惠鮮鰥寡

**原**又散鹿臺之財發鉅橋之

粟大賚於四海而萬姓悅服

**增**曲禮積而能散

周

禮鄉師以歲時巡國及野而闕萬人之難阨以王命施

惠又遺人掌其委積以待施惠

**原**左傳在禮家施

不及國

**增**傳施取其厚斂從其薄

**原**論語以與爾

鄰里鄉黨

**增**又君子惠而不費

又周有大賚善人

是富

**原**又子貢曰如有博施於民而能齊衆何如可

謂仁乎子曰何事於仁必也聖乎

**增**孟子分人以財

謂之惠

荀大略樂分施而恥積藏

劉長卿詩傾家

共人費

蘇軾詩不辭毛粟施行自丘山積

又仰荷

天地德

施惠二

**增**左傳子西曰昔闔廬有國天有災厲親巡孤寡而供其乏困在軍熟食者分而後敢食 賈誼新書楚昭王當房而立愀然有寒色是日也出府衣裘以衣寒者出倉之粟以賑饑者二年吳襲郢當房賜者請還戰死

呂覽魯國之法魯人爲人臣妾於諸侯有能贖之者取其金於府子貢贖魯人於諸侯不受金子曰賜失之矣自今以往魯人不贖人也 列子衛端木叔者子貢之世也藉其先賢家累萬金奉養之餘先散之宗族次散

之邑里乃散之一國行年六十氣幹將衰棄其家事都散其庫藏珍寶車服妾媵一年之中盡焉及其病也無藥石之儲及其死也無埋葬之資一國之人受其施者相與賦而藏之反其子孫之財焉禽滑釐聞之曰端木叔狂人也辱其祖矣段干生聞之曰端木叔達人也德過其祖矣 史記范蠡之陶為朱公十九年之中三致千金散與貧疏兄弟 戰國策馮驩貧乏為孟嘗君客為君收債於薛將行問市何物曰視吾家寡有者市之驢至薛諸負債者悉來合券訖悉焚之矯命以債賜諸民民稱萬歲還問何市而返驢曰奉君之命市君家寡

有者君之府藏盈集所寡有者義爾臣召諸債者合券而焚之市義而歸矣君曰諾先生休矣 又齊襄王立田單相之過淄有老人涉淄而寒出不能行單解裘而衣之王乃賜單牛酒召而揖於庭勞之布令求百姓之飢寒者收穀之使人聽於閭里聞大夫相與語曰單之愛人乃王之教也 漢書吳楚反竇嬰爲大將軍賜金千斤嬰言袁盎欒布諸名賢士在家者進之所賜金陳廊廡下軍吏過輒令財取爲用金無入家者 又李廣歷七都太守前後四十年得賞賜輒分其麾下飲食與士卒共之家無餘財終不言生產事 又蘇武爲右曹

典屬國所得賞賜盡以施與昆弟故人。又疏廣與兄子受上疏乞骸骨上許之加賜黃金二十斤皇太子贈以五十斤既歸鄉里樂與鄉黨宗族共饗其賜於是族人悅服。又樓護為諫大夫使郡國護假貸多持幣帛至齊上書求上先人家因會宗族故人各以親疎與束帛一日散百金之費。漢記梁商常云多藏厚亡為子孫累每租奉及兩宮賞賜便置中門外未嘗入藏悉分與昆弟中外因年穀貴多有餒者輒令蒼頭以牛車致米鹽茶鐵於四城門與貧民不告其姓名。又張儉資討董卓以百姓饑荒乃傾竭財產與邑里共之賴其存

者以百數

**原**

後漢書馬援扶風茂陵人轉遊隴漢間

謂賓客曰丈夫為志窮當益堅老當益壯因處田牧有牛馬羊數千頭穀萬斛既而歎曰凡殖貨財貴能施賑也否則守錢虜爾乃盡以盼昆弟故舊身衣羊裘皮袴

**增**

又王丹字仲回京兆人王莽時連徵不至家累千

金隱居養志務施周急

又崔駰學於太學而糧盡鄧

衛尉欲餼焉而未果李彥九歲以其父命往見衛尉曰施不必豐期於救乏崔生臣父之執也不幸而貧公許賑之有日矣嘉貺未至或欲豐之然後乃至之乎若曰家物少須租入是猶古人欲決河海以救牛蹄之類也

人部

增補類函卷三十九

施惠

日

鄧公曰諾

又趙溫字子恭爲京兆郡丞棄官去遭歲

大饑散家糧以賑窮餓所活萬餘人

又劉翊字子相

潁川人家世豐產常能周施而不有其惠黃巾賊起郡

縣饑荒翊救給乏絕者數百人又逢知故困餒於路不

忍委去因殺所駕牛以救之衆人止之翊曰視沒不救

非志也

又折像字伯式廣漢雒人父國有資財父卒

感多藏厚亡之義乃散金帛資產周施親疎自知亡日

召賓客飲食辭訣忽然而終

又廖扶逆知歲荒乃聚

穀數千斛悉用周給宗族姻親又殮葬遭疫死亡不能

自收者常居先人家側未曾入城市人因號北郭先生

又种暘字景伯父為定陶令有財三十萬父卒暘皆以賑鄉里貧賤者其進趨名利者皆不與交通 又鄧林字叔孫西羌反拜謁者屯田三輔臨發之日散千金之產分與兄弟甥舅親族各有差品 東觀漢記劉弘收恤故舊無所失父所厚同郡郎中王臨年老貧乏弘常居業給足乞與衣裘輿馬施之 續漢書郭伋并州牧徵為太中大夫宅一區及帷帳錢穀仍輒散與宗親九族無遺餘 又肅宗崩廉范奔訃敬陵時廬江郡掾嚴麟奉章俱會於路麟乘小車塗深馬死不能自進范愍然命從騎下馬與之不告而去麟事畢不知馬所歸

人部

前漢書卷之三十一

施恩

五



乃沿路訪聞范名牽馬造門謝而歸之世服其義又  
張純節儉行義常分捐租奉貽卹宗親雖至賈而施與  
不怠又伏湛字惠公更始元年拜為平原太守遭倉  
卒兵起莫不驚擾而湛獨安然教授謂妻子曰一穀不  
外國君撤膳今人皆飢奈何獨飽且食麤糲盡分奉祿  
以賑活鄉里來客者百餘家三輔決錄摯茂字子華  
以茂才為郡法曹治財致大富悉散以分宗人先從貧  
始以壽終虞預會稽典錄駱俊字遠孝漢靈帝擢拜  
陳相汝南葛陂盜起四面受敵俊整厲吏人為之保障  
出倉見穀以贍貧乏魏志楊俊字秀才以兵亂方起

而河內處四達之衢必為戰場乃扶老幼去詣京密間  
同行者百餘家俊賑濟貧乏通共有無宗族知故為人  
所畧作奴僕者凡六家皆傾財贖之吳志朱據字子  
範吳郡人孫權遷建業拜左將軍封雲陽侯謙虛接士  
輕財好施三國司馬徽人有臨蠶求簇者便與之自

棄其蠶或有難之者曰人不當求爾人已求拒之將慚  
何有以財貨令人慙者也晉書尚書令符雅為人樂

施乞人填門嘗曰天下物何常吾今日富後日貧爾忽  
一日不施則意不泰時人為之語曰不為權異富寧作  
符雅貧晉陽秋樊重假貸人間數百萬臨終遺令焚

削文契債家皆慙爭往償之諸子從教竟不受 晉中

興書應詹稚弱家富於財乃請宗中單貧者與共為居

晉紀祖逖輕財好施每至諸田舍輒稱允意散帛以

是嘉焉 葛洪神仙傳焦先日日入山伐薪以布施

宋書范叔孫少而仁厚周窮濟急鄉曲貴其行義無有

呼其名者 又劉凝之荊州年荒衡陽王義季慮其餒

餉錢十萬凝之大喜將錢至市門觀其饑色者悉分與

之俄頃立盡 又張進之歷郡五官主簿永寧安固二

縣領校尉家世富足經荒年散其財救贍鄉里遂以貧

罄全濟者甚多

又蕭惠開為益州牧錄事參軍劉希

微假蜀人債將百萬爲債主所制未得俱還惠開甚恥  
之輒之廢中有馬六十疋悉以與之償債其意趣不常  
皆如此 陳書徐陵字孝穆性清簡無所營樹祿俸與  
親族共之太建中食建昌邑邑戶送米至於水次陵親  
戚有貧匱者皆令取之數日便盡陵家尋至乏絕府僚  
怪而問之故陵云我有車牛衣裳可賣餘家可賣不  
後魏書祖巖字洪山於固安縣世有積粟自延昌以來  
北州頻經災儉巖兄弟傾家贍遺常見州郡徵租甚急  
遂以家粟萬斛代輸聞者莫不嗟歎 隋書郭衍授瀛  
州刺史遇秋霖其屬縣多漂沒民皆上高樹依大塚衍

親備船楫并齎糧拯救之民多獲濟衍先開倉賑卹後始奏聞上大善之 唐書李藩家富於財父卒親族吊

者有挈去不禁愈務散施不數年而貧年四十餘未仕讀書揚州困於自給妻子怨尤之晏如也 又李臯貶

温州長史攝行州事歲儉州有官粟數十萬斛欲行賑救掾吏叩頭乞候上旨臯曰夫人一日不再食當死安

暇稟命若殺我一身活數千命利莫大焉開倉盡散之以擅貸之罪飛章自劾天子嘉之荅以優詔 新唐書

元德秀所得奉祿悉衣食人之孤遺者歲滿筭餘一縑駕柴車去愛陸渾佳山水乃定居不爲牆垣扃鑰家無

僕妾歲饑日或不爨嗜酒陶然彈琴以自娛人以酒肴從之不問賢鄙為酣飲 又郭震字元振與薛稷趙彥回同為太學生家嘗送資錢四十萬會有衰服者叩門自言五世未葬願假以治喪元振舉與之無少吝一不質名氏稷歎駭 五代史周馮道遇歲饑悉出所有以

賙鄉里而退耕於野躬自負薪有荒其田不耕者潛為之耕其人媿謝道殊不以為德 宋史范仲淹妻子衣食僅自充推其奉以食四方從學之士置義莊以贍族人 天中記宋建中靖國中蘇軾自儋北歸卜居陽羨士人邵民瞻從學於軾為軾買一宅為緡五百坡傾囊

僅能償之卜吉入居既得日矣夜行聞老嫗哭聲與邵  
推扉而入問嫗何為哀傷至是嫗曰吾有一居相傳百  
年吾子不肖舉以售人吾今日遷徙百年舊居一旦訣  
別此所以泣也問其故居所在則軾所得者也因再三  
慰撫謂曰嫗不必深悲當以是居還嫗即命取屋券對  
嫗焚之呼其子命翼日迎母還舊居不索其直軾自是  
遂還毘陵不復買宅借額塘橋孫氏居暫住焉 元史  
天曆二年關中大旱饑民相食特拜張養浩為陝西行  
臺中丞既聞命即散其家之所有與鄉里貧乏者聞民  
間有殺子以奉母者為之大慟出私錢以濟之又至

大丁未浙東大侵戊申復無麥民相枕死宣慰同知脫  
歡察議行賑荒之令斂富人錢一百五十萬給之至寧  
海縣以餘錢二十五萬屬主簿胡長孺藏去乃行旁州  
長孺察其有乾沒意悉散於民抱成案進曰錢在是矣  
脫歡察雖怒不敢問 明獻徵錄畢文德天順癸未學

士黃廷臣謫廣沒舟阻淮上不能歸巡撫王度以託文  
德即請館於家買地葬之市屋居其妻孥財物俾不失  
所成化丙戌民饑粥子女者衆悉以善價收育立合券  
約歲豐還之 又董建中按順天遣其妻子還獨留老  
奴司戶毋敢私謁永平大水民漁以生權闖奪之斷其



吾麓有嫗與其子哭於野建中行部見之即劾闡曰奪  
漁是無民也無民是無君也闡人懼而縊海葦潦漁之  
利然後悉歸民 又戴鷺有庠友趙宣家貧不克葬親  
以所卜南郊壽域畀之又有范瓚以所居室質錢期滿  
當徙鷺慰留之曰吾寧不得居必不使汝老而無歸也  
又丁廣友黃六窘於食造之廣大喜開樽飲罷未敢  
言廣曰聞君缺食何不即言隨載糧一車貽之自後稍  
窘即賙不待其告有孔景貧無所營廣造屋命挈家居  
之景卒喪葬之費一力承之顧其妻子過於景在時

又梁洞奉命賑徐州饑民時蕭碭二縣民亦多饑者洞

亦欲賑之有司以未有命沮洳洳曰民皆王民可坐視其死耶有罪吾自任之遂發粟賑濟多所全活事聞太宗嘉之

### 施惠三

**原**為粥

作衣

衛國凶饑公叔文子為粥與國之饑者王望字慈卿行部見飢者裸形草食

以便宜輒出其所在粟布為糶

**增**公粟

義穀左傳宋饑

司城子罕請於公出公粟以貸使大夫皆貸司城氏貸而不書為大夫之無者貸後漢黃香為魏郡年饑分

俸祿贖貧人豐富

**原**賜直

**增**輸粟

漢成帝詔入穀賑貧者賜直

晉饑秦輸之粟自雍及絳名曰汎舟之役

**原**民歌

士歸

左傳晏子曰齊舊四量豆區釜

鍾四升為豆各自其四以登於釜釜十則鍾陳氏三量皆登一焉鍾乃大矣以家量貸而以公量收之詩曰錘

人部

無德於女式歌且舞陳氏之施民歌舞

**增**投醪

挾

之矣又曰樂懷子好施士多歸之  
續黃石公記昔良將用兵有饋一罈醪者使投之河令  
將士迎流飲之夫一罈醪不能味一河水三軍思為  
之死滋味及之也左傳楚子伐蕭申公巫臣曰師  
人多寒王巡三軍拊而勉之三軍之士皆如挾纊

**原**散軍糧

施父粟

舒仲應以表街軍糧散給飢人術

全赤字子橫父柔使齋米數千斛到吳有所市珠皆散

施空船還父怒琮曰所市非急而士大夫有所市珠皆散

不及故報父奇之後罷東郡還錢塘修祭墳墓麾幢節

蓋耀於舊里請會邑人平生知舊宗族六親施惠于有

餘萬本土 **增**眾人母 續命田 家語子游問於孔子

以為樂 惠也可得聞乎子曰夫子產者猶眾人之母也食之不

能教之以其乘車濟冬涉者蓋愛而無教也 齊書劉

善明懷民子懷珍族弟位徐州刺史鎮北將軍青州饑

荒人相食善民躬食餽粥開倉以救鄉里多獲全濟百

姓呼其家田 **原**汲黯矯制 鄧攸擅賑 旱父子相食

為續命田

汲黯以便宜持節發河內倉以救之及歸伏罪武帝  
賢而釋之晉鄧攸為郡時擅開倉賑貧桓彞劾之

單食與餓

俸錢贍貧

晉趙宣子舍於翳桑見靈輒餓

下第五倫事

詳俸

**增**務起人急

**原**賜豈獨受

原結身衣服車馬  
纔具妻子內困專

以賑施貧窮務起人之急

寇恂字子翼所得祿賜盡  
施朋友故人曰吾因士大夫  
致此豈可獨享耶時人稱

其長者以為

貸不待報

與不宣惠

劉頌字子雅奉  
使見飢人上表

請賑貸不待報貸之而行除名

梁高

**增**采芑之歌

青麥之謡

史記田常以大斗出貸小斗收齊人歌曰  
史記田成子莊子曰青青之

麥生於陵陂生不

**原**七十無不饋飴

賞賜悉與親

布施死何舍珠為

宋公子鮑禮於國人年七十以上無不饋飴也  
族賈武得兩宮賞賜悉與親族及載穀糧於路以施民

家量貸公量收

九在外一在內

上詳上民歌註  
魏成食祿千鍾什

人部

詩經卷三百九

施惠

上

九在外什

**增**恩不可忘潘元茂

推財不疑張長思

王隱晉書潘最字元茂值年荒部曲之家健兒渠帥皆素服重名共相率送迎道路所在為儲以供行資最隨主人多少口率均分無有尊卑優劣若所賦已盡偶有不足則推已之分以周未遍父老頌之曰且富且貴有南山之壽吾仍得與潘元茂又曰思不可忘無如我潘郎崔鴻前涼錄張冲字長思燉煌人散家財巨萬施之鄉閭時人謠曰推財不疑張長思

**施惠四**

**原濟**物齊則

**聚民**財聚則民散

**頒斂**用粟春

**賜**

**賜**周禮

**匪頒**匪非也頒分也

**時頒**並周禮

**及下**禮惠

必及

**下**

**惠**下又禮惠

下之道

**臣無威**福書臣無有

**作福作威**

**眾不懼**

禮年雖大殺眾不懼懼注  
怯恐也謂上以法惠救之

**隱民取食**

民多取食焉隱

民謂窮

困人

周人尚施 貸而不書

詳施惠 三註

施而不德

貸詳賑

豐凶不時

聚斂有典

適時以權

救物惟

道

義由獨斷

惠必同沾

惠以救災

義而濟物

博施之人

專達之責

散以家貯

收其公利

情且涉私

美將歸下

苟徇便宜

則非專達

宜

哀菜色

無肆莠言

分散者仁之施

儒行

**增**愛施者

仁之端

史記

**原**命未及於匪頒

罪寧逃於擅發

歲

凶諒可恤人

家施不應及國

賑廩鄧攸雖見免官

開倉汲黯猶聞釋罪

積而能散誠謂發身

壯者以財發身

不仁者以

私不及公豈宜作福

大夫不收公利不敢作福

毀家

人部

出監類

施惠

紆難猶謂盡心  
賑窮救災豈宜獲戾  
所司以未有  
君命何其速與  
使者以苟利國家專之可也

施惠五

**增**銘漢崔瑗座右銘曰施人慎勿念受施慎勿忘 唐

劉禹錫高陵令碑銘曰噫涇水之逶迤溉我公兮及我  
私水無心兮人多僻錮上游兮乾我澤時逢理兮官得  
材墨綬紫兮劉君來能愛人兮恤其隱心既公兮言既  
盡劃新渠兮百畝流行龍蛇兮止膏油遵水式兮復田  
制無荒區兮有良歲嗟劉君兮去翱翔遺我福兮牽我  
腸紀成功兮鐫美石求信詞兮昭懿績

施饋一

**禮記** 詩陳饋八簋

禮記天子執鬯而饋

論語齊人歸

女樂

**原**

又陽貨欲見孔子孔子不見歸孔子豚

**禮**

孟子君餽之粟則受之

又陳臻問曰前日於齊王餽

兼金一百而不受於宋餽七十鎰而受於薛餽五十鎰

而受孟子曰當在宋也辭曰餽賍當在薛也辭曰聞戒

故爲兵餽之若於齊則未有處也 又其交也以道其

餽也以禮 又繆公之於子思也亟問亟餽鼎肉

施饋二

**原** 左傳晉公子重耳及曹僖負羈之妻曰吾觀晉公子



從者皆足以相國公子必反其國若反其國必得志於諸侯而誅無禮曹其首也子盍早自貳焉乃饋盤飧置璧焉公子受飧反璧

**增**

又叔鮒求貨於衛淫芻蕘者

衛人使屠伯饋叔向羹與一篋錦曰諸侯事晉未敢攜貳況衛在君之宇下而敢有異志芻蕘者異於他日敢請之叔向受羹反錦曰晉有羊舌鮒者瀆貨無厭爲此役也子若以君命賜之其已客從之未退而禁之孔叢子季桓子以粟千鍾餼夫子受之而不辭旣而以頒門人之無者子貢曰季孫以夫子貧故致粟夫子受而施人無乃非季孫之意乎子曰受人財不以成富與季

孫之惠於一人豈若惠數百之人哉 又衛公子友饋馬四乘於子思為賓主之餼焉子思曰伋寄命以來度身以服衛之衣量腹以食衛之粟且朝夕受賜衣食已優無敢當車馬之貺禮雖有爵賜人不踰父兄今重違公子之盛指則有陷禮之愆若何公子曰友已言於君矣 又子思居貧其友有饋之粟者受二車焉或獻罇酒東脩弗受或曰子取人粟而辭吾酒脯是辭少取多也子思曰伋不幸而貧於財至乃困乏將絕先人祀所以受粟為周乏也酒脯則飲讌方乏於食而乃讌非義也吾豈以為介哉 列子列子之齊中道而返遇伯昏

稽人稽人曰奚方而反曰吾驚焉惡乎驚曰吾食於十  
漿而五漿先饋伯昏稽人曰若是則汝何爲驚已曰夫  
衆人特爲食羹之貨多餘之贏衆人之饋我者非貴我  
贏也蓋貨我以自盈耳  
其爲利也薄其爲權也輕而猶若是而況萬乘之主身  
勞於國而智盡乎事彼將任我以事而效我以功吾是  
以驚也 西京雜記朱買臣爲會稽太守懷章綬至金  
亭而國人未知也所知錢勃見其曝露乃勞之曰得無  
罷乎遺以紈扇買臣至郡引爲上客 後漢卓茂爲密  
令人有言部亭長受其米肉遺茂問亭長從汝求乎人  
曰往遺之爾茂曰遺之而受何故坐耶 後漢書李恂

徵拜謁者領西域副校尉西域殷富多珍寶諸國侍子  
及督使賈胡數遺匈奴婢宛馬金銀香扇之屬一無所  
受。又王丹字仲回時京師大豪陳遵朋友喪親遵為  
護喪事賻縑數百疋丹懷縑一疋至喪主前出授之曰  
如丹是縑出自機杼遵有慙色。東觀漢記光祿勳杜

林與馬援鄉里親厚援南還時林馬適死援遣子將馬  
一匹遺之曰朋友有車馬之餽可以備乏居數月林還  
之。後漢書張奐為將帥有勲名董卓慕之使其兄遺  
縑百疋奐惡卓為人絕而不受。梁祚魏國統初太祖  
過故人呂伯奢也日暮道逢二人容貌威武太祖避路

二人笑曰觀君有奔懼之色何也太祖悉告之解佩刀與之曰以此表吾丹心願二賢慎勿言 晉羊祜與吳

將陸抗相對使命交通抗稱祜之德量樂毅孔明不能過抗嘗病祜饋之藥服之無疑心人多諫抗曰羊叔子豈醜人者 世說晉王修齡貧乏陶胡奴為烏程令送

米一船答曰王修齡飢自就謝仁祖索食不須陶胡奴送米 又王戎父渾有令名官至涼州刺史渾薨所歷

九郡義故懷其德惠相率致賻數百萬戎悉不受由是顯名 又范宣字子宣潔行廉約豫章太守韓伯遺絹百匹不受減五十匹復不受至一匹終不受韓後與范

同載就車中裂二丈與范云人寧可使婦無禕耶范笑而受之 晉王述家貧來試宛陵令頗受饋遺而修冢具王導使謂之曰名父之子不患無祿屈臨小縣甚不宜爾述答曰足自當止後屢居州郡清潔絕倫祿賜皆散之親故 王羲之食有一味之甘割而分之 晉紀

瞻帖云自昨信來今又益貧無以將意粉二斗所謂物微意全者也 晉陶潛躬耕自資遂抱羸疾江州刺史

檀道濟往候之潛偃卧瘠餒有日矣道濟饋以梁肉麾而去之 宋書高陽許瑤之以綿一斤遺郭平原不受往反數十瑤之乃自往曰今歲過寒而建安綿好以此

奉尊上爾平原乃拜而受之 齊書何點隱居不仕豫  
章王命駕造門點從後門逃去竟陵王子良曰豫章尚  
不屈非吾所敢議遺之嵇叔夜酒杯徐景山酒鎔以通  
意 范亨燕書高祖少有大度雄畧傑出晉安北將軍  
張華鎮薊高祖童冠往見華曰君必為命時之器匡時  
濟難者也脫所著幘簪遺之殷勤而別 崔鴻後燕錄  
王猛伐洛陽謂慕容垂曰吾將遂清東夏或為東山之  
別見物思人卿將何以為信垂以佩刀遺之 前秦錄  
慕容冲進逼長安苻堅遣使送錦袍一遺冲使者稱有  
詔古人兵交使在其間卿遠來莫創得無勞乎今送一

袍以明本懷朕於卿恩分如何而於一朝忽為此變

後魏書西域厭達波斯諸國各因公使並遣任城王澄駿馬一匹請付太僕以充國閑詔曰王廉貞之行有過楚相可敕付廩以成君子大哉之美 唐書朱桃椎益

州成都人澹泊絕俗被裘曳索人莫能測其所為長史竇軌見之遺以衣服鹿幘麕鞞逼署鄉正委之地不肯

服更結廬山中夏則羸冬緝木皮葉自蔽贈遺無所受

又裴休童時兄弟偕隱家墅晝講經夜著書有饋鹿

者諸生共薦之休不食曰疏食猶不足今一啖肉後何

以繼 又司空圖居中條山王官谷王重榮父子雅重



之歟饋遺弗受常為作碑贈絹數千圖置虞鄉市人得取之一日盡 又韓思復家富有金玉未嘗省篤學舉秀才高第襲祖封永淳中家益窶歲饑京兆杜瑾者以百綾餉思復方併日食而綾完封不發 又陽城有里人鄭俶欲葬親貸於人無得城知其然舉縑與之俶既葬還曰蒙君子之施願為奴以償德城曰能同我為學乎俶泣謝即教以書俶不能業城更徙遠阜使顯其習學如初慙縊而死 唐有布衣張子路上書言李泌之短德宗殺之謂泌曰朕皆得其誣妄且云卿受嚴震金獅子百枚計價二萬貫朕料必是沙糖獅子山南地貧

何有許多金又人家用一百箇金獅子作何物試使人  
潛勘送沙糖使猶在城脚避嫌疑諸道寄茶及口味悉  
皆拆開將入此賊遂敢誣罔故處之  
唐書陸贄丁母  
憂東歸洛陽寓居嵩山豐樂寺藩鎮賻贈及別陳餉遺  
一無取與韋臯布衣時相善惟西川致遺奏而受之

唐崔從領鄜坊節度使党項市羊馬類先遺帥守從獨  
不取而厚慰待之自是羌人不敢犯境  
唐郝處俊甫  
十歲而孤故吏歸千緡贈之不受  
宋太祖朝趙普為  
相車駕因出幸其第時吳越王俶方遣使致書及海物  
十餅在廡下倉卒出迎未屏也上顧見問何物普以實

對上曰此海物必佳即令啟之皆滿貯瓜子金普惶恐頓首謝曰臣未發書實不知若知之當奏聞而却之上笑曰但取之無慮彼謂國家事皆由汝書生耳因命謝而受之 宋曹修古四御史之一也明道初因上言請太后還政謫守興化卒於官郡僚及鄉之賢者相與率錢十萬以贍其家修古有女始笄告其弟曰先人忠節名聞天下今不幸直言謫死且君子不家於喪此錢決不可受以浼我先人全德哭而謝遣之送者固請竟一錢不受 宋張正議與种世衡善及正議持父喪世遺以汝州田十頃固辭不受使者在途而世衡已卒其

子以父命不復受致蕪廢者五十年元豐中郡守劉斐請以田給州學朝廷不許遂命還种氏宋陳師道初游京師踰年未嘗一至貴人門傅堯俞欲識之秦觀曰此人殆難致也知其貧懷金欲為餽聽其論議敬畏不敢出宋岳飛家無姬侍吳玠遺名姝結驪飛曰主上宵旰豈大將安樂時耶元廉希憲行省荆南宋故官禮謁大府必廣致珍玩希憲拒之且語之曰汝等身仍故官或不次遷擢當念聖恩盡力報効鴻書元明善常副一蒙古大臣出使交趾瀕還國王贖以兼金蒙古受之明善獨不受國王曰彼使臣已受矣公何固辭曰

彼所以受者安小國之心我所以不受者全大國之體

國王歎服

元杜瑛字文玉其先霸州信安人金將亡

瑛避地河南緱氏山中黏合珪開府為相瑛赴其聘遂

家焉與良田千畝辭不受

明詞林人物考吳訥字敏

德永樂時巡按貴州還三司遣人以黃金百兩追送至

夔府訥不啟封就題其上還之詩曰蕭蕭行李向東還

要過前途最險灘若有賊私并土物任教沈在碧波間

又桑悅字民懌丘濬嘗餽以狔項悅詣謝濬曰狔項

美何如生固甘之否對曰使悅嘗尚方芍藥饌所不足

甘而一狔項何如草具哉

明獻徵錄陽春主簿徐均

至縣吏白應往視莫大老叱曰何物大老吏白此洞主均叱使來見不然且屠戮出雙劔示之大老恐懼至蒲伏諭遣之值府符下問遂繫之獄均曰其人必來劫獄備之大老二子果來莫敢前詰朝饋大瓜安石榴皆黃金大珠也均麾出械繫大老身送之府中後府官受賕調均攝陽江縣 又王敬臣廬居甚隘寄寓天王寺中鬻書易粟有饋餐者却之不已則書壁云不食嗟來食寧為溝壑夫其人乃止

施饋三

**原請粟**

與車

子華使於齊舟子為其母請粟 後漢劉翊字子相旅有張季禮奔師喪遇寒

人部

州縣貢山卷三十九

施饋

三

毀頓滯道路翊以車與之不告姓名策馬而去季指

困 餽鍾 吳魯肅字子敬不治家事以散財賑窮結士

兩困米各三千斛乃指一困與瑜益知奇遂定僑札

喪故假 鄭子罕卒于展以子罕之命餽國人粟一鍾在

父命也 增 瘞鹿 載魚 唐景雲中韋詵休日登樓見

軍裴寬居也吏與偕來說問狀曰寬居義不以苞苴污

其家適有人以鹿為餽致而去不敢自欺故瘞之詵嗟

魚入往為判官 宋書王弘之隱居性好釣日夕載

生麻 當歸 閔仲叔太原人王莽之世潔行不仕與周

嘗遺其生麻仲叔歎曰我欲省煩耳受而不食 吳志

太史慈字子義曹公聞其名遺慈書以篋封之發省無

貯當歸 但 歸乘馬 遺食器 桓公歸以乘馬祭服五

稱歸夫人魚軒 漢鄭莊性廉不治 饋七牢 饋特

產然饋遺不過食器注謂一盤食也

豚秦穆公改館晉侯饋七牢焉  
舅姑入室婦以持豚饋明婦順也  
昏禮  
白綸巾 白

羽扇 陳書賀德基少遊學京邑積年不歸衣資罄乏盛  
冬止衣袂襦袴嘗於白馬寺前途一婦人容服甚

盛呼入寺門脫白綸巾贈之謂曰君方為重器不久貧  
寒故以此相遺爾德基問姬姓名不答而去 齊書張

融字思光吳郡人祖諱父暢融年弱冠道士陸修  
靜以白鷺羽尾扇遺之曰此既異物以奉異人 納

書半卷 受酒一杯 唐書有以書遺褚遂良者止納一  
答曰審爾此為多矣更還其半 又李素立為瀚海都

護夷人感其惠率馬牛以饋素立惟受其酒一杯餘悉  
還之 原漂母饋食 駱姊分施 漂母謂韓信曰吾哀王

駱統字君緒事嫡母謹時人多困乏統為飲食與之衰  
少其姊仁愛問知之曰何不告我乃以私粟與統并告

母使分 增受茶一串 遺餅一甌 唐書陸贄以博學  
施也 鄭縣尉罷秩東歸省母由壽州刺史張鑑有時名贄往

謁之鑑初不甚知留三日再見與語遂大稱賞請結忘  
人部

施饋



年之契及辭遺錢百萬曰願備太夫人一日之膳贄不  
納惟受新茶一串而已曰敢不承君厚意世說晉王

悅之少厲清操為吏部郎時鄰省有會同者遺之餅一  
甌辭不受曰所費誠復小小然少來不欲當人之惠

**與千里馬** 留二萬錢 後漢書或問第五倫曰公有

馬者雖不受每三公有所選舉心不能忘而亦終不用  
也豈謂無私乎宋書顏延之為始安郡經過日日造

陶潛每往必酣飲致醉臨去留二萬 貂裘採桑 笥

錢與潛潛悉送酒家稍就取酒飲 金報土 宋書王弘之徵為通直散騎常侍不就從兄敬

王儼於褒谷見秦王以金一笥遺蜀王報以禮 物盡化為土秦王大怒臣下賀拜曰土者地也 大珠

一斛 玉鳥一量 蜀志宗預東聘吳孫權提預手涕泣 而別曰君每街命結二國之好今君

年長孤亦衰老恐不復相見遺以大珠一斛 仙傳安期先生時人皆言千歲公秦始皇請與語三日

夜賜金壁數千萬出阜鄉亭皆置去留書以赤 玉為一量為報口後千歲求我於蓬萊山下

施饋四

**饋**

私覲

韓宣子私覲鄭子產以玉與馬

嘉賦

左傳是委嘉賦於草莽也又張華詩足用感嘉

賦

魄歲

蜀風俗歲晚魄歲人謂之魄歲

拜嘉

穆叔如晉晉侯享之金奏肆夏之三不拜

工歌文王之三又不拜工歌鹿鳴之三三拜對曰三夏天子所以享元侯也使臣弗敢與聞文王兩君相見之

樂臣弗敢及鹿鳴君所以嘉寡君也敢不拜嘉

意重

李白詩意重泰山輕

命輕

朱暉

為恩使命緣義輕

渭陽贈

詩我送舅氏曰至渭陽何以贈之路車乘黃

齊者餉

蘇軾詩不學劉伶獨自飲一壺往助齊者餉

送銀盤

又詩知君欲寫長相憶更送銀盤尾纈紅

分酥酒

又詩使君夜半分酥酒驚起妻孥一笑譚

原老有嘉惠

楚王老有嘉惠

注恤老也

饋無束脩

朱邑為大司農無束脩之饋

增市吏不受

尹翁歸為

市吏不受饋遺百賈畏之

亭長不坐

詳施饋二

原散與親故

郗愔字方回好

人部

饋

施饋

原

聚斂積財千萬嘗開庫任其下  
超超好施一日散與親故悉盡

遺其親戚

孟嘗君與客語屏風曰

後嘗有侍史主記所與客語問親戚

不稅不視未仕

者不敢稅人如稅人則以父兄之命又君子於有饋

者不能見則不視其所饋

注謂有疾不見則不納

且發暮還

晉荀晞字道將

相煦相濡莊子魚相煦以沫不如相煦以濕相濡

在兖州見朝政亂懼害每得珍物貽都下親貴

厚往

去五百里恐不鮮美求得于里牛且發暮還

薄來註謂燕賜厚納貢簿

增明月之珠和氏之璧黑狐之裘

國戰

策蘇秦說李兌抵掌而談兌送以明月之珠和氏之璧黑狐之裘黃金百鎰秦得以為用西入於秦

生

芻一束素絹一縷撲滿一枚

西京雜記公孫弘為國士所推上為賢良國人邾長

贈以云云

施饋五

**增詩**宋余靖端午日寄酒庶回都官詩曰龍舟爭快楚  
江濱弔屈誰知特愴神家釀寄君須醅酤古今嫌見獨  
醒人 蘇軾和錢安道寄惠建茶詩曰我官於南今幾  
時嘗盡溪茶與山茗胸中似記故人面口不能言心自  
省爲君細說我未暇試評其畧差可聽建溪所產雖不  
同一一與君子性森然可愛不可慢骨清肉膩和且  
正雪花兩脚何足道嚼過始知真味永縱復苦硬終可  
錄汲黯少憊寬饒猛草茶無賴空有名高者妖邪次頑  
曠體輕雖復強浮泛性滯偏工嘔酸冷其間絕品豈不  
佳張禹縱賢非骨鯁葵花玉韉不易致道路幽險隔雲

嶺誰知使者來自西開緘磊落收百餅嗅香嚼味本非  
別透紙自覺光炯炯糝糠團鳳友小龍奴隸日注臣雙  
井收藏愛惜待佳客不敢包裹鑽權倖此詩有味君勿  
傳空使時人怒生瘦 又杜介送魚詩曰新年已賜黃  
封酒舊老仍分頰尾魚陋巷關門負朝日小園除雪得  
春蔬病妻起斫銀絲鱠稚子歡尋尺素書醉眼矜矜覓  
歸路松江煙雨晚疎疎 韓駒謝人送鳳團及建茶詩  
曰白髮前朝舊史官風鑪煮茗暮江寒蒼龍不復從天  
下拭淚看君小鳳團 陳造謝兩知縣送鵝酒羊麪詩  
曰僧樣齋廚冰樣官饑憑脫粟食無簞不因同里兼同

姓肯念先生苜蓿盤 朱熹次韻謝劉仲行惠筍詩曰  
誰寄寒林新劔筍開奩喜見白差差知君調我酸寒甚  
不是封侯食肉姿 楊萬里謝唐德明惠筍詩曰高人  
愛筍如愛玉忍口不餐要添竹云何又遣十輩來昏花  
兩眼為渠開販夫束縛向市賣外強中乾美安在錦紋  
猶帶落花泥不論燒煮兩皆奇猪肝累人真可作以筍  
累公端不惡 又以糟蟹洞庭甘送丁端叔端叔有詩  
因和其韻斗州只解寄鶩毛鼎肉何曾饋百牢驅使木  
奴供露顆催科郭索獻霜螯鄉封萬戶只名醉天作一  
丘都是糟却被新詩太清絕喚將雪虐更風饕 又謝

親戚寄黃雀詩曰萬金家書寄中庭犢背仍題雙掩并  
不知千里寄底物白泥紅印三十餅甃餅淺染茱萸紫  
心知親賓寄鄉味印泥未開出饑水印泥一開香撲鼻  
江西山間黃羽衣純綿被體白如脂端能訪我荆溪曲  
願借前籌酌鄴滌戴復古謝史石窗送酒并茶詩曰  
遣來二物應時須客子行廚用有餘午困政須茶料理  
春愁全仗酒消除不勝歡喜拜嘉惠無限慇懃作謝書  
君既有來何以報一牀蘄簟兩淮魚方岳黃倅饌鱉  
徐尉饌蝓蚌同至詩曰誰饌螯如徑尺盤更分鱉似惠  
文冠麴生醉嚼玉五穀劒客生鬪珠一簞我與爾元同

蠢動寃哉烹亦到蹢躅不知南食詩何似待問昌黎老子看 明王世貞以吳絲酬李于鱗詩曰故人三徑新蓬蒿雁門太守徒爾勞斗酒風塵白日薄檝書海岱青天高念欲報之吳縞帶何以遺余秦復陶千秋衣被各無限世途往往稱綈袍

慶遺一

**增**周禮以致稍餼 列子小夫之智不離苞苴竿牘 朱文公集以金珠爲脯醢以契券爲詩文

慶遺二

**增**琴操許由無杯器手掬水人以瓠瓢遺之由操飲訖

人部



挂於樹枝風吹樹動有歷歷聲以爲煩擾取捐之 孟  
子湯居亳與葛爲鄰葛伯放而不祀湯使遺之牛羊

韓子晉獻公欲伐虞虢乃遺之屈產之乘垂棘之璧女  
樂二人以縈其心而亂其政 左傳鄆陵之戰卻至三

遇楚子之卒必下免胄而趨風楚子使工尹襄問之以  
弓曰方事之殷也有韎韋之跗注君子也適見不穀而  
趨無乃傷乎卻至見客免胄承命 孔叢子孔子使宰

予於楚楚昭王以安車蒙飾遺孔子宰子曰夫子無以  
此爲也臣竊見其貴義尚德清素好儉仕而有祿不以  
爲費不合則去退無却心妻不服綵妾不衣帛車器不

彫馬不食粟道行則樂其治不行則樂其身臣知夫子之不用此車 列子子列子窮容貌有飢色客有言之 鄭子陽者曰列禦寇有道之士也子陽遺之粟列子再拜而辭孔子曰我則異於是無可無不可 說苑子思居於衛緼袍而無表二旬而九食田子方聞之使人遺狐白之裘恐其不受因謂曰吾假人遂忘之吾與人也 如棄之子思辭而不受子方曰我有子無何故不受子思曰伋聞之妾與不如遺棄物於溝壑伋雖貧也不忍以身爲溝壑是以不敢受也 史記公儀休相魯客有遺相魚者相不受客曰聞君嗜魚何故不受相曰以嗜

魚故不受也今爲相能自給魚今受魚而免誰復給我  
魚者 漢書文帝賜趙佗書上褚五十衣中褚三十衣  
遺王 高士傳漢閔仲叔隱居不仕好食猪肝安邑令  
聞之令吏常給仲叔仲叔曰吾豈以口腹累人遂去安  
邑之沛 班固集漢竇憲餉身所服物虎頭繡盤囊一  
雙又遺身所服襪三具錯鏤鐵一 漢朱登爲東海相  
遺張敞蟹醬敞答曰蘧伯玉受孔子之賜必以及其鄉  
人敞謹分斯貺於三老尊行者曷敢獨享之 陳書姚  
察爲吏部尚書有私門生送南布一端花練一匹察曰  
吾所衣止是麻布蒲練此物於吾無用幸不煩此人遜

請察厲色驅出。唐書韋貫之爲尚書右丞，長安中爭爲碑誌，大官萃其門如市。至有密競構致，不由喪家是時，裴均之子圖不朽於貫之遺，縑萬匹請撰先銘。貫之曰：寧餓死不苟取。新唐書李愬帥魏博，長慶初幽鎮亂，殺田弘正，愬素服以令軍曰：魏人富庶而通於天化者，田公力也。衆皆哭。又以玉帶寶劍遺牛元翼，曰：此劍吾先人嘗以剪大盜，吾又以平蔡姦，今鎮人逆天，公宜用此夷之也。元翼感動，乃下令軍中勒兵以俟。宋石徂徠介爲舉子時，讀書於南都，時侍郎王濟聞其窮困，因餉客授以盤飧，却而不受，曰：今日固好，明日如何。

張九成字橫浦幼年處學正當苦寒衣衾不備鄉里富人  
有以襲衣爲送者亦却不受曰士處貧苦正是做工  
夫時節若不痛自節抑則貪慾心生廉恥喪矣工夫何  
在 劉秘書丞道原家極貧然一文不妄取於人冬寒  
歸自洛陽時無衣具司馬溫公以一二衣襪及一貂褥  
贖之固辭強之乃受乃至潁川悉封以反溫公曰於光  
不受於他人肯受乎 野語宋秦檜當國四方餽遺日  
至方滋德帥廣東爲蠟炬以衆香實其中遣駛卒持詣  
相府厚遺主藏吏期必達一日宴客吏曰燭盡適廣東  
方經畧送燭未敢啟乃取而用之俄而異香滿座察之

則自燭中出也亟命藏其餘枚數之適得四十九呼駛卒問故則曰經畧專造此燭供獻僅五十條既成恐不嘉試其一不敢以他燭充數秦大喜以為奉已之專也待方益厚又鄭仲為蜀宣撫相府造格天閣畢工鄭書適至遺鋪地衣一張秦命鋪閣上廣狹無尺寸差秦默然不樂鄭竟失志至於得罪二公為計同一以見疑一以見厚固有幸有不幸要不若守正之無悔吝也

慶遺三

**原**贈策

遺弓

晉人誘士會將行繞朝贈之以策凡遺人弓者張弓尚筋弛弓尚角

荃葛

苞苴

江都王建遺越繇閩侯錦帛閩侯亦遺荃葛荃葛今之布或曰細葛也禮凡以弓

人部

附錄員函卷三十九

慶遺

天

劍苞道箏箏問人者操以受命如使之容問猶遺也

**增**一簞珠

兩梁冠左傳

吳趙孟使楚隆使於吳王曰黃池之役君之先臣志父得承齊盟曰奸惡同之今君在難無恤不敢憚勞非晉國之所能及也使陪臣敢展布之王拜稽首曰寡人不佞不能事越以為大夫憂拜命之辱與之一簞珠漢

皇甫規與劉司空牋曰明公至德佐國憂世贈兩梁冠及鮪魚一雙服馬尊賜榮施甚弘

母方朔遺妻穎考叔鄭伯賜之食食舍肉曰小人有從官肉朔割肉去上令朔自責曰受賜不待詔何無禮也拔劍割肉向何壯也割之不多又何廉也歸遺細君又何仁也上大笑曰使

先生自責乃復自譽原雖微必喜後貴當州晉陶荆州有奉遺者皆問所由若力所致雖微必喜慰賜一倍若非禮得之即厲聲呵辱遠其所饋人於是勤於晨

劉殷時人嘉其志行競以穀帛遺歸悉封留卒之受而不謝云待後貴當相酬也

乃厚贈羅合字君章父幸新塗後舍到縣縣人以舍舊宰之子咸致賂遺不拒及歸悉封留而去

卒

卒

卒

暉字文季太守阮况欲市其牛暉不從况卒暉乃厚贈曰前者恐以財貨汚君

懷璧為害

買綃反煩

魏太祖徵華歆賓客故人送行贈遺數百歆不拒密題識臨去謂曰恐懷璧為害願諸君

為之計眾乃知之各留其贈于寶與翟陽船賣之買絹寄還本為惠反煩之益愧歎也

檀櫛

三具

繡鞋

一鞞

魏武帝與彪書曰今贈足下青檀林

慕容與顧和書曰今致繡

鞞

鞞

慶遺四

原贈佩

詩雜佩以贈之

詒玖

又詒我玖

彤管

又貽我彤管

增瑤

華

楚辭折疏麻兮瑤華將以遺兮離居

遺珮

又遺余珮

遺襟

又遺余襟

浦

折芳馨又折芳馨兮遺所思

搴杜若

又搴汀洲兮杜若將以遺兮遠者

雙鯉魚

古詩客從遠方來遺我雙鯉魚

一端綺

又客從遠方來遺我一端綺

美

人部

詩經卷之三十九

慶遺

元



人之貽

詩非女之爲美美人之貽

下女可詒

楚辭及榮華之未落兮相下女之可詒又

采芳洲兮杜若將以遺兮下女

### 慶遺五

**增**

唐韓愈贈盧仝詩曰先生結髮僧俗徒閉門不出

動一紀至今鄰僧乞米送僕忝縣令能不恥俸錢供給

公私餘時至薄少助祭祀勸參留守謁大尹言語纔及

輒掩耳 宋王禹偁送筇杖與劉湛然道士詩曰有客

遺竹杖九節共一枝鶴脰老更長龍骨乾且奇我問何

所來來從西南夷我年三十七血氣未全衰況在紫微

垣動爲簪笏羈倚壁如長物歲月無所施寸心空愛惜

惜此來天涯忽承明主詔來詢太乙祠再見劉先生氣  
貌清且羸持此以為贈所謂得其宜少助橘童力好引  
花鹿隨步月莫離手看山聊措頤微物懶致書故作筇  
竹詩 梅堯臣謝歐公贈綃詩曰昔公處貧我處困我  
無金玉可助公今公既貴我尚窘公有縑帛周我窮古  
來朋儕義亦小子貢不顧顏淵空復聞韓孟最相善身  
僕道路哀妻僮 又李審言遺酒詩曰大梁美酒斗千  
錢欲飲嘗被饑窘煎經時一滴不入口漱齒費盡華池  
泉昨日靈昌兵吏至跪壺曾不候報笈赤泥圻封傾瓦  
盎母妻共嘗婢流涎鄰家葡萄未結子引蔓垂過高牆

巔當街買杏已黃熟獨堆百顆充盤筵老年牙疎不喜  
肉況乃下箸無腥膾空腸易醉忽酩酊倒頭夢到上帝  
前賜臣蒼龍跨入月不意正值姮娥眠無人來顧傍玉  
兔便取作腊下九天拔毛爲筆筆如椽狂吟一掃一百  
篇其間長句寄東郡東郡太守終始賢切莫汲竭滑公  
井留釀此醕時我傳 又荅宣城張主簿遺雅山茶次  
其韻詩曰昔觀唐人詩茶詠鴉山嘉鴉銜茶子生遂同  
山名鴉重以初槍揜采之穿煙霞江南雖盛產處處無  
此茶纖嫩如雀舌煎烹比露芽競收青蒨焙不重鹿酒  
紗顧渚亦頗近蒙頂來以退雙井鷹掇爪建溪春劍葩

日鑄弄香美天目猶稻麻吳人與越人名各相鬪誇傳  
買費金帛愛貪無彞華甘苦不一致精麤還有差至珍  
非貴多為贈勿言些如何煩縣僚忽遺及我家雪貯雙  
砂甕詩琢無玉瑕文字搜怪奇難於抱長蛇明珠滿紙  
上剝畜不為奢翫久手生胝窺久眼生花嘗聞茗消肉  
應亦可破癥飲啜氣覺清賞重歎復嗟歎既不足吟  
誦又豈加我今實強為君莫笑我耶 又穎公遺碧霄  
峰茗詩曰到山春已晚何更有新茶峰頂應多兩天寒  
始發芽採時林狃靜蒸處石泉嘉持作衣囊祕分來五  
柳家 又永叔內翰遺李太博家新生鴨脚詩曰北人

見鴨脚南人見胡桃識內不識外疑若橡栗韜鴨脚類  
綠李其名因葉高吾鄉宣城郡每以此爲勞種樹三十  
年結子防山獠剝核手無膚持置官省曹今喜生都下  
薦酒壓葡萄初聞帝苑夸又復主第褒纍纍誰採掇玉  
椀上金鰲金鰲文章宗分贈我已叨豈無其鄉感感此  
微物遭一世走塵土鬢顛得霜毛 孔平仲朱君以建

昌霜橘見寄報以蛤蜊詩曰贈我以海昏清霜之橘報  
君以淮南紫脣之蛤橘膚軟美中更甜蛤體堅頑口長  
合開花結子幸採摘沒水藏泥豈斲得二物同時有不  
同賦形與性由天公請君下筴聊一飽莫索珠璣向此

中 又夢錫惠墨答以蜀茶詩曰墨者出自黑黑者墨  
之宜所以陳元號聞之於退之近世工頗拙所巧惟見  
欺摹成古鼎篆團作革靴皮揮毫見慘淡色比突中煤  
誰最畜佳品鄭君真好奇贈我以所貴有不讓金犀堅  
如雷公石端若大禹圭研磨出深黝落紙光陸離較之  
囊中舊相去乃雲泥辱君此賜固已厚何以報之乏瓊  
玖不如投君以嗜好君性嗜茶人罕有建谿龍鳳想厭  
多越上槍旗不禁久我收蜀茗亦可飲得我峨眉高太  
守人情或以少爲珍心若喜之當適口更憐此物來處  
遠三峽驚波如電卷江湖重覆千萬里淮海浩蕩漣漪

淺會丹登陸尚相隨今以答君非不腆開緘碾潑試一  
嘗尤稱君家銅葉盞 韓維答象之謝惠黃精詩曰仙

經著靈藥茲品上不刊服之歲月久衰羸反童顏巖居  
有幽子乘時斲蒼山溪泉濯之潔秋陽暴而乾九蒸達  
晨夜候火不敢安持之落城市誰復著眼看富貴異所  
嗜口腹窮甘酸貧賤固不暇錐刀乃其于坐使至靈物  
委棄同草菅惟君冲曠士敦然守高閑食之易為力天  
和自完故以此為饋其容幾一簞報我三百言浩浩  
馳以瀾何以論珍重如獲不死丹方當煩煥時把玩毛  
骨亦他年靈氣成與子驂雙鸞 又象之以山藥見贈

詩曰龍山有游客贈藥滿筠籠葉漬沙泉碧苗分石竇  
紅斲應侵曉露來喜及春風却笑丹砂遠辛勤勾漏翁  
又襄柑分惠景仁以詩將之曰荊州解綬十經春迴  
夢清林遶漢濱霜氣輕寒催紺實渚波餘潤作甘津僧  
園採掇寧論數客路奔馳竟占新雪意垂收高會缺分  
金聊助席間珍 又謝送妃子園荔枝詩曰年年驛使  
走紅塵貢入驪宮色尚新妃子園名猶未改一籠丹實  
寄閒人 王安石元珍以詩送綠石硯所謂玉堂新樣  
者詩曰玉堂新樣世爭傳況以蠻溪綠石鐫嗟我長來  
無異物愧君持贈有佳篇久埋瘴霧看猶濕一取春波



洗更鮮還與故人袍色似論心於此亦同堅  
蘇軾揚

州以巾物寄少游詩曰鮮鯽經年秘醅醪團臍紫蟹脂  
滿腹後春尊茁滑如酥先社薑芽肥勝肉鳧子纍纍何  
足道點綴盤餐亦時欲淮南風俗事餅罌方法相傳竟  
留畜且同千里寄鷺毛何用孜孜飫麋鹿  
又送牛尾  
狸與徐使君時大雪詩曰風捲飛花自入帷一樽遙想  
破愁看泥深厭聽雞頭鶻酒淺欣嘗牛尾狸通印子魚  
猶帶骨披綿黃雀謾多脂慙慙送去煩纖手為我磨方  
削玉肌  
又曩於長安陳漢卿家見吳道子畫佛碎爛  
可惜其後十餘年復見之於鮮于子駿家則已裝褙完

好子駿以見遺作詩謝之貴人金多身復閒爭買書畫  
不計錢已將鐵石充逸少更補朱絲爲道元煙薰屋漏  
裝玉軸鹿皮蒼壁知誰賢吳生畫佛本神授夢中化作  
飛空僊覺來落筆不經意神妙獨到秋毫顛我昔長安  
見此畫歎息至寶空潛然素絲斷續不忍見已作胡蝶  
飛聯翩君能收拾爲補綴體質散落嗟神全志公髣髴  
見刀尺修羅天女猶雄妍如觀老杜飛鳥語脫字欲補  
知無緣問君乞得良有意欲將俗眼爲洗湔貴人一見  
定羞忤錦囊千紙何足捐不須更用博麻縷付與一炬  
隨飛煙

沈與求次律兄餉魚魚不至而詩至頗類南

海使君送酒輒成絕句憑虛公子騎鯨後烏有先生控  
鯉初可是凡魚亦仙去空餘一紙腹中書 周必大胡

邦衡生日以詩送北苑八銖日注二餅賀客稱觴滿冠  
霞懸知酒渴正思茶尚書八餅分閩焙主簿雙餅揀越  
芽妙手合調金鼎鉉清風穩到玉皇家明年敕使宣臺  
餽莫忘幽人賦葉嘉 宋宣和中有鄧其姓者守關中  
以牛酥百斤遺梁師成江子我端友作牛酥行有客有  
客官長安牛酥百斤手自煎倍道奔馳少師府望塵且  
欲迎歸軒守闌呼語不必出已有人居第一先其多乃  
復倍於此台顏顧視初怡然昨朝所獻雖第二桶以淳

漆麗且堅今君來遲數又少青紙封題難勝前持歸定  
懸遼東豕努力明年赴頭市 陸游謝韓實之直閣送

燈詩曰玉作華星綴絳繩樓臺交映莫天澄東都父老  
今誰在腸斷當時諫浙燈 又詩舊友年來不作疎華

燈乃肯寄蝸廬寧知此老蕭條甚二尺檠前正讀書

楊萬里謝胡子遠郎中惠蒲大韶墨報以龍涎心字香

詩曰墨家者流老蒲仙碧梧採花和麝煙華陽墨水煎

膠漆太陰元霜作肌骨龍尾磨饑飲鼠鬚落點髹几几

不如夷甫清瞳光敵日一見墨卿驚自失後來夔州有

梁杲爾來黔州有吳老亦追時好得時名竟為蒲生豎

降旌吳墨往往元尚白梁墨濕濕藕黏壁南宮先生來  
自西惠然贈我四元圭我無鵲返鸞回字我無金章玉  
句子得君此贈端何似兀者得韡僧得髻安得玉案雙  
鳴璫金刀繡段底物償送以龍涎心字香為君與雲繞  
明窗 又南海陶令曾送水沈報以雙井茶詩曰嶺外  
書來謝故人梅花不寄寄爐熏瓣香急試博山火兩袖  
忽生南海雲苒惹鬚看清入骨縈盈窗几巧成文瓊琚  
作報那能辦雙井春風輟一斤 明李攀龍寄華從龍  
比以魚橘見致詩曰多少人間事誰能便作書羅官君  
史早謝客我何疎八月來吳橘三江下楚魚因風裁數

字一問子雲廬

慶賀一

**禮記**玉藻士於大夫不承賀下大夫於上大夫承賀少儀有慶非君賜不賀

**原**昏禮昏禮不賀人之序

也

**禮**周禮春官大宗伯以賀慶之禮親異姓之國

淮南子大厦成而燕雀相賀荀子慶者在堂弔者在

門禍與福鄰莫知其門晉王彪之曰賀娶妻者是因

酒食而有慶語愚謂無直相賀之禮而有禮既共慶賀

之義

慶賀二

人部

禮記卷三十九

慶賀

長

**續**左傳叔弓如晉賀虎祁也游吉相鄭伯以如晉亦賀

虎祁也史趙見子太叔曰甚哉其相蒙也可弔也而又賀之子太叔曰若何弔也其非惟我賀將天下實賀

戰國策蘇秦說齊王再拜仰而賀俯而弔齊王曰是何慶弔之相隨也史記單父人呂公善沛令避仇從之

因家焉沛中豪吏聞令有重客皆往賀蕭何為主吏主進令諸大夫曰進不滿千錢坐之堂下高祖為亭長素

易諸吏給曰賀錢萬實不持一錢謁入呂公大驚起迎之門又高祖使使拜蕭何為相國益封為相國衛諸

君皆賀故秦東陵侯邵平獨弔謂何曰以淮陰新反有

疑君心夫置衛衛君非以寵君願讓封勿受悉以家財  
佐軍何從其計上悅後漢書蔡茂爲司徒初夢在大  
殿極上有三穗禾跳取之得其中穗復失之主簿郭賀  
慶曰大殿者宮府形象也極而有禾人臣上祿也取其  
中穗中台之位於字禾失爲秩乃得祿秩也袞職有關  
君其補之旬日而徵乃辟賀爲掾又劉表爲荊所牧

時驃騎將軍張濟自關中奔南陽因攻襄城中飛矢而  
卒官屬皆賀表曰濟以窮來主人無禮至於交鋒此非  
牧意牧受弔不受賀也使人納其衆衆聞之喜遂皆服  
從魏志郭淮奉使賀文帝踐祚而遇疾稽遲帝曰昔



禹會諸侯於塗山防風後至便行大戮今溥天同慶而  
卿最留遲何也對曰臣聞五帝先教道民以德夏后氏  
衰始用刑辟今臣遭虞舜之世是以自知免於防風之  
戮也帝悅 晉書荀勗自中書監遷尚書令甚愠有賀  
者勗怒曰奪我鳳凰池諸君何賀耶 梁書呂僧珍生  
子宋季雅往賀署函曰錢一千闔人少之不為通強之  
乃進僧珍疑其故親自啟發乃金錢也 唐書代宗誕  
日諸道爭以侈麗奉獻常袞請却之代宗嘉納 唐岑  
文本初拜中書令不受賀有憂色母問之答曰非勲非  
舊責重位高所以憂 筆談宋向敏中文簡除右僕射

詔下日李昌武為翰林學士當對真宗謂曰朕自即位  
以來未嘗除僕射今日以命敕中門下賀客必多卿往  
觀之明日却來對勿言朕意也昌武侯丞相歸乃往見  
丞相方謝客門關悄然無一人明日具以所見對上笑  
曰向敏中大耐官職名臣遺事宋王文正公且晚年

官重每家人出賀立令止之因語其弟曰遭遇如此愈  
增憂懼何可賀也公每有賜予見家人置於庭下乃瞑  
目而歎曰生民膏血安用許多雲齋廣錄宋錢穆父

尹京府生日楊次公畫老子出關圖作詩獻曰秘藏函  
谷關中子來獻蓬萊閣上仙願得鬚眉如此老却教龜

鶴羨長年 宋陳恭公執中遇生日親族多獻老人星  
圖姪世修獨獻范蠡遊五湖圖公即日納節 倦遊錄  
宋光祿卿鞏申善事權貴王荆公生日以大籠貯雀鴿  
造相府以獻搢笏開籠取雀鴿一一放之每一放叩齒  
祝曰願相公一百二十歲謂之放生故東坡詩云記得  
金籠放雪衣 玉局文宋元符三年十二月十九日東  
坡生日置酒赤壁下酒酣笛聲起江上使人問之即進  
士李委聞坡生日作鶴南飛曲以獻奏曲嘹唳有穿雲  
裂石之聲

慶賀三

**原**取妻

生子

實取妻者曰聞子有客使某修賀  
綰父與太上皇同里善高祖與綰同日

生里中持牛酒相賀及兩家子長相愛里中喜  
兩家親相善子同日生壯又相愛復賀兩家也  
**求賢**

**有弟**

國語趙簡子問於壯馳茲曰東方之士孰為  
壯馳茲拜曰敢賀簡子曰未應吾問何賀對曰

臣聞之國家之將興也君自以為不及其亡也  
今主任晉國之政而問及小人又求賢人吾是以賀

會稽典錄鄭憲字孝章與孔融結為兄弟因升堂見親  
自為壽以賀母母曰何賀憲曰母昔有憲憲今有弟國

家所賴是

**灾藏臺**

**燒北澤**

韓詩外傳晉平公之時  
藏寶之臺燒士大夫聞

皆趨車馳馬救火公子晏子獨束帛而賀曰皇天降灾  
於寶臺是君之福也管子齊之北澤燒火光照堂下

管子入賀桓公曰吾田野辟農夫必有百  
倍之利矣是歲租稅九月而具粟又美

**弱穀反**

**兩鹿隨**

晏子景公探雀穀弱而反之晏子遂巡再拜賀  
曰君有聖人之道矣後漢書鄭弘傳注弘遷

淮陰太守行春白鹿挾轂而行主簿黃國拜  
賀曰聞三公車輻畫作鹿明府必為宰相

**朱鮪破**

人部

謝靈運卷一百九

慶賀

七

劉備死

東觀漢記朱鮪傳鮪破上大喜諸將賀之愬上尊號魏志袁渙傳時有傳劉備死羣臣

皆賀渙以嘗為

**增**八千歲

一萬春

莊子楚之南有冥靈者以五百

歲為春五百歲為秋上大有大椿者以八千歲為春八千歲為秋杜甫詩興王會靜妖氛氣聖壽宜過一萬

春

**原**薦賈不賀

**增**孟冀同賀

左傳楚子玉治兵於鞭七人其三人耳

國老皆賀子文薦賈後至不賀曰不知所賀子玉過三百乘不能以入苟入而賀何後之有馬援軍還故人多迎勞平陵人孟冀名有謀於座賀援援曰吾望子有善言反同衆人也

慶賀四

**原**相隨

慶弔相隨詳上慶賀二

必有

易積善之家必有餘慶

賀得地

呂氏

春秋世之人主得地百里則喜四境皆賀得土則不喜不知相賀不通乎輕重也

慶以地

孟

天子適諸侯曰巡狩入其疆土地辟田野治養老尊賢俊傑在位則有慶慶以地

日始長

王肅

家訓賀冬至言日至  
冬至而始長故歡喜

君道長

漢雜事冬至陽氣起君  
道長故賀夏至陰氣生

君道衰  
故不賀

璇璣改度

王肅家訓正為  
歲首璇璣改度

慶福惟新

又云  
臘當

大蜡慶  
福惟新

先朝後賀

又云尊長皆當先朝而後  
拜賀不得因朝以當賀也

先賀

後弔

淮南子北塞父得駿馬入皆賀之  
父曰詎知不為禍家富馬良其子好騎墮馬折髀人皆弔之

壺

及第相慶

天寶遺事新進士每及第  
鄉曲親戚例以聳樂相慶

大廈相歡

選詩

大廈構  
而相歡

壺觴盈門

劉禹錫曰姻族  
相賀壺觴盈門

賀聲盈耳

柳宗元

閭里相賀

韓愈詩閭  
里自相賀

里閭相賀

灑然相賀

並孔帖

握手相賀

歸來見親戚  
握手相弔賀

還鄉慶喜

歐陽修詩還鄉  
問井邑上堂多

慶喜

慶賀五

人部

自盤頁山卷一百一

慶賀

已

增詩唐白居易同夢得寄賀東西川二楊尚書詩曰龍

節對持真可愛雁行相接更堪誇兩川風景同三月千

里江山屬一家魯衛定知連氣色潘楊亦覺有光華應

憐洛下分司伴冷宴閑遊老看花 又喜錢左丞再除

華州以詩申賀曰左轄輟中臺門東委上才彤檐經宿

到絳帳及春開民望懇難奪天心慈易迴那知不隔歲

重借寇恂來 又與諸同年賀座主侍郎新拜太常同

宴蕭尚書亭子詩曰寵新卿典禮會盛客徵文不失遷

鶯侶因成賀燕羣池臺晴間雪冠蓋暮和雲共仰曾攀

處年深桂尚薰 又聞李六景儉自河東令授唐鄧行

軍司馬以詩賀之曰誰能淮上靜風波聞道河東應此  
科不獨文詞供奉記定將譚笑解兵戈泥埋劔戟終難  
久水借蛟龍可在多四十著緋軍司馬男兒官職未蹉  
跎 韓愈桃林夜賀晉公詩曰西來騎火照山紅夜宿  
桃林臘月中手把命珪兼相印一時重疊賞元功 宋

王禹偁賀畢翰林新入詩曰閒步花磚喜復悲所悲君  
較十年遲銀臺曉入批丹詔銅鏡秋開鑷白髭宮錦細  
袍宣與著內閑驕馬賜來騎家門記得咸通事莫忘論  
兵夜召時 又賀柴舍人新入西掖詩曰早折蟾宮第  
一枝綸闈恩命若何遲久爲俗吏殊無味合掌王言亦



有時好繼忠州文最盛應嫌長慶格猶卑他年莫忘中

吳宰六里山前歌紫芝又詩曰唐虞得良弼姬孔是

前身尼丘鍾骨骼嵩岳與精神徐鉉賀殷游二舍人

入翰林江給事拜中丞詩曰清晨待漏獨徘徊霄漢懸

心不易栽閣老深嚴歸翰苑夕郎威望拜霜臺青綾對

覆蓬壺晚赤棒前驅道路開猶有西垣廳記在莫忘同

草紫泥來朱熹壽母生朝詩曰秋風蕭爽天氣涼此

日何日外斯堂堂中老人壽而康紅顏綠鬢雙瞳方家

貧兒癡但深藏五年不出門庭荒竈墜十日九不煬豈

辦甘脆陳壺觴低頭包羞汗如漿老人此心久已忘一

笑謂汝庸何傷人間榮耀豈可當主有道或思無疆勉  
勵汝節彌堅剛熹前再拜謝阿娘自古作善天降祥但  
願年年似今日老萊母子俱徜徉 楊萬里冬至節後  
賀皇太子及平陽郡主詩曰長樂鐘聲遶夢驚建章星  
影照人行千官燈語聽殘點一夜霜寒在五更金鑰玉  
匙開北闕銀鞍絲控謁東明青宮朱邸環天極五色祥  
雲覆帝城 又賀皇太子九月四日生辰詩曰繼照盜  
天縱分陰學日勤橘中招綺夏瓜處屏伍文老別魚竿  
月來依鶴禁雲還將古為繼聊當野人芹 又中元前  
賀余處恭尚書禱雨沛然霑足詩曰數點飄聲供晚晴

二更傾瀉到天明雷驅雲氣如旋磨雨徧山邨却入城  
簞面頓無秋後暑簷牙最愛夢中聲尚書幸有爲霖手  
偏灑江東作麼生 汪元量和人賀楊僕射致仕詩曰  
運府公卿拜後塵手持優詔挂朱輪從軍幕下三千客  
聞禮庭中七十人飾帳麗詞推北卷畫堂清樂掩南鄰  
豈同王謝山陰會空敘流杯醉暮春

**增賦**明李東陽燒丹竈賦曰壽封庶子徐公七十龍集  
載戊星杓指申玉溼薦爽金飈汎塵南州封君當弧懸  
之旦綃夢之辰翠織蔥籠乎霧牖瑤環雜遯乎雲茵野  
饋庭篚山藏海珍有一羽客霓裳繡裾其容徐徐其步

煥煥手并一器委諸坐隅封君曰此物奚形而焉取名  
胡爲而至吾庭也客曰昔者燧人鑽火神農制藥軒轅  
鑄器工倕操作是掇是斲爰重爰敷乃采青丘之黝購  
雞山之獲掘海隅之赭靡蔥嶺之堊漬賁聞之涅剛上  
申之硤探石髓於神峰浞盜漿於帝窟擷玉榮於崆山  
擣沙礫於盧莫眇窮硃礫鉅撮碌礪旒埴陶坩掬埒燂  
璞幹旋蟻磨堂拄鼇足外隆內霽下承上覆其形則非  
黼非鬻不羸不瓠匪澗以塗匪黜以黜弗薛而髡弗窳  
而盾羶不浣於羊羹膏不沾於彘膳易牙之所不能用  
歐冶之所不得取與藏乎廣成之室神授乎安期之手

吾儕致私持以爲壽封君曰竈則然矣何名爲丹其方  
孰傳效孰與宣操以貺我又安用焉客曰其用則鍊日  
煮月納坤藏乾妙奪物性潛移化權其物則姤女嬰兒  
皓虎蒼龍儕分耦合會乎其中其法則濟之以離坎養  
之以屯蒙液華池以爲漿閑泥丸以爲封羯火爲之銷  
怪山夔爲之斂蹤乃酌赤泉咀藥木圭霞實以爲餐七  
神樓以爲服蓋有翼靈氛於兩肘睫倒景於雙矚者矣  
封君嘖然而笑曰有是哉惟厥有始賦形受氣五行爲  
經三事爲利膏液刀七鍼磨砭熉攻衰爲防輔正爲衛  
有一缺者是謂弗備若夫鶴算龜齡龐眉鮐背不窮而

瘥不色而瘁固有幽冥握其機衡沖漠司其割制者也  
吾將以大塊爲鼎元氣爲爐陰陽爲水火寒暑爲朝晡  
作息爲抽添之候弛張爲闔闢之符咀仁義以爲華嘯  
道德以爲腴樂余生以自適聽吾命之所如諒茲物之  
足珍與斯言之匪誣亦聊以資張華之物博助鄒衍之  
談餘望賓階而再拜韞我匱而藏諸客亦起而拜曰不  
腆敝物以實華宇公旣受貺亦復受祐願公省壽永錫  
純嘏維百千禩爲丹竈主 明盧柟壽成臯王賦梁孝  
王讌賓兔園相如在位王授簡於相如曰寡人壽願爲  
我賦之相如避席再拜曰唯唯夫壽天地之希齡大王

知壽然未聞王之壽大庶人之壽小也王曰庶人之壽  
何如對曰庶人凡夥品類各異若夫奇商巨賈征戍之  
客劇工浮游田父跼踏黃冠元牝緇衣閒適每遇誕期  
佳思聿興般酒矜設招致友生縹藻匪施滢碧無傾帷  
幔起兮露色寒琴調急兮霜華凝曾爲歡之幾何旋紛  
擾而咿嚶若大王之壽元辰未屆百司豫啟瓊珠之官  
金華之里象棲龜屏鸞茵犀几窮奇怪含香吐馨雲  
氣四散化爲仙靈綺麗慌忽奪人目精於是石渠金馬  
之士還坐駢至充乎後庭炮翠麟脰霜鯨宴素日張金  
燈攘皓腕之鴛袖映繡柱之鳴箏調採菱之艷譜發過

雲之新聲歌曰帝子降兮金井寒集瑤池兮驂白鸞  
齊遐齡兮千萬歲與佳人兮長盤桓爾迺分曹投博飛觥  
舉白促席交膝簪珥狼籍玉衡斜漢金虬水澀然後斂  
儀肅容悄然言別揚旌離館迴鸞東闕此所謂大王之  
壽非夫凡氓所得擬也王廼釋位就相如坐以酒觴相  
如曰寡人之壽若是其大微子之言寡人弗知也是後  
益親幸以相如爲上大夫

**原書**漢劉向與子歆書董生有云弔者在門賀者在閭  
言有憂則恐懼敬事故事則必有善功而福至也又云  
賀者在門弔者在閭言受福則驕奢驕奢則禍至故弔



隨而來齊頃公之始藉霸者之餘威輕侮諸侯虧跂蹇之容故被鞍之禍隨服而亡所謂賀者在門弔者在閭也兵敗師破人皆弔之恐懼自新百姓愛之諸侯皆歸其所奪邑所謂弔者在門賀者在閭

**增說**唐柳宗元對賀者說柳子以罪貶永州有自京師來者既見曰余聞子坐事斥逐余適將唁子今余視子之貌浩浩然也能是善矣余無以唁敢轉以為賀柳子曰子誠以貌乎則可也然吾豈若是而無志者耶以戚戚為無益乎道故若是而已矣吾之罪大會上以寬和治天下故吾得在此凡吾之貶幸矣而又戚戚焉何哉

夫爲天子之吏謀畫無所陳而羣比以爲名蒙恥遇僂  
以待不測之誅苟人爾有不戰栗危厲惛然者哉吾  
嘗靜處以思獨行以求自以上不得自列於聖朝下無  
以奉宗祀近丘墓徒欲苟生幸存庶幾似續之不廢是  
以放蕩其心倡佯其形茫乎若升高以望潰乎若乘海  
而無所往故其容貌如是子誠以浩浩而賀我其孰承  
之乎嘻笑之怒甚乎裂眦長歌之哀過乎痛哭庸詎知  
我之浩浩非戚戚之尤者乎子休矣

淵鑑類函卷三百九

人部

淵鑑類函卷三百九

慶賀

望

卷之二

...

...

...

...

...

...

...

...

...

...

...

...

...

...

...

...

淵鑑類函卷三百十

人部六十九

薦獻

薦獻

**曾**說文曰薦進也

**原**曲禮曰士有獻於國君他日君

問之曰安取彼再拜稽首而後對

**增**內則曰適子庶

子祇事宗子宗婦衣服裘衾車馬則必獻其上而後敢

服用其次也若非所獻則不敢以入於宗子之門又

曰家富則具二牲獻其賢者於宗子玉藻曰凡獻於

君大夫使宰士親皆再拜稽首送之少儀曰其以乘

壺酒束脩一犬獻人則陳酒執脩以將命

薦獻二

**增**左傳曰鄭頤考叔有獻於公公賜之食又曰虞叔有玉虞公求旃弗獻既而悔曰匹夫無罪懷璧其罪吾焉用此以賈害也乃獻之下又曰孟獻子言於公曰臣聞小國之免於大國也聘而獻物於是有庭實旅百朝而獻功於是容貌采章誅而薦賄則無及也又曰晉敗楚於鄢陵王名子反謀穀陽豎獻飲於子反子反醉而不能見乃宵遁又曰子產相鄭伯以如晉晉侯未之見也子產使盡壞其館之垣而納車馬焉曰未知見時不敢輸幣亦不敢暴露其輸之則君之府實也非

薦陳之不敢輸也其暴露之則恐燥溼之不時而朽蠹以重敝邑之罪 又曰晉荀躒如周葬穆后籍談爲介王曰諸侯皆有以鎮撫王室晉獨無有何也籍談對曰諸侯之封也皆受明器於王室以鎮撫其社稷故能薦彝器於王晉居深山王靈不及其何以獻器 又曰韓宣子有玉環其一在鄭商宣子謁諸鄭伯子產弗與曰吾子得玉而失諸侯必不爲也若大國令而共無藝鄭鄙邑也亦弗爲也僑若獻玉不知所成 又曰王子朝用成周之寶珪於河津人得諸河上陰不佞以溫人南侵拘得玉者賣之則爲石王定而獻之與之東訾 又

曰蔡昭侯爲兩佩與兩裘以如楚獻一佩一裘於昭王  
子常欲之弗與三年止之蔡人固請獻佩於子常蔡侯  
歸說苑曰孔子之楚有漁者獻魚孔子不受獻魚者  
曰天暑市遠賣之不售思欲棄之不若獻之君子孔子  
再拜受謂弟子曰埽除將祭之弟子曰夫人將棄之今  
夫子將祭之何也曰吾聞務施而不腐餘財者聖人也  
今受聖人之賜可無祭乎又曰曾子衣敝衣以耕魯  
君使人往致邑焉曰請以此修衣曾子不受反復而往  
不受使者曰先生非求於人人則獻之奚爲不受曾子  
曰參聞之受人者畏人予人者驕人縱子有賜不我驕

也我能勿畏乎終不受孔子聞之曰參之言是以全其節 戰國策曰張儀爲秦破從連橫說楚王遺車百乘獻駭雞之犀夜光之璧於秦王 尹文子曰魏田父得玉徑尺鄰人曰山怪石也取置廡下明旦視之光射一室大怖反棄於野鄰人取獻魏王玉工曰此無價以當之五都之城僅可一觀王賜獻玉者千金長食上大夫之祿 方朔外傳曰漢東方朔從西邠國還得聲風木十枝長九尺出甜波以進武帝以賜羣臣年百歲者此木有疾則枝汗死則枝折此木千歲一温萬歲一枯朔曰臣見此枝三枯死矣 晉史曰虞嘯父武帝問卿初



不聞有所獻替對曰天時尚溫鰲

音祭

魚蝦鮓未可致尋

當有所獻帝大笑

鴻書曰齊武帝幸芳林園就虞悰

求味悰獻糲及雜殺數十輿大官不及也上欲求飲食

方不得後體不快悰僅獻醒酒鯖鮓一方而已

後魏

書曰郢州刺史韓務獻七寶牀象牙席詔曰昔晉武帝

焚雉頭裘朕常嘉之今務所獻亦此之流也奇麗之物

有乖素風可付其家

唐時大臣初拜官獻食天子名

曰燒尾蘇瓌獨不進

唐書曰李絳遷戶部侍郎帝以

戶部故有獻而絳獨無有何哉荅曰臣乃為陛下謹出

納烏有羨羸哉王播為鹽鐵使而事月進絳曰比禁天

下正賦外不得有他獻而播妄名羨餘願悉付有司帝  
曰善訖絳在位獻不入禁中 又曰元和初魏博田季  
安以五千緡助營開業佛祠崔羣以爲無名之獻不當  
受有詔却之 撫言曰唐庾承宣主文後六七年方授

金紫時門生李石先於內庭恩賜矣承宣拜命之初石  
以所服紫袍金魚拜獻座主 唐書曰黃巢之亂張濬

稱疾挾其母走商山僖宗西出衛士食不給漢陰令李  
康獻糗餌數百馱士皆厭給帝異之曰爾乃及是乎對  
曰臣安知爲此張濬教臣也乃急召濬至行在再進諫  
議大夫 鴻書曰吳越武肅王遣使於梁太祖太祖問

王好何物使者曰好玉帶駿馬太祖曰真英雄也選玉帶一名馬四賜之及忠懿王進寶犀帶於宋藝祖藝祖曰朕有三條與此不同汴河一條淮河一條揚子江一條俶大愧服 揮塵錄曰宋王薨字豐父守會稽童貫時方用事貫苦脚氣或云楊梅仁可療是疾豐父哀五十石以獻之後擢待制再任不歷貼職徑登次對惟豐父一人 宋李昭玘使陝西時延安小將車吉被誣爲盜昭玘察知無他吉後立戰功至皇城使相遇京師以名馬爲獻笑却之 賈似道專政李芾文天祥陳文龍陸逵杜淵張仲徽輩小忤意輒斥趙潛輩爭獻寶玉陳

奕至以兄事其玉工陳振民以求進元伯顏之取宋而還也詔百官郊迎以勞之平章阿合馬先半道謁伯顏解所服玉鈎條遺之阿合馬謂其輕已誣以平宋時取其玉桃盞阿合馬既死有獻此盞者帝愕然曰幾陷我忠良

薦獻三

**贈大龜**

大貝

尚書九江納錫大龜孔傳云尺二寸曰大龜出九江水中

尚書大傳夏成五

服外薄四海南海魚草珠珍大

純牛

文馬

周書成

貝鄭注所貢物也貝古以為貨

純牛牛之小者孔晁注曰卜盧盧之

夷貢獻卜盧純牛純牛牛之小者孔晁注曰卜盧盧之

丹砂

元玉

周書成王時四夷來貢

頭文馬十疋

人部

計盈額約卷三百十

薦獻

五

所出 夏成五服外薄四海主諸 白鵲 丹鵲 西京雜記

靈龜陰谷元玉康成注所貢物 雙高祖大悅厚報使者 王

閩越王獻高祖白鵲一雙高祖大悅厚報使者 王

青石帶 白環玳 魚豢魏畧曰漢陽嘉二年疏勒國王 帝王世紀西王母

及玳并貢燕地圖 火鼠毛 冰蠶繭 魏志景初二年

東方朔神異經曰南荒之外有火山晝夜火燃火中有 鼠重千斤毛長二尺餘細如絲可以作布恆居火中以

水逐而沃之乃死取緝其毛織以為布拾遺記曰冰 蠶長十寸有鱗角以雪霜覆之然後為繭其色五彩織

為文錦入水不濡投火不燎 雩都蔗 山陽梨 南康

唐堯世海人獻之以為黼黻 宜諸蔗味及彩色餘縣所 德明曰雩都縣土壤肥沃偏 魏武帝昔為兗州牧上書

無郡人珍之每歲以獻御 合枝李 同心梨 西京雜記葛洪曰

曰山陽郡美梨 謹獻甘梨三箱 呂光 吉光裘 昆吾劍

遠方各獻異果有合枝李 呂光 吉光裘 昆吾劍

時襄煌太守宋歆獻同心之梨 呂光 吉光裘 昆吾劍

十洲記東方朔曰天漢三年西國王使獻吉光裘  
列子周穆王征西戎獻昆吾之劍赤刃切玉如切泥

奔盧芳苾 祖梨蔓苔 拾遺記曰晉惠帝時祖梨國貢

形如麻奔盧國來獻 拾遺記曰晉惠帝時祖梨國貢

蔓苔色如金繁叢如雞卵投水中蔓延波瀾之上如火

宮人有幸者以金苔賜之夜月 康人桴苾 波弋荃蘼

漆盤中照燭滿室名曰夜月 康人桴苾 波弋荃蘼

周書成王時康人獻桴苾者其實食之宜子孔晁注曰

康人以西戎之別食芳苾即有身 洞冥記曰光和元

年波抵國亦名波弋國獻神精香草一名荃蘼亦名春

蕪一根而百條其枝間如竹節柔軟其皮如絲可為布

所謂春蕪布亦曰香荃堅密如冰統也 握 交趾玉橘

東野文瓜 馨香裏又有美味交趾有官長一人秩三

百石主歲貢御橘 王逸荔枝賦曰大哉聖皇處 西

戎古黃乘 大夏茲白牛 縞身目若金名曰古黃之乘

人部

薦獻

六

孔冕注犬戎西戎之遠者又大夏獻茲白林邑水

牛野獸也牛形象齒孔冕注大夏西北戎也

玉壺 波砥青金鏡 交州雜記太康四年林邑王范能

壺二口山海經曰堂夜之山多水玉即水精也 洞冥

記曰望蟾閣上有青金鏡廣四尺元光中波砥國獻照

見膽魁百鬼 不敢隱形

薦獻四 蕭爽 唐成公如楚有兩

弗與三年止之唐人竊馬 龍輔 魯昭公賜公衍羔裘

而獻子常子常歸唐侯 龍輔 使獻龍輔於齊侯王

名也 楊楯 宋樂祁使晉趙簡子 獻曝 有田父暨春東

作自曝於日不知天下之有廣廈 隩室 綿纊 狐貉 顧謂

其妻曰負日之暄人莫知者以獻吾君當有厚賞也 獻芹 嵇叔夜與山濤絕交書野人有快炙背美芹

**原**奉麋

楚樂伯射麋晉鮑癸當其後使攝叔奉麋獻焉曰以歲之非時獻禽之未至敢膳諸從者

**增**獻雉

魯叔孫穆子至庚宗遇婦人獻以雉齊還魯所宿庚宗之婦人獻以雉

**原**左牽

夫

執纜左牽之

**右牽**

牛則執鞅馬則執鞅皆右牽之

**致馬資**

獻金王曰致馬資於有司

**佛鳥首**

獻鳥者佛其首為其喙害人佛戾也

**執以將命**

獻人禽加於一雙則執一

雙以將命委其餘

**受乃問名**

守犬田犬則受攢者既受乃問犬名

**不獻魚鼈**

禮水潦降不獻魚鼈

**不及車馬**

父母在饋獻不及車馬

**不以為禮**

生天地

不養君子不以為禮

**增**不敢以聞

凡於尊者有獻而不敢以聞注不取直言獻尊者如云贈

從者之類

**原**甲則奉冑

甲若以前之則袒橐奉冑命無以前之則袒橐奉冑

**器則**

**執蓋**

**弓則屈鞬**

弓則以左手屈鞬執拊注鞬弓衣也

**劍則啓櫝**

劍則啓櫝

蓋襲之加夫撓與劍焉注櫝劍匣夫撓劍衣也

**增**進劍者左首

**進戈者前**

人部



罇

前其罇後其刃

**原**獻甲者執冑

獻杖者執末

**增**進牙

戟者前鋟

進几杖者拂之

**原**獻粟者執右契

獻

米者操量鼓

獻車馬者執策綏

獻民虜者操右袂

獻熟食者操醬齊

獻田宅者操書致

居山不以

魚鼈為禮

居澤不以豕鹿為禮

干謁

**增**集韻曰古者未有紙削竹木以書姓名故謂之刺後

以紙書故謂之名紙唐李德裕為相貴盛人務加禮改

具銜候起居之狀謂之門狀 傅勝傳注曰涓人如謁

者涓潔主潔除之人也 漢書曰莫為我先注先容也

易例曰見情者獲直往則違 詩曰既見君子我心  
則降 又曰既見君子云何不喜 又曰既見君子為  
龍為光 禮記曰聞始見君子者辭曰某固願聞名於  
將命者敵者曰某固願見罕見曰聞名亟見曰朝夕  
儀禮士相見曰聞吾子稱贄敢辭

干謁二

**增**左傳曰子產相鄭伯以如晉曰敝邑不敢寧居來會  
時事逢執事之不聞而未得見又不獲聞命未知見時  
論語曰陽貨欲見孔子歸孔子豚孔子時其亡也而  
往拜之 孟子曰墨者夷之因徐辟而求見孟子 秦

本記曰衛鞅因景監求見孝公。史記曰平原君謂魯

仲連曰勝請爲紹介而見之於先生。謂魏新垣衍也。戰國策

曰蘇秦曰楚國之食貴於玉薪貴於桂謁者難見如鬼

王難見如帝令臣食玉炊桂因鬼見帝其可得乎。**原**

漢書曰魏勃欲求見齊相曹參家貧無以自通常獨早

埽齊相舍人門外舍人怪之以爲物而伺之得勃勃曰

願見相君無因故爲子埽欲以求見於是舍人見勃曹

參因以爲舍人。漢武帝舉賢良文學材力之士東方

朔上書高自稱譽上偉之令待詔公車。暴勝之爲直

指使者聞雋不疑賢至渤海遣使請與相見不疑冠進

賢冠帶櫛具劔佩環玦褱衣博帶盛服至門上謁門下  
欲使解劔不疑曰劔者武備不可解吏白勝之開閣延  
請衣冠甚偉勝之躡履出迎

**增**

朱雲成帝時不復仕

常居鄆田時出乘牛車從諸生所過人敬事焉薛宣爲  
丞相雲往見之宣備賓主禮因留雲宿從容謂曰在田  
野無事且留我東閣可以觀四方奇士雲曰小生迺欲  
相吏耶宣不敢復言

後漢陳遵居長安近臣貴戚皆

貴重之牧守當之官及郡國豪傑至京師者莫不到門  
王符字節信安定人度遼將軍皇甫規解官歸安定  
鄉人有以貨得鴈門太守者亦去職還家書刺謁規規

卧不迎既入問卿前在鴈門食鴈美乎有頃白王符在門規素聞符名驚遽而起衣不及帶屣履出迎援符手而還與同坐極歡時人爲之語曰徒見二千石不如一縫掖言書生道義之爲貴也 趙咨字文楚東郡人靈帝時拜東海相之官道經滎陽令燉煌曹嵩咨之故孝廉也迎路候謁咨不爲留嵩送至亭次望塵不及謂主簿曰趙君名重今過界不見必爲天下笑即棄印綬追至東海謁咨畢辭歸家爲時所重如此 許劭字子將嘗到潁川多長者之遊唯不候陳寔又陳蕃喪妻還葬劭獨不往或問之曰太丘道廣廣則難周仲舉性峻峻

則少通故不造也

原高彪嘗從馬融欲問大義融疾

不見乃覆刺遺融書曰彪望風慕教久矣故不待介者造君子之門冀得一見龍光敘腹心之願而乃養痾傲士如此昔者周公兄父文武九命作伯以居華夏猶握沐吐餐以接白屋之士天下歸德歷載邈矣今君不能相見宜哉融省書大慙遣人辭謝追請徑去不還

彌衡字正平孔融愛其才數稱於曹操言衡欲詣操操大喜勅門者有客便通待之極宴衡著布單衣疎巾手持三尺棡杖坐大營門以杖捶地大罵吏白外有狂生言語悖逆操怒謂融曰彌衡豎子孤殺之如雀鼠耳顧

此人素有虛名遠近將謂孤不能容之今送與劉表視當何如衡臨發衆人爲之祖道乃更相戒曰衡悖虐無禮今因其後至咸當以不起折之也及衡至衆人莫肯興衡大號衆問其故衡曰坐者爲塚卧者爲屍屍塚之間能不悲乎

**原**

禰衡尚氣剛傲好矯時慢物建安初

自荊州北遊許都書一刺懷之漫滅而無所遇或問之曰盍從陳長文司馬伯達乎衡曰卿欲使我從屠沽兒輩耶

**增**

龐德公時諸葛亮每至德公家獨拜牀下德

公初不令止司馬德操嘗詣德公值其渡沔上先人墓德操徑入室呼德公妻子使速作黍徐元直向云當來

就我與德公談其妻子皆羅拜堂下奔走供設德公還直入不知何者是客也 別傳曰劉綜欲候司馬徽先

使左右問其存亡徽鋤園左右問司馬君所徽曰我是徽頭面醜陋聞者罵之曰即欲求司馬公何等田奴而稱徽更刷頭飾服而出左右叩頭謝之 种拂拜苑令

時南陽郡吏好因休沐游戲市里拂出逢之必下車公謁以愧其心 秦宓字子軌有與書曰貧賤困苦何可

終身宜一來與州尊相見宓荅曰僕處乎隴畝之中誦顏氏之簞瓢詠原憲之蓬戶翱翔林澤聽元猿之悲吟察鶴鳴於九臯斯乃僕得志之秋何困苦之感哉 魏



時苗字德曾爲壽春令蔣濟爲治中苗初至謁濟濟素嗜酒適會其醉不能見苗恚恨刻木爲人書曰酒徒蔣濟置之牆下旦夕射之 王粲蔡邕見而奇之邕嘗賓客盈座聞粲在門倒屣迎之粲至年旣幼弱容狀短小一座盡驚 張璠時廣平太守盧毓到官吏白承前致版謁毓曰張先生豈版謁可飾哉但奉書致羊酒 吳錄曰孟宗爲豫章太守謂倉掾曰君昔負太守一刺寧識之否掾曰不識宗曰吾昔家貧親老爲官資運以刺詣君感見發遣何乃久屈耶 吳虞翻年十三客有候其兄者不過翻翻與書曰琥珀不取腐芥磁石不受曲

鍼過而不存不亦宜乎客奇之 晉劉麟之字子驥尚

質素車騎將軍桓沖聞名辟爲長史固辭沖嘗到其家  
麟之於樹條桑使者致命麟之曰使君旣枉駕光臨宜  
先詣家君沖愧詣其父 晉書曰桓溫謀不軌郗超爲

之謀主謝安嘗與王文度共詣郗超日旰未得前文度  
便欲去安曰不能爲性命忍俄頃耶其權重當時如此

又曰宋纖沈靜不與世交隱居南山太守楊公晝其  
像於閣上出入視之酒泉太守馬岌具威儀造焉不見  
岌歎曰吾今知先生人中之龍也 謝遏夏日嘗仰臥

謝公清晨卒來不暇衣冠出屋外方躡履問訊公曰汝

可謂前倨而後恭 王導子恬性傲誕不拘禮法謝萬嘗詣恬既坐少頃恬便入內萬以爲必厚待已殊有喜色恬久之乃沐頭被髮而出據胡牀於庭中曬髮神氣傲邁竟無賓主之禮萬悵然而還 桓元嘗詣王忱通人未出乘輦直進忱對立便鞭門幹元怒去之忱亦不留 范汪字汝平初爲桓溫安西長史溫征蜀還復署爲長史江州刺史皆不就自請還朝求爲東陽太守溫甚恨之後爲安北將軍溫北伐汪以失期免爲庶人汪屏居吳郡後至姑孰見溫時方起屈滯以傾朝廷謂汪詣已傾身引望曰范公來可作太常耶汪至溫謝其遠

來意汪實來造溫恐以趨時致損乃曰亡兒瘞此來視  
之溫殊失望而止 宋關康之隱居南昌顏延之等候  
見散髮被黃布帕席松葉枕白石一塊而卧了不相盼  
延之等咨嗟而退不敢干也 齊張融欲詣吏部尚書

何戢誤通尚書劉澄下車入門乃曰非是至戶望澄又  
曰非是既造席視澄曰都自非是乃去 梁陸倕傳曰  
任昉為中丞簪裾輻輳預其宴者號為龍門遊 何思  
澄天監間敕徐勉舉學士入華林撰通略勉舉思澄顧  
協劉杳王子雲鍾嶼等五人以應選思澄重交結分書  
與諸賓朋校定而終日造謁每宿昔作名刺一束曉便

命駕朝賢無不悉狎狎處即命食有人方之婁護欣然  
當之投晚還家所齎名刺必盡 後魏任城王澄子順  
為給事中時尚書高肇帝舅權重天下順曾懷刺詣肇  
門門者以其年少荅云在坐大有客不肯為通順叱之  
曰任城王兒可是賤也及見直往登牀捧手抗禮羣公  
先達莫不怪懼而順辭吐傲然若無所覩肇謂衆曰此  
兒豪氣尚爾況其父乎澄聞之大怒杖順數十 北齊  
李元忠初神武東出元忠乘露車載素筆濁酒奉迎神  
武聞其酒客未即見之元忠下車獨酌擘脯食之謂門  
者曰本言公招延賢雋今國士到門不能吐哺輟洗其

人可知還吾刺勿復通門者以告神武遽見之引入觴  
再行元忠上車取箏鼓之長歌慷慨謂神武曰天下形  
勢可見明公猶欲事爾朱乎神武曰富貴皆由他安敢  
不盡節元忠曰非英雄也因進縱橫之策深見喜納

魏愷自散騎常侍遷青州刺史固辭文宣怒由是積年  
沈廢後遇楊愔於路自陳愔曰咸由中旨愷曰雖復零  
雨自天終待雲興四嶽愔欣然數日除霍州刺史 齊  
盧思道欲詣和士開恐爲人所見乃未明而行比至其  
門立者衆矣盧駐轡望之曰彼何人森然與槐柳齊列  
因鞭馬疾去 唐高士廉備禮請見朱桃椎與之語不

荅瞪目而去士廉再拜曰祭酒其使我以無事治蜀耶  
乃簡條目州遂大治 王績字無功絳州人刺史崔喜  
請見荅曰奈何坐致嚴君平耶卒不詣杜之松故人也  
為刺史請績講禮荅曰吾不揖讓邦君門談糟粕棄醇  
醪也 唐書曰宋璟遷左臺御史中丞劾二張下獄后  
俄詔原之勅二張詣璟謝璟不見曰公事公言之若私  
見法無私也顧左右歎曰吾悔不先碎豎子首而令亂  
國經 又曰明皇欲相崔隱甫謂曰牛仙客可與語卿  
嘗見否對曰未也帝曰可見之隱甫終不詣他日又問  
對如初帝乃不用隱甫所至潔介自守以彊正稱 又

曰陸龜蒙至饒州三日無所詣刺史蔡京率官屬就見  
龜蒙不樂拂木去 甫里先生傳曰陸龜蒙性不喜與  
俗人交雖詣門不得見也不置車馬不務慶弔內外姻  
黨伏臘喪祭未嘗及時往或寒暑得中體佳無事時則  
乘小舟設蓬席賣一束書茶竈筆牀釣具權船郎而已  
所詣小不會意徑還不留雖水禽決去山鹿駭走之不  
若 李白開元中謁宰相封一板上題曰海上釣鼈客  
李白相問曰先生臨滄海釣巨鼈以何物爲釣絲曰以  
風浪逸其情以乾坤縱其志以虹霓爲絲明月爲鉤問  
何物爲餌曰以天下無義氣丈夫爲餌時相竦然 韋



貫之爲長安丞或薦之京兆尹李實實舉笏示所記曰  
此其姓名也與我同里素聞其賢願識之而進於上或  
告曰子今日詣實明日賀者至矣貫之唯唯不往韓  
愈王仲舒碑曰仲舒家江南讀書著文其譽藹鬱當時  
名公皆折官位輩行願爲交詩話曰唐韓愈皇甫湜  
一代龍門牛僧孺攜所業謁之其首篇說樂即捲未嘗  
開問曰且以拍板爲甚麼曰樂句二公大稱賞因此名  
振又曰唐牛僧孺赴舉之秋嘗投贄於劉補闕禹錫  
對客展卷飛筆塗竄其文歷二十餘歲劉轉汝州牛出  
鎮漢南枉道汝州駐旌信宿酒酣賦詩劉方悟往年改

公文卷牛詩曰粉署爲郎四十春今來名輩更無人休  
論世上升沈事且鬪尊前見在身珠玉會應成咳唾山  
川猶覺露精神莫嫌恃酒輕言語曾把文章謁後塵劉  
和云昔年曾作漢朝臣晚歲空餘老病身初見相如成  
賦日後爲丞相埽門人追思往事咨嗟久幸喜清光笑  
語頻猶有當時舊冠劍待公三日拂埃塵牛吟和詩前  
意稍解曰三日之事何敢當焉宰相三朝後主印可以  
升降百司也於是移宴竟夕方整前驅劉乃戒其子曰  
吾成人之志豈料爲非汝輩進修守中爲上 令孤峘  
爲吉州刺史時齊映觀察江西按部及州峘輕映後出

至迎謁頗怏怏從容步進不抹首屬戎器映以爲恨擿  
峒事貶衢州司馬 五代唐趙鳳與于嶠俱在翰林相

善鳳後爲相嶠以本名出鳳上而不用數非斥時政尤  
訛鳳鳳銜之因事左遷嶠秘書少監嶠因醉往見鳳鳳  
知其必不遜辭以沐髮嶠諾直吏又溺於從者直廬而  
去吏白嶠溺於客次且諾鳳鳳奏聞明宗奪嶠官長流  
湘山野錄曰王沂公曾爲布衣時以所業贄呂文穆

蒙正中有早梅詩其警句云雪中未論和羹事且向百  
花頭上開文穆曰此生次第已安排作狀元了做宰相  
矣已而果然 宋御史中丞孫抃薦吳中復爲監察御

史初不相識或問之拈曰昔人恥爲呈身御史今豈有  
識面臺官耶 名臣遺事曰宋諫議大夫張師德謁向  
文簡敏中曰師德兩詣王相公門皆不得見恐爲人輕  
毀望公從容明之一日方議知制誥公曰可惜張師德  
向公曰何謂公曰累於上前說張師德名家子有士行  
不意兩及吾門狀元及第榮進素定但當靜以待之耳  
若奔競使無階而進者當何如也向公方以師德之意  
啓之公曰某處安得有人敢輕毀人但師德後進待我  
淺也向公自稱師德適有關望公弗遺公曰第緩之使  
師德知聊以戒貪進警薄俗也 范仲淹在睢陽掌學

有孫秀才者索遊上謁文正贈錢一千明年孫生復謁  
文正又贈一千因問何爲汲汲於道路孫生戚然動色  
曰母老無以養若日得百錢則甘肯足矣文正曰吾觀  
子辭色非乞客也吾今補子爲學職月可得三千以供  
養子能安於學乎孫生大喜於是授以春秋後十年有  
孫明復先生以春秋授學者道德高邁朝廷召至乃昔  
日索遊孫秀才也 李垂爲知州還朝李康伯謂曰子  
文學議論稱於天下諸公擬用知制誥但宰相未嘗相  
識盍往見之垂曰若我昔謁丁崖州乾興初已爲翰林  
學士矣焉能趨炎附熱看人着睫以冀推挽乎出知均

州 蔡文忠公齊大中祥符登進士第為狀元山東人  
賈同亦名士也與公同州部累往謁公值公飲酣不得  
見賈乃留詩一絕云聖君寵厚龍頭選慈母恩深鶴髮  
隨君寵母恩俱未報酒如為患悔何追公因此戒酒

紀聞曰宰相自唐以來謂之禮絕百寮見者無長幼皆  
拜宰相平立少垂手扶之送客未嘗下階客坐稍久則  
吏從旁喝相公尊重客跋階起退及富鄭公為相雖微  
官布衣謁見皆與之抗禮送之及門視其上馬乃還自  
是羣公稍效之 張載少喜談兵欲結客取洮西之地  
年二十一以書謁范仲淹警之曰儒者自有名教可樂

何事於兵因勸讀中庸

謝顯道云明道先生坐如泥

塑人及至接人則渾是一團和氣

程氏遺書曰宋程

頤與韓持國范夷叟泛舟有一官上書謁大資程曰大

資居位却不求人迺人倒來求已是甚道理夷叟曰求

薦舉常事也程曰不然只爲曾有不求者不與來求者

與之遂致人如此持國便服

邵康節先生墓誌曰康

節居洛士人之道洛者不入公府而必之先生之廬

李周登進士通判施州神宗以近臣孫固薦召對謂

曰知卿不游權臣識今執政乎對曰不識也翼日語固

曰李周樸忠之士也

童蒙訓曰宋滎陽公呂希哲自

少官守處未嘗干人舉薦以爲後生之戒仲父舜從守  
官會稽或議其不求知曰勤於執事乃所以求知也  
聞見錄曰宋文彥博判北京有汪輔之者新除運判爲  
入辨急初入謁潞公方坐廳事閱謁刺置案上不問入  
宅久之乃出輔之已不堪旣見公禮之甚簡謂曰家人  
頃令沐髮忘見運判勿訝輔之沮甚舊例監司至之三  
日府必作會公故罷之輔之移文定日檢按府庫通判  
以次白公公不荅是日內外事並不許通輔之坐都廳  
吏白侍中家宴匙鑰不可請輔之怒破架閣庫鎖亦無  
從檢按也密劾潞公不治神宗批輔之所上奏付潞公



有云侍中舊德故煩卧護北門細事不必勞心輔之小  
臣敢爾無禮將別有處置之語潞公得之不言一日會  
監司曰老謬無治狀幸諸君寬之監司皆愧謝因出御  
批以示輔之輔之皇恐逃歸託按部以出未幾輔之罷  
元豐間文彥博以太尉留守西京未交印先就第廳  
坐見監司府官唐介參政之子義問爲轉運判官退謂  
其客尹煥曰先公爲臺官嘗言潞公今豈挾以爲恨耶  
某當避之煥曰潞公所爲必有理姑聽之明日公交府  
事以次見監司府官如常儀或以問公公曰吾未視府  
事三公見庶僚也旣交印河南知府見監司矣義問聞

之復謂煥曰微君殆有失於潞公也 蘇軾在黃州邀

一隱士相見但視傳舍不言而去坡曰豈非以身世為

傳舍耶 熙寧中詔近臣舉御史舉者意屬王巖叟而

未及識或謂可一往見笑曰是所謂呈身御史也卒不

見 神宗嘗對章惇稱張安道之美問惇識否惇退以

告呂惠卿惠卿明日與安道同行入朝告以上語且曰

行當大用矣安道縮鼻不對其夕安道適與客坐惇呵

引到門謁人安道便謝曰素不相識不敢受謁惇慙忤

而退 章惇嘗事邵康節及為相欲用康節子伯溫伯

溫曰豈不欲見先公於地下耶到則先就部擬官而後

見宰相

龔丈弟大壯少有重名清介自立從兄官河

陽曾布欲見之不可得乃往謁丈邀之出從容竟日題

壁間有得見兩龔之語

李朴自為教授天下高其名

蔡京俾所厚道意許以禁從拒之中書侍郎馮熙載欲

邂逅見朴笑曰不能見蔡京焉能邂逅馮熙載耶

獻

徵錄曰明李承芳登進士李西涯謂之曰子盍與錢與

謙謁閣老徐先生乎承芳曰吾恐張師德見薄於王且

矣廷試榜出與謙及第承芳列名同進士出身拜大理

評事

又曰明許應元嘉靖壬辰舉進士執政者知公

欲一見應元不往曰吾始仕也而當僂僂鼎貴之門冒

謁于進哉 明詞林人物考曰李淑字師孟嘉靖庚戌  
進士始淑之奏南宮捷也相嚴嵩曰聞楚有才士李某  
者吾鄉人也能一見我乎公遂巡謝弗肯往以故當射  
策夏太宰邦謨奇而薦之鼎甲嵩固下之 又曰陶大  
臨字虞臣嘉靖丙辰廷試第二人授翰林院編修故相  
嚴嵩耳公名欲致之門下數遣其子世蕃候之陶戒門  
者以他出應之第一刺報而已 獻徵錄曰明隆慶時  
劉淞試南宮下第大學士李公得其遺卷心奇之欲致  
一見不可曰落第書生豈可自呈身相門耶張居正欲  
致之東閣亦拒不相見

干謁三

**原**相府

卿門

范睢為須賈御人相府曰我為君先通

門書刺

奏刺

漢高帝紀有謁者自書刺以言爵里

淵增題鳳

登龍

嵇康與呂安善每下詳干謁二夏侯

不人題門上作鳳字而後來不覺猶以為欣鳳字凡鳥

也王維詩到門不敢題凡鳥看竹何須問主人李膺

御李識荆荀爽嘗就謁李膺

其容接名為登龍門矣但願一識韓荆州依劉仰

韓王粲在荆州嘗依劉表北韓倒屣擁篲上詳干

邕事魏文侯擁篲迎朋友握手歡如平生又史記邾

公擁篲又莊子曰先驅請列弟子之座而受業又漢太

操被篲以待門庭 掘衣 曳裾趨謁必慎唯諾 鄒

陽曰何王之門  
不可曳長裾乎

**原**激張儀

奇彭義

張儀謁蘇秦  
門下不為通

又不得放去數日方見之坐於堂下以激儀也  
蜀彭

客罷與卿談賓罷請

**增**揖侍郎

參留守

韓愈寄崔

階揖侍郎歸舍日未敵

又贈盧仝詩玉川先生洛城

裹杜門不出動一紀勸參

高軒過

上詳干謁二陳太丘事

坐上

春風

門外積雪

侯師聖云朱公揆見明道於汝歸謂

游定夫楊龜山初見伊川瞑目而坐二子侍立既覺顧

謂曰賢輩固在此乎日既晚且休矣及出門外之雪

見以託名

步隲字子山與衛旌

尺一會稽焦征羌豪縱二子懼為所侵乃共修刺奉瓜謁征

羌不時通旌欲去隲曰畏之而來非慕義也屈何傷乎

不得見壹以非陟無託名者乃日到門陟許通尚卧未

人部

詩經卷三十一

干謁

王

起徑入上堂曰竊伏西州承高風久矣乃今方遇而忽  
然奈何命也因舉聲哭陟知非常人乃起延悟大奇之

### 不顧太守

### 遽迎縫掖

趙壹為羊陟所稱名動京師  
西選過弘農候太守皇甫規

門者不即通壹遂遁規知是壹大驚追  
之壹不顧而去下詳干謁二王符事

### 增一葉濃陰

### 一株桃李

鄭大穆書于頓云分千樹一葉之影即  
是濃陰減四海數滴之泉便為膏澤

談

藪王冷然上裴耀卿書曰拾遺補闕寧  
有種乎僕不佞亦相公一株之桃李也

### 原未嘗修刺

### 不肯受索

後漢井丹字大春博學故京師語曰五經  
紛綸井大春注清高未嘗修刺候人梁松

請丹不肯見後遂隱遁蕭望之王仲翁俱欲謁見霍  
先光自上官桀事後出入自備士當見者皆露索去刀

兵兩吏挾持望之獨不肯受索

### 增行闔者杖遺闔

曰不願見非周公握髮之禮  
者縑上裴之禮事詳下額氏家訓  
唐潘炎為翰林學

遺以三百縑其他可知也乃勸炎避位  
百縑炎妻劉知之曰豈有京尹願一見

### 原不避寒暑

不師道德

張湯造請諸公不避寒暑

**將軍肯臨**

子高左顧

田蚡傳曰將軍乃幸肯臨况魏其

淮南

不耐造請

不行報謝

張敷曰臣性不耐造請禹終不

行報

方進徑入

諸葛問闊

前漢翟方進內謁徑入

云本傳曰問

載刺盈車

書午在門

本傳曰郭林宗

之載刺常盈車

遜齋編曰李安義者謁富人鄭生辭

頭耳此亦昔

倒執手版

盡投苦海

王坦之見桓温

人題鳳之意

撫言曰尊光業有一巨皮箱

顏氏家訓

温

凡投贊有可嗤者

即投其中號苦海

顏氏家訓

温

公客榜

顏氏家訓曰昔者周公一沐三握髮一飯三吐

教之家

闍寺無禮或以主君寢食嗔怒拒客未通江南

人部

尚監百

干謁



深以為恥黃門侍郎裴之禮好敬賓客或有此輩對賓

杖之僮僕引接周旋俯仰莫不肅敬與主無別司馬

溫公作相日親書榜揭於客位曰訪及諸君若覩朝政

與同僚商議擇可行者進呈候旨行之若但以私書寵

喻終無所益若光身有過失欲賜規正即以通持書簡

分付吏人令傳入光得內自省訟佩服終身至於整會

官職差遺前雪罪名凡干身計並請一面進狀光得與

朝廷眾官公議施行若在私第 虬蟻之援 蟄蟲之

垂訪不請語及其再拜謹白 化韓昌黎題張中丞傳後外無蚍蜉蟻子之援 劉賓

客集警諸蟄蟲坯戶而死者與木槁死亦無以異矣

春雷一震必欣然翹首與生為徒況有 申叔乞糧

吹律者名東風以薰之其化也益速 魯公乞米 左傳吳中叔儀乞糧於魯公孫有山氏曰佩

父視之對曰梁則無矣租則有之若登首山以呼曰庚 矣乎則諾 頰魯公乞米帖云拙於生業舉家食粥而 已數月今又罄矣實用憂煎詩曰日 飢虎餓麟 攀 典春衣非為酒舉家食粥已多時

驥仰鵬宋史檀珪求祿不得與王僧虔書曰書牘一隙遂不荷潤蟬腹龜腸為日已久飢虎能赫人遠

與肉賊麟不噬誰為落毛駱賓王三百名利奴

文攀驥逸而無由仰鵬飛而自失馮盛遇於道各攜一囊杞發盛囊

千重鐵甲顏有墨一丸杞大笑盛正色曰天峰煤和針

魚腦入金谿子手中錄離騷古本比公曰提綾文刺三

百為名利奴顏當執勝已而披杞囊果是三百刺唐

進士揚光遠遊謁王公之門干索權要之族未嘗自足

稍有不便多誹謗常遭撻辱畧無改悔皆云揚光遠

願厚如干天下善士願見鄉貢進士通名韓墓志曰王適

重鐵甲聞李將軍喜士乃踏門曰天下善士王適願見將軍白

事金樓子有舉子能為詩每通名刺稱鄉貢進士黃

居難字樂地欲自比宋廣平投梅花賦白樂天披

白居易字樂天也

芳草詩劉禹錫上權舍人書昔宋廣平之沈下僚也蘇

蘇盛稱之自是乃列於文人之目白樂天未冠以文

謁顧况况觀姓名熟視曰長安米貴居大不易乃披卷

人部

詞蓋頁名卷三十一

干謁

言

讀其芳草詩野火燒不盡春風吹又生歎曰  
吾謂斯文遂絕今復得子矣前言戲之耳

### 干謁四

**端典謁**

禮問士之子長曰能典謁矣主賓客謁見之事

**將命**

論語孺悲欲見孔子將命者出

戶**寺人**

詩未見君子寺人之令

**闈人**

韓文足三及門而闈人辭焉

**七介**

禮諸侯七介以相見也

**三擯**

又卿為上擯大夫為中擯士為下擯

**上謁**

張耳傳耳餘土

**原先容**

唐張行成傳曰古今用人必因某介若無成者無先容也

**無津**

陶侃

傳范逵謂侃曰欲仕無依有託孤雲獨無依願

**無依**

文選貧士詩萬族各願

有謁漢書願

**恥干謁**

少陵詩獨取事干謁

**垂採摘**

王維詩幸堪調鼎用

願君垂

**可攀援**

昌黎送進士劉師服詩時節不可駢親交可攀援

**願望履**

幕莊子願望履幕下

**願枉車騎**

信陵君傳侯生謂公子曰臣有客在市屠中願枉車騎過

之

承顏下風

陸士龍詩

曠若見日

東漢袁紹傳曠若開雲見日何喜如之

侯門掉臂

郗康節詩侯門見說深

朱門隨肩

杜詩

朱門未開鎖我

暗投先容

鄒陽書明月之珠夜光之璧以暗投人於道

劍相盼者何則無因而至前也蟠木根抵輪

侯奔

走

韓愈送李愿序伺候於公卿之門奔走於

有叩我

門杜詩有客叩我

肯訪老翁

又詩肯訪浣花老翁無與奴白飯馬青芻

雨師未

知李寓菴詩丘園有

波臣求活

莊子莊周家貧往貸粟於

監河侯監河侯曰諾我將得邑金將貸子可乎莊曰

周昨來有中道而呼者顧視車轍中有鮒魚焉曰我東

海之波臣也君豈有升斗之水而活我哉周曰諾我且

南遊吳越之王激西江之水以迎子可乎鮒魚忿然作

未忘燃灰

唐羅隱詩宜室

人部

言部

干謁

夜間如有問可  
能全忘未燃灰

誰為乞火

杜牧之詩自愧掃  
門士誰為乞火人

籠中

藥石

唐史元澹博學及進士第累遷通事舍人秋仁傑  
器之嘗謂仁傑曰譬富家儲積以自資也願以小

朽出茵芝

蘇軾詩枯朽  
猶能出茵芝

人備一藥石可乎仁傑  
笑曰君正吾藥籠中物

神奔競

嘉祐中未有謁禁士人爭馳騫請託有一人  
號望火馬又一人號曰遊神言日有奔競

鉛刀一割

晉書譙王承曰公未見  
知耳鉛刀豈無一割

廣廈萬間

杜甫茆  
屋為秋

風所破歌安得廣廈千萬間大庇天  
下寒士俱歡顏風雨不動安如山

歸鳥赴林

曹子  
建贈

白馬王彪詩歸鳥赴  
喬林翩翩厲飛翼

飛燕巢屋

古詩願為雙飛  
燕銜泥巢君屋

連

城高山

唐文粹曰連城之  
迺進高山之

珍俟楚文而  
操待鍾期而後發

入州出谷

又

八州無為言之侶  
出谷罕求聲之援

施陽援溺

又曰施一陽於剝極之  
餘援眾溺於坎深之下

拯陪醫疾

又曰陪者思起必諄而求  
拯疾者思愈必呻而求醫

求出願濯

杜

之文墜井者求  
出執熱者願濯

相薦自謀

杜荀鶴詩相知不  
相薦何以自謀身

舊知

為學

鄭谷感懷投時相詩丞相舊  
知為學苦更教何處貢篇章

應念下寮

羅隱詩  
遺簪墜

珥慮留念門客  
如今只下寮

迹雖阻於登龍

心竊希於附驥

勉驢技之一鳴

希馬價之三倍

敢憑蟠木之先容

輒效錐囊之自薦

雖寒菊自芳於籬下

而苦李

誰念於道旁

幸侍下風聞欬唾之音

莊子

伏拜賓阼

通爵里之刺

魏志

祁公用則所舉必名世流

司馬出

則其徒有行道志

傳和凝之衣鉢殊愧前修

備狄

相之參苓願從今始

向來辦香之敬直為南豐

此

去翹材之延願陪東閣

三吐哺而下白屋昔者見之

人部

詩經

千謁

卷

一舉手而轉清波今其時矣 月明繞樹自憐烏雀

之何依 海上問津或謂斗牛之可訪 牛鐸至微荀

令君取以調樂 爨桐無用蔡中郎識其中琴 叩角

而歌白石聊假此以干齊 築臺而識黃金猶庶幾於

始隗 說項斯之詩於到處幸已不遺 吹揚雄之賦

以上天更期有遇 所求易與巢林之鷦不過一枝

安敢負知伏櫪之驥猶思千里 文穆取人才多夾袋

之所蓄 元獻待寒士至樽酒以相歡 月華先得莫

知近水之樓臺 雲廈不棲更傍誰家之門戶 蟠木

爲萬乘之器必資根柢之容 祥金躍大冶之爐敢作

鎮鄒之想 效王巖叟之爲客誓不出於他門 持陳  
師道之辨香期力酬於知己

干謁五

**補**詩唐孟浩然詩曰鄉曲無知己朝端乏親故依誰爲  
揚雄一薦甘泉賦 韋應物訪李廓不遇詩曰九日馳  
驅一日閒尋君不見又空還怪來詩思清人骨門對寒  
流雪滿山 韓愈詩曰大匠無棄材尋尺容有施況當  
營都邑杞梓用不疑 又詩曰齷齪當世士所憂在飢  
寒願辱太守薦得充諫諍官排雲叫閭闔披腹呈琅玕  
致君豈無術自進誠獨難 李賀年七歲以長短之製



名聞京華時韓愈與皇甫湜覽賀作奇之因連騎造門  
求見賀總角荷衣而出二公不之信因令面賦一篇賀  
承命欣然操觚染翰旁若無人名所作曰高軒過二公  
大驚詩曰華裾織翠青如蔥金環壓轡搖瓏瓏馬蹄隱  
耳聲隆隆入門下馬氣如虹云是東京才子文章鉅公  
二十八宿羅心胷元精耿耿貫當中殿前作賦聲摩空  
筆補造化天無功龐眉書客感秋蓬誰知死死草生華風  
我今垂翅附冥鴻他日不羞蛇作龍 劉長卿詩曰鐵  
衣雖正澀寶刀猶可試儻遇拂拭恩應知轉犀利 温  
庭筠詩曰折簡能榮瘁遺簪莫棄捐韶光如見借寒谷

變風煙

杜牧詩曰常思掄羣才以爲國家治譬如匠

見木礙眼皆不棄楛楸與棟梁施之皆有位忽然植明  
堂一揮能力致 李商隱爲彭陽公令狐楚從事彭陽  
之子絢繼有韋平之拜惡商隱從鄭亞之辟以爲忘家  
恩疎之重陽日謁令狐絢不見商隱留詩於其廳事絢  
見之乃補太學博士尋爲東川柳仲郢判官罷歸客滎  
陽卒詩曰曾共山公把酒卮霜天白菊正離披十年泉  
下無消息九日尊前有所思不學漢臣裁首著空教楚  
客詠江蘼郎君官貴施行馬東閣無因再得窺 李吉  
甫之父徵時以一絕投維揚都護宋甄大夫宋殊無意

李後生吉甫吉甫節判青州有舉子吳武陵詣府投獻  
並不禮之武陵遂書前詩以獻吉甫厚賂之請爲寢默  
詩曰十處投人九處違家鄉無里又空歸嚴霜昨夜侵  
人骨誰念高堂未授衣 宋呂蒙正少貧訪謁不遇詩  
曰十謁朱門九不開滿頭風雪却回來歸家羞覩妻兒  
面撥盡寒爐一夜灰 范彥能贈張徐州謾詩曰田家  
採樵去薄暮方來歸遠聞稚子說有客款柴扉儻從皆  
珠玉裘馬悉輕肥軒蓋照墟落傳瑞生光輝疑是徐方  
牧旣是復疑非思舊昔言有此道今已微物情棄疵賤  
何獨顧衡闔恨不共雞黍得與故人揮懷情徒草草淚

下空霏霏寄書雲間鴈爲我西北飛  
程曉嘲熱客詩  
曰長夏三伏時道里無行車閉門避暑卧出入不相過  
只今襪襪子觸熱到人家主人聞客來嘖感奈此何搖  
扇臂中疼流汗正滂沱傳戒諸高明熱行宜見呵  
梅堯臣歐陽永叔王原叔二翰林韓子華吳長文二舍人  
同過敝廬值出不及見詩曰枯竹爲門扉不可容車騎  
況如鄭廣文無檀藉賓位窮冬月破七貴客聯玉轡傳  
騶肅里間下榻呼童稚問我何所往共留牆上字兒愚  
不知誰金章言照地旣屈卿大夫恨莫親帚箕星躔回  
已高麟趾寧復致戢戢鄰巷居相見竊自喟豈料瘦老

翁能令賢達至昔時蓬蒿徑安有此盛事 司馬光閣

吏詩曰弊車羸馬犯塵泥愁到朱門徧徧辭相國舍人  
雖驟見將軍馬監豈相知因循歲月勞何補顛倒風埃

辱固宜惆悵東岡舊坡在素心空負白雲期 李清臣

韓魏公知中山求謁其值吏報曰太祝方寢清臣因題

詩於壁魏公見之曰吾知此人有才竟有東牀之選詩

曰公子乘閒卧絳厨白衣老吏慢寒儒不知夢見周公

否曾說當年吐哺無 蘇軾嘉祐中陳希亮知鳳翔府

軾初擢制科簽書判官事或謁入不得見客次假寐詩

曰謁入不得去兀坐如枯株豈惟主忘客今吾亦忘吾

同僚不解事愠色見髯鬚雖無性命憂且復忍斯須

劉彥中袖刺詩曰袖刺謁諸鄰徘徊寄心賞潭潭廣厦  
深咳唾生餘響茲邦懷地寶比屋誇雄敞何如蓬廬士  
貧賤安所養 魏野尋隱者不遇詩曰尋真誤入蓬萊

島香風不動松花老採芝何處未歸來白雲滿地無人

埽 又喜孫狀元訪詩曰道同忘貴賤陋巷每來看相

見唯呼字留題不著官狂吟無所忌靜話有餘歡却恨

歸公署茅齋會宿難 又謝寇相公相訪詩二首曰晝

睡方濃向竹齋柴門日午尚慵開驚回一覺遊仙夢村

巷傳呼宰相來中書兩入寇尚書出鎮雄藩半載餘棠

樹陰中無訟聽閒騎白馬到茅廬

張耒謁客詩曰入

門投謁吏翩翩我非欲見禮則然異哉賓主兩無語客  
起疾走如避然我已不恭愧昔賢忍使塗炭朝衣冠人  
生暫聚鴻集川春風吹飛何後先

唐平曾謁華州李

相不遇詩曰老夫三日門前立珠箔銀屏晝不開詩卷  
却拋書袋裏正如閒看華山來

劉魯風投謁所知為

典謁所阻因賦詩曰萬卷書生劉魯風煙波萬里訪文  
翁無錢乞與韓知客名紙毛生不為通

李觀初為太

學官因上言新法不便出通判處州題詩曰十謁朱門  
九不開利名淵藪日徘徊自知不是公侯骨夜夜江山

入夢來 楊萬里人日詰朝從昌英叔出謁詩曰四序

各自佳要不如春時何必花與柳始愛春物熙今晨駕  
言出從公南山西泥軟屨自愜風嫩面不知寒草動暖  
芽晴山餘雨姿水日亦相媚感紋生碎暉鳥聲豈爲我  
我聽偶目怡出門初憚煩載塗乃忘歸但令我意適豈  
校出處爲路人見我揖屬我有所思我不見其面信口  
聊應之徐語恐忤物欲謝已莫追我率或似傲彼慍獨  
得辭 江南處士朱真白善嘲詠嘗謁一貴人不禮廳  
事有格子屏風真白題詩曰道格何曾格言糊又不糊  
渾身都是眼還解識人無 明王廷陳送唐生詩曰仗



策欲誰親侯門不重賓空彈馮氏鋏莫濟范睢貧玉露  
凋紅樹金風起白蘋蕭蕭南去鴈飄泊自爲羣

**文**唐駱賓王文曰倘能分其斗水濟濡沫之枯鱗惠  
以餘光照孀棲之寒女便伏櫪鴛鴦希騏驥而蹠足鸞  
跡翩翩排鴛鴦而刷羽 又曰奮短翮於槍榆希高標  
之餘拂濯鮮鱗於洧滴望鴻浪之微沾所冀顧盼曲流  
剪拂增價則鉛刀起一割之用跋鼈致千里之行 又  
曰魯澤祥麟希委質於宣父吳坂逸驥實長鳴於孫陽  
所貴在乎見知所屈伸乎知已

**書**漢東方朔與公孫弘書曰爵祿不相責以禮同類

之遊不以遠近爲初故東門先生居蓬戶空穴之中魏  
公子以百騎造之大丈夫相知何必接塵而遊乘髮齊  
年哉 唐李白與韓荊州朝宗書曰今天下以君侯爲  
文章之司命人物之權衡一經品題便作佳士而今君  
侯何惜階前盈尺之地不使白揚眉吐氣激昂青雲耶  
韓愈與邢尚書書曰布衣之士身居窮約不借勢於  
王公大人則無以成其志 又爲人求薦書曰某聞木  
在山馬在肆遇之而不顧者雖日累千萬人未爲不材  
與下乘也及至匠石過之而不睨伯樂遇之而不顧然  
後知其非棟梁之才超逸之足也以某在公之宇下非

一日是生於匠石之園而長於伯樂之廐者也於是而  
不得知假有見知者千萬人亦何足云昔人有馬不售  
於市者知伯樂之善相也從而求之伯樂一顧價增三  
倍某與其事頗相類是故終始言之耳 又上李侍郎  
書曰愈應舉覓官凡二十年矣薄命不幸動遭讒謗進  
寸退尺卒無所成惟是鄙鈍不通曉於時事學成而道  
益窮年老而智益困私自憐悼悔其初心髮禿齒豁不  
見知己夫牛角之歌辭鄙而義拙堂下之言不書於傳  
記齊桓舉以相國叔向攜手以上然則非言之難爲聽  
而識者難遇也 又上宰相書曰今有人生二十八年

矣名不著於農工商賈之版其業則讀書著文居窮守約亦時有感激怨懟奇怪之辭以求知於天下四舉於禮部乃一得三選於吏部卒無成九品之位其可望一畝之宮其可懷遑遑乎四海無所歸恤恤乎飢不得食寒不得衣濱於死而益固得其所者爭笑之伏念今有仁人在上位若不往告之而遂行是果於自棄而不以古之君子之道待我相也其可乎寧往告焉若不得志則命也其亦行矣 又上宰相書曰今天下一君四海一國舍乎此則去父母之邦矣故士之行道者不得志則山林而已矣山林者士之所獨善自養而不愛天下

者之所能安也如有憂天下之心則不能矣故愈每自  
進而不知愧焉書函上足數及門而不知止焉寧獨如  
此而已惴惴焉惟不得出大賢之門下是懼亦惟少垂  
察焉 又代張籍與李中丞書曰籍善爲詩使其心不  
以憂衣食亂閣下無事時一致之座側使跪進其所有  
閣下憑几而聽之未必不如聽吹竹彈絲敲金擊石也  
又應科舉與人書曰天池之濱大江之濱有怪物焉  
蓋非常鱗凡介之品彙匹儔也其得水變化風雨上下  
於天不難也其不及水蓋尋常尺寸之間耳其窮涸不  
能自致乎水爲獷獯之笑者蓋什八九矣如有力者哀

其窮而運轉之蓋一舉手一投足之勞也然是物也負其異於衆也且曰爛死於沙泥吾寧樂之若俛首帖耳搖尾而乞憐者非我之志也是以有力者遇之熟視之若無覩也其死其生固不可知也今又有有力者當其前矣聊試仰首一鳴號焉庸詎知有力者不哀其窮而忘其一舉手一投足之勞而轉之清波乎其哀之命也其不哀之命也知其在命而且鳴號之者亦命也又上考功崔虔部書曰愈不肖行能誠無可取抱愚守迷固不識仕進之門迺與羣士爭名競得失行人之所甚鄙求人之所甚利其爲不可雖童昏實知之如執事者

不以是爲念援之幽窮之中推之高顯之上是知其文  
之或可而不知其人之莫可也知其人之或可而不知  
其時之莫可也 又書曰蹈水火者之求免於人也不  
惟其父兄弟之慈愛然後生而全之也將有介於其  
側者雖其所憎怨苟不至乎欲其死者則將大其聲疾  
呼而望其人之救也 又釋言曰愈之親族鮮少無扳  
聯之勢於今不善交人無相先相死之友於朝無宿資  
蓄貨以釣聲勢 又與陳商書曰齊王好竽有求仕於  
齊者操瑟而往立王之門三年不得入叱曰吾瑟鼓之  
能使鬼神上下客罵之曰王好竽而子鼓瑟瑟雖工其

如王之不好何是所爲工於瑟不工於求齊也 又荅  
元公瑾論仕進書曰獨不得與足下偕生中古之間進  
相援也退相拯也已乃出乎今世雖王林國韓長孺復  
生不能爲足下抗手而進以取僂笑矧僕之齷齪者哉

柳宗元上李夷簡相公書曰宗元聞有行三塗之艱  
而墜千仞之下者仰望於道號以求出過之者日千百  
人皆去而不顧俄而有若鳥獲者持長綆千尋徐而過  
焉其力足爲也其器足施也號之而不顧顧而曰不能  
力何也是時不可遇而幸遇而又不逮乎已然後知命  
之窮勢之極其卒呼憤自斃不復望於上矣伏惟念墜



者之至窮錫烏獲之餘力舒千尋之綆垂千仞之艱致其不可遇之遇以卒成其幸庶號而望者得畢其誠

又謝李吉甫相公示手札書曰昨者踴躍殘魂奮揚蓄念激以死灰之氣陳其弊筭之詞致之煙霄分絕流盼今則垂露在手清風入懷華袞濫褒於赭衣龍門俯收於埴井 房魯上節度使書曰今之君侯垂金印結紫綬處內則堂奧數仞侍婢娟然衣羅紈鳴珥環出聲態者累百居外則戟列重扉介士毅然執弩矢擁鈇鉞俟指令者數千君侯目視飛鴻氣如虹蜺而貢士布衣有塵飢童無色蹇驢竭麾而來干謁誠志業不忤氣容自

若且有所望亦不能無愧其望非望飲醲齧肥被鮮曳  
華指捷乘駿也所以望者蓋砥行立名之流非附青雲  
之士焉得施於世其愧非愧布衣糲食飢童蹇驢也所  
以愧者彼何人也予何人也 宋楊廷秀與湖北陳提  
舉書曰僕與執事出處不齊如相避然寸心欲然至今  
遺恨今乃欲以尺紙之敬抒中情之勤以納交於英蕩  
之末光前無契好後無介紹或者以爲驟一則野人一  
則顯仕或者以爲僭焉仰聞孔文舉與李元禮初無一  
日雅而文舉遠引仲尼伯陽之交以爲世契元禮然之  
吾家德祖與公家孔璋同爲子建之賓客非世契乎豈

曰驟之云乎張文潛與公家後山初不相識而以一書  
空交所謂朝陽之光在袖久矣者其書云耳則僕之尺  
書豈曰僭之云乎太史公曰可爲知者道難與俗人言  
也

**增**論隋盧思道勞生論曰朝露未晞小車盈董石之巷  
夕陽蚤落阜蓋填閭竇之里皆如脂如韋俯僂匍匐噉  
惡求媾舐痔自親美言諂笑助其餘樂詐泣佞哀恤其  
喪紀近通旨酒遠貢文蛇豔姬美女委如脫屣金銑玉  
華棄同遺跡

淵鑑類函卷三百十